

Roma norĩ
Roma norĩ ma, Paru te te
ĩrob'ui'érézé
Ĩbaihâ wasu'uzé

Paru hã Corĩtu na 'ri nho'õmo nhisi ãma sãmra ré, ma tô ã ĩbaihâ na hã ãma rob'ui'ééré. Ma tô sima rosa'rata, Roma u tisiré ĩsazei'wa norĩ hã te te sabu za'ra da, te te po're pu'u za'ra da, 'Re ĩhâimana u'âsi mono ãma siptete sina 're nomro mono da. Morĩ õ ré hã, rob'ui'prazé hã te za a'â ti'â Zeruzarẽ u, ĩsazei'wa norĩ ma, Masédoniza hawi danhoprubzé hã. Paru hã ma tô wama waihu'u za'ra, 'Re ĩhâimana u'âsi mono, sa'ētẽ na wama 're ĩsõpru mono zéb zarina, ĩ'ra hã wazada dâ'â da, te te we ĩsõmrizém na hã. Paru hã ma tô duré wama waihu'u za'ra, ãne: Zezusi hã da te dasina 're ĩ'umnhasi za'ra mono zéb zarina si, te za 'Re ĩhâimana u'âsi mono hã te te 're da'awēsãmri, dawasédé hã te te oto da'ãma 're ĩ'ab'madá'â mono õ zéb zarina. ĩsimiroti 'rata na Mozési te te ãma ĩrob'ui'ééré hã da te 're ĩ'madá'â za'ra mono zéb zarina, te te 're da'awēsãmri mono õ di.

Paru te te ĩdazawizé wasu'u

¹ Wa hã Paru, Cristu Zezusihi ma romhuri'wa, wa ãma aima rob'ui'ééré za'ra wa'wa, Roma na 'ri nho'õmo nhisi ãma 're aihâimana za'ra wa'aba mono norĩ ma. 'Re ĩhâimana u'âsi mono hã ma tô ĩpisutu, ĩsadawa wasu'u na te tãma 're romhuri mono da, Zezusihi wasu'uwẽ hã te te wama 're ĩ'awaihu'u mono hã te dama 're wasu'u u'âsi mono da, ĩsadawa para.

² 'Re ìhâimana u'âsi mono hã ma tô duréihã dama ropisutu siro, ìwasu'uwẽ na hã. Duréihã ìsadawa wasu'u 'rata 'wa norĩ hã, ma tô ãne na ãma rob'ui'éré sirõmo za'ra, ìbaihã na hã. ³ E 'wai wasu'uwẽ, ã hã. 'Re ìhâimana u'âsi mono 'ra, Wanhib'apito Zezu Cristuhu wasu'uwẽ. Ta hã Zezusi hã ti'ai ãma dahâiba na dasine 're ìhâimana mono na, wama waihu'u pese za'ra di, apito Dawihi nhihudu 're morĩ wa. ⁴ Duré 'Re ìhâimana u'âsi mono 'ra na, wama waihu'u pese za'ra di, dâ'â uptabi nherẽ, Ìmama hã tiwaihu'u pese na te te hãiwa'utu wa. Duré Timama hawi wẽ ìmorĩ na hã wama waihu'u pese za'ra di. Duré 're ìmorĩ wẽ na zama, wama waihu'u pese za'ra di. ⁵ 'Re ìhâimana u'âsi mono hã tinhoprubzéb zarina ma tô Cristuhu ma ìhâiba na roti, te te ìpisutu da, ìpire na te dama 're sadawa wasu'u mono da. Cristuhu ma, te 're romhuri wẽ mono da, ma tô ìpisutu, ìnhimiromhurizéb zarina dapoto mono bâ, da te 're sazei pese za'ra mono da, duré da te 're sazei pese za'ra mono wa, ìsimiroti si, da te 're 'madâ'â pese za'ra mono da. ⁶ A norĩ wa'aba ma zama, te 're sadawa wasu'u mono da, ma tô ìpisutu 'Re ìhâimana u'âsi mono hã, wasiré Zezu Cristuhu nhib'a'uwẽ oto 're anomro aba mono da, te te 're ìaipisutu za'ra wa'aba mono norĩ ma hã.

⁷ 'Re ìhâimana u'âsi mono ma, asawi pese za'ra wa'aba di. Taha si ma tô aipisutu za'ra wa'wa, ìsib'a'uwẽ si oto 're anomro aba mono da, tãma. Taha wa, wa ãhãna aima ãma rob'ui'éré za'ra wa'wa, Roma na 'ri nõ'õmo nhisi ãma 're aihâimana za'ra wa'aba mono norĩ ma.

Wamama ma, wa ai'ãma 're ìmreme u'âsi za'ra wa'wa, 'Re ìhâimana u'âsi mono ma, duré Wan-

hib'apito Zezu Cristuhu ma zama, ĩsimizawizé hã ai'ãma 're hâimana u'âsi za'ra wa'aba mono da, rowê u'âsi, ãma 're anomro aba mono da.

Roma u, Paru hã datême ĩsisatõrĩzé wasu'u

⁸ Āhãna, wa za ĩnhib'apito ãma uimrehêne ĩwata, ĩmreme na, 'Re ĩhâimana u'âsi mono ãma, Zezu Cristuhu nhimipawaptobzéb zarina 're sazei pese za'ra wa'aba mono wa, aiwasu'u za'ra wa'wa hã daro mono bâ da te 're wapari za'ra mono wa. ⁹⁻¹⁰ Wa hã 're ĩsiahãba zawĩ mono ãna, wa 'Re ĩhâimana u'âsi mono ma, te 're romhuri u'âsi, ĩ'ra wasu'uwê hã te dama 're ĩwasu'u mono zém na hã. Wa ai'ãma 're ĩsipo're pu'u u'âsi za'ra wa'wa. Wa duré ai'ãma 're ĩmreme u'âsi za'ra wa'wa, 'Re ĩhâimana u'âsi mono ma. Tô sena, wa ãne na aima rowasu'u za'ra wa'wa, 'Re ĩhâimana u'âsi mono ma, ãne hã tâma waihu'u pese uptabi wa. Taha wi si, wa nasi ĩsima rowaptêrê u'âsi ãhãna hã, te te sima ĩwézéb uwaibaba te te ĩma ãma uwaimrami da, ãma atême ĩmorĩ za'ra wa'aba da. ¹¹ Te asabu su'u za'ra wa'aba da si, wa tô ĩsima rowê si'aba'ré, 'Re ĩhâimana u'âsi mono, Tipê'êzani na rowê te te dama 're ĩ'apisutu mono zém na, te ãma aipawaptob za'ra wa'aba da, asiptete sina ãma 're anomro aba mono da. ¹² Atême ãma ĩwisi za'ra wa'aba wamhã, wa za aihĩni wasipawaptob za'ra ni, Zezusi wa te 're ĩsazei pese za'ra mono zém na, wanhiptete na ãma 're wanomro mono da.

¹³ ĩsisãnawã norĩ, ãne na aima ĩsiwasu'u za'ra wa'aba da, wa tô ĩsima wê, waihu'u za'ra wa'aba da. Wa tô te ĩsima 're rosa'rata u'âsi, te asabu za'ra wa'aba da. Tane nherê, atême ãma ĩmorĩ su'u aba da nherê, te marĩ hã ĩma 're hâimana u'âsi, õne u'âsi. Zudezu'õ norĩ hã daro mono bâ 're ĩsi'ubumroi

mono hã, ĩwasu'uwẽ hã te tãma 're ĩwasu'u za'ra mono zém na, te te 're saze za'ra mono wa, wa tô te 're awaibu, 'Re ĩhâimana u'âsi mono ma. Tane da, wa tô duré te ĩsima 're rowẽ, airo wa'aba ãma asiré zudezu'õ norĩ hã te duré tãma 're awaibui mono da, tame. ¹⁴ E marĩ wa, wa tô ĩsima wẽ, ãne na te aipawaptob za'ra wa'aba da. Wa hã uburé te 're da'apawapto mono da, 'Re ĩhâimana u'âsi mono te te ĩpisudu. Taha wa, wa za tô te 're da'apawaptob u'âsi, 'ri nho'õmo mono bâ 're ĩdahâimana za'ra mono norĩ hã, duré marã 'rowi 're ĩdahâimana za'ra mono norĩ hã, duré rowaihu'u pese 'wa norĩ hã, duré rowaihu'u'õ'wa norĩ hã. Ta norĩ hã wa za uburé te 're apawaptob u'âsi, dawaptêre mono bâ. ¹⁵ Taha wa, wa ãma atême ĩsima rowẽ uptabi za'ra wa'wa, Roma ãma 're aihâimana za'ra wa'aba mono norĩ ma, ĩwasu'uwẽ na tame te duré aima 're rowasu'u za'ra wa'aba mono da.

Zezihi wasu'uwẽ nhipede

¹⁶ Wa hã, Zezihi wasu'uwẽ hã te dama 're wasu'u tã mono da, 're ĩnhisé mono õ di. E marĩ wa. 'Re ĩhâimana u'âsi mono hã siptete uptabi wa, ĩwasu'uwẽ na te te ãma 're da'anho'reptui mono da, Zezusi te te sina 're ĩ'umnhasi za'ra mono norĩ hã. Zudezu norĩ si ma tô ĩsãna'rata hawimhã te te 're sõ'reptu za'ra aré. Tane nherẽ, te oto ãhãna hã zudezu'õ norĩ zama te te 're anho'reptu. ¹⁷ Zezihi wasu'uwẽ hã e marĩ, wa za wa te ãma 're waihu'u za'ra. 'Re ĩhâimana u'âsi mono, da te 're saze za'ra mono wapsi, dawasédé hã te te oto da'ãma 're ĩ'ab'madâ'â mono õ zarina, te te 're ĩda'awẽsãmri mono zé, taha wasu'u. Duréihã Habatuti hã, 'Re ĩhâimana u'âsi mono zadawa wasu'u 'rata 'wa hã ma tô ãne na ãma rob'ui'ére:

“Ni'wam norĩ hã, 'Re ìhâimana u'âsi mono te te 're saze za'ra mono wamhã, ta norĩ si te za te te 're awēsãmri, 'Re ìhâimana u'âsi mono hã, ìwasédé hã te te oto ãma 're ì'ab'madâ'â mono õ zarina, po're'õ nherẽ, te te 're hã za'ra mono tõ da. Ta norĩ si te za duré rowẽ u'âsi, ãma 're hâimana za'ra.”

Ãne na ma tõ ìwasu'u na ãma rob'ui'ééré.

Dapo're ãna 're ìdanomro mono na rowasu'u

¹⁸ 'Re ìhâimana u'âsi mono hã ma tõ ãne hã wama waihu'u sirõmo za'ra, dapo're'õ na 're ìdanomro mono norĩ hã za te te 're ìda'ahã za'ra mono zém na. Ta norĩ hã te tipẽ'ẽ na te te sima 're rosa'rata wasété u'âsi za'ra. Hâimana wasété uptabi na, te duré dama 're hâimana u'âsi za'ra. Ta norĩ hã tiwasété si te te 're 'manharĩ za'ra mono wa, te 'Re ìhâimana u'âsi mono nhimiroti tõ sena uptabi hã te te dawĩ 're 'wa'rutu za'ra, ãne na rotĩ ìwẽ hã da te 're waihu'u za'ra mono tõ da. ¹⁹ 'Re ìhâimana u'âsi mono 're ìhâimana mono zé hã, da te 're ìwaihu'u za'ra mono zéb da hã, dama waihu'u pese di. E marĩ wa. 'Re ìhâimana u'âsi mono hã dawĩ 're si'udã mono õ wa. Uburé marĩ hã te te ì'apoto mono hã sõ'awi da te 're ì'madâ'â za'ra mono zéb zarina, te da te 're waihu'u za'ra, 're ìhâimana mono zé hã. Taha wa, da te 're ìwaihu'u za'ra mono zéb da hã dama waihu'u pese nherẽ, dapo're ãna 're danomro mono wa, te 'Re ìhâimana u'âsi mono hã te te 're da'ahã za'ra. ²⁰ Duréihã ìsãna'rata hawimhã, 'Re ìhâimana u'âsi mono, ma tõ te te ro'apoto, tiwaihu'u pese na. Tiwaihu'u pese na te te ro'apoto mono wa, ta hawim haré te ìsimiwaihu'u pese zém na, duré tõ sena 're ìhâimana mono na, da te ãma 're waihu'u pese za'ra, ìhãiba

hã da te 're 'madâ'â waihu'u za'ra mono õ nherẽ. E marĩ zarina tawamhã, 'Re ãhãimana u'âsi mono, 're ãhãimana mono na te za tô sena na da te ãma 're waihu'u pese za'ra. 'Re ãhãimana u'âsi mono hã uburé marĩ hã te te ã'apoto mono hã da te 're ã'madâ'â za'ra mono zéb zarina, te oto da te ãma 're waihu'u za'ra, ãwaihu'u pese na, duré tô sena õne u'âsi 're ãhãimana mono na. Taha wa, tô sena 're hãimana mono nherẽ, da te dasiwi 're udã waihu'u za'ra mono õ di za, 'Re ãhãimana u'âsi mono hã. ²¹Ta hã tô sena 're ãhãimana mono na, da te dasiwi 're waihu'u za'ra mono nherẽ, tô sena da te dasiwi 're ãhãimana wazé mono na, da te tãma ãma 're uwaimrami za'ra mono õ di, 'Re ãhãimana u'âsi mono ma hã. Duré sõprub uptabi nherẽ, ãma 're dawata za'ra mono õ di. Taha upana, te marĩ na si siwa'ru da te 're rosa'rata wasété za'ra. Dapẽ'ẽ 're, robra u'âsi 're dahãimana za'ra mono wa, te danhimirosa'rata na da te 're upa za'ra. ²²Dapo're'õ na 're ãdanomro mono norĩ hã uburé marĩ hã te te 're waihu'u pese za'ra mono newa, te taré sina 're wata za'ra, dama. Tane nherẽ, te ta norĩ hã simiza'rese ãna 're nomro. ²³'Re ãhãimana u'âsi mono upana, te ta norĩ hã rob'manharĩ ãma si 're wata za'ra, a'uwẽ na dahãiba 'manharĩ ãma, duré si hãiba ne 'manharĩ ãma, duré abaze hãiba ne 'manharĩ ãma, duré di'i na 're ãnomro mono norĩ hãiba ne 'manharĩ ãma.

²⁴Ta norĩ hã simiza'rese'õ uptabi na 're hãimana u'âsi za'ra mono wa, ma tô 'Re ãhãimana u'âsi mono hã te te sima ãma 're aroti, ãne: "Ta norĩ hã po're za'ra õ wa, wa za oto rême za'ra. Te tãma 're roti za'ra mono õ di za oto. Si'uihã na te za oto 're hãimana za'ra." ãne ma tô 'Re ãhãimana u'âsi mono hã te te sima ãma 're aroti, ta norĩ ãma hã. Taha wa, te oto marĩ ãwasété si te te sima 're ãwẽ

u'âsi za'ra mono zéb zarina, te te 're 'manharĩ u'âsi za'ra, ta norĩ hã. Tihãiba na zama te duré 're siwasété uptabi za'ra oto, si'uihã na. ²⁵ 'Re ãhãmmana u'âsi mono nhimiroti hã tô sena nherẽ, te ãmreme upana aimawi si te te 're wapari za'ra, tô senai'õ hã. Ropoto'wai upana, te ãsimipoto ãma si 're wata za'ra, ta norĩ hã.

'Re ãhãmmana u'âsi mono ãma si, 're dawata u'âsi za'ra mono za. Õhõ si, tô sena hã.

²⁶ Tawamhã dapo're'õ na 're ãdanomro mono norĩ hã, Ropoto'wa nhimipoto ãma si 're dawata za'ra mono wa, ma tô oto 'Re ãhãmmana u'âsi mono hã te te 're da'arẽme, dawasété si da te dasima 're ãwẽ za'ra mono zéb zarina si, dahãiba na 're dasiwasété za'ra mono da, dasi'uihã na. ãne da hã, 'Re ãhãmmana u'âsi mono hã te te dama 're apisutu mono õ nherẽ, te dasi'uihã na pi'õ si'uiwa na dasina 're dawasété za'ra. ²⁷ Tane aibã norĩ hã pi'õ na dasina 're ãdamro za'ra mono zéb upana, te aibã si'uiwa na si te te sina 're rosa'rata wasété uptabi za'ra, pi'õi upana, aibã si'uiwa 're ãsi'ruiwapari za'ra mono na. Dasi'uihã na te aibã si'uiwa na dasina 're dawasété za'ra. Taha wa, te za 'Re ãhãmmana u'âsi mono hã te te 're da'ahã za'ra, dapo're'õ si, da te dasi'ãma 're ã'manharĩ za'ra mono zéb uwaibaba, 're danomro mono wa.

²⁸ Dapo're'õ na 're ãdanomro mono norĩ hã, 'Re ãhãmmana u'âsi mono nhimiroti tô sena hã te te siwi 're wẽ'õ pese za'ra mono wa, te za 'Re ãhãmmana u'âsi mono hã te te 're arẽme, si'uihã na te te sima 're ãrosa'rata wasété za'ra mono zéb uwaibaba si, tiwasédé hã te te 're 'manharĩ u'âsi za'ra mono da. ²⁹ Ta norĩ hã wasété uptabi na te 're hãmmana za'ra. Marĩ zõ si te te sima 're rob'ruiwapari za'ra.

Te duré te te dama 're rob'manharĩ wasété za'ra. Marĩ na te te 're da'ruiwapari u'âsi za'ra. Te duré te te 're danhimro. Siti'ru sina, te ta norĩ hã dazô 're nomro, te te dama 're nharĩ za'ra mono da. Sadawa nhipese uptabi na, te 're hâimana za'ra. Niha te te dama 're rob'manharĩ za'ra mono da, te da'ãma te te sima 're rosa'rata wasété u'âsi za'ra. Taré te te sima 're dabâsi wasété u'âsi za'ra duré. ³⁰ Daza're'ra nherẽ, te duré ta norĩ hã te te sima 're dabâsi wasété za'ra. 'Re ãhâimana u'âsi mono hã te te duré siwi 're 'ruiwapari. Te duré te te dama 're nharĩ wasété u'âsi za'ra. Danhipai u dama pire na dama 're hâimana za'ra mono newa, te 'râwi tipẽẽ na sina 're wata za'ra. Taha wa, te sô'awi timreme na dama 're siwasu'u za'ra, marĩ tãma ãwaihu'u pese za'ra na. Marĩ te te 're ãwaihu'u za'ra mono zéb zarina si te te 're 'manharĩ za'ra, marĩ ãwasétére hã. Timama norĩ nhimiroti hã te te 're wapari za'ra mono õ di duré. ³¹ Marĩ ãwasété zô si, te ta norĩ hã sima 're sôpré. Simiroti na saprĩ ahâ na te 're hâimana za'ra. Da'ãma 're pẽ'êzé za'ra mono õ di. Duré da'ãma 're siwamri za'ra mono õ di. ³² 'Re ãhâimana u'âsi mono hã ma tô ãne na da'ãma sima roti siro, dapo're'õ na 're danomro mono wa, ãsiré ãrata za 're ãdahâimana u'âsi za'ra mono õ na hã. Dapo're'õ norĩ ma hã, ãne hã tãma waihu'u pese za'ra di. Tane nherẽ, te tihâimana wasété si te te sima 're 'ruiwapari u'âsi za'ra, te te 're rême za'ra mono ãna. Tane nherẽ, uburé tiwasédé hã te te 're ã'manharĩ za'ra mono zém nhipai u, te duré marĩ ãwasédé hã te te 're 'manharĩ za'ra. Ni'wam norĩ hã ãsine 're hâimana wasété za'ra mono wa, te ta norĩ si te te 're wêsãmri za'ra.

Īpo're'ō norī, 'Re ĩhâimana u'âsi mono te te siwi 're ĩ'awē'ō mono zé wasu'u

¹ A norī wa'wa hã, dapo're'ō na 're ĩdanomro mono norī ãma, ĩwasédé hã ãma 're sa'ra za'ra wa'aba mono wamhã, te za 're aiwasété za'ra wa'aba mo. E marĩ wa. Dasine aiwasédé hã 're 'manharĩ za'ra wa'aba mono wa, aiwa. Taha wa, dasine 're aihâimana za'ra wa'aba mono nherẽ, dawasédé hã da'ãma 're sa'ra za'ra wa'aba mono wamhã, te za 'Re ĩhâimana u'âsi mono hã te te 're aiwē'ō pese za'ra wa'wa dasiré. Taha wa, aiwasété ãna 're aihâimana za'ra wa'aba mono zém na 're asi'madâ'â waihu'u za'ra wa'aba mono õ di za. ² 'Re ĩhâimana u'âsi mono hã dapo're'ō na 're ĩdanomro mono norī hã te te 're ĩ'awaihu'u mono zéb zarina, te tō te te 're awē'ō pese, ĩ'uwaibaba si. ãne hã, uburé wama waihu'u pese za'ra di. ³ Tane nherẽ, a norī wa'wa hã dawasédé hã da'ãma 're ĩsa'ra za'ra wa'aba mono na, te aiwasédé hã 're ĩ'manharĩ za'ra wa'aba mo. E 'Re ĩhâimana u'âsi mono nhimihâzé wi, 'râwi 're asisõ'reptu za'ra wa'aba mono da bâ, te ãne 're ĩ'manharĩ za'ra wa'aba mo. ⁴ Āté te za ãne asima 're ĩnharĩ za'ra wa'aba mo: “'Re ĩhâimana u'âsi mono hã simizawĩ pese uptabi di. Dasi'uihã na dawasédé hã da te 're 'manharĩ u'âsi za'ra mono nherẽ, da'ãma 're wa'a su'u mono õ di. Taha wa, ĩwasédé te 're 'manharĩ mono nherẽ, te te 're ĩ'ahãri su'u mono õ di.” ãne hã asi'uihã na asi'ãma 're rosa'rata za'ra wa'aba mono õ di za. 'Re ĩhâimana u'âsi mono hã aiwasété wi 're aipizari za'ra wa'aba mono da si, te simi'ẽ na te te 're ai'madâ'â za'ra wa'wa, simizawĩ pese uptabi na. E ãne hã zahadu aima waihu'u za'ra wa'aba õ di bété. ⁵ A norī wa'wa hã aipẽ'ẽ tete u'âsi, te 're aihâimana za'ra wa'aba mo. Taha wa,

'Re ìhâimana u'âsi mono hã te za ropsi'utõrĩzéb u hã nimahã na bâdâ hã ìwa ìwaptã'ãzéb ãma, dazu aihã za'ra wa'wa, dawasété wa, za te te ìda'awẽ'õzéb ãma hã. Tame te za oõo tinhimihâzé hã dama ãma uwaimra, ì'uwaibaba si. ⁶ Marĩ hã da te 're ì'manharĩ za'ra mono zéb uwaibaba, te za 'Re ìhâimana u'âsi mono hã te te dama 're awa'âbâ, ìwẽ na hã duré ìwasété na hã. ⁷ Ni'wam norĩ si te marĩ hã simi'ẽ na te te dama 're 'manharĩ u'âsi za'ra, ìwẽ hã. Ta norĩ hã 'Re ìhâimana u'âsi mono si te te 're wẽsãmri za'ra mono da, te sina 're simipari za'ra, duré ì'rata 're ìsi'ubumroi u'âsi mono zé, te te tãma 're apisutu mono da. Ta norĩ ma si, te za tã 'Re ìhâimana u'âsi mono hã te te 're apisutu, 're ìsi'ubumroi u'âsi mono zéb da hã, ì'rata. ⁸ Duré ni'wam norĩ hã sima si te marĩ na te te 're rosa'rata za'ra, hãiba pisutu ãma 're hâimana za'ra mono da. Ta norĩ hã uburé marĩ ìwẽ hã te te siwi 're wẽ'õ za'ra, marĩ ìwasété na si 're hâimana za'ra mono da. Ta norĩ si te za 'Re ìhâimana u'âsi mono hã sa'ëtê te te 're ahã za'ra, po're õ wa. ⁹ Uburé dawasété si, da te 're ì'manharĩ za'ra mono norĩ hã te za te te 're robzépata za'ëtê za'ra, zudezu norĩ hã, duré zudezu'õ norĩ zama. ¹⁰⁻¹¹ E ni'wam norĩ hã taré zudezu na 're hâimana za'ra mono wa, te za tinhimihâzé hã te te tãma 're ba'a za'ra, 'Re ìhâimana u'âsi mono hã. Mare di. Taha zarina, tinhimihâzé hã te te tãma 're ba'a za'ra mono õ di za. Duré e ni'wam norĩ hã taré zudezu na 're hâimana za'ra mono wa, te za ìwẽ hã te te tãma 're anhomri, danhipai u. Mare di. Uburé aiwapsi 'Re ìhâimana u'âsi mono ma hã, dapoto mono bâ. Tane nherẽ, uburé ìwẽ si te te 're ì'manharĩ za'ra mono norĩ ma si, te za 'Re ìhâimana u'âsi mono hã ìwẽ hã te te tãma 're anhomri, zudezu norĩ ma, duré zudezu'õ norĩ ma zama. Rowẽ uptabi si, te za ta

norĩ ma si te te 're apisutu. Ta norĩ si te za te te 're awēsãmri.

¹² 'Re ãhãmmana u'ãsi mono nhimiroti na, duréihã Mozési te te ãrob'ui'érezé hã zudezu'õ norĩ ma, tãma 're hãmmana za'ra mono õ di. Tãma 're hãmmana za'ra mono õ nherê, tiwasété na si 're hãmmana za'ra mono wamhã, e 'Re ãhãmmana u'ãsi mono 'rata 're ãsi'ubumroi u'ãsi mono zéb da hã, te za te te sina 're uwaimrami za'ra. Mare di. Te te sina 're uwaimrami za'ra mono õ di za. 'Re ãhãmmana u'ãsi mono nhimiroti 'rata na rob'ui'ére hã zudezu norĩ ma si, te 're hãmmana za'ra. Taha wa, ta norĩ hã tiwasédé te te 're 'manharĩ za'ra mono wa, te za 'Re ãhãmmana u'ãsi mono hã tinhimiroti na rob'ui'ére zarina, te te tãma 're arowairébé, ãwasété na te te 're ã'awaihu'u mono zéb uwaibaba. ¹³ E 'Re ãhãmmana u'ãsi mono nhimiroti 'rata na rob'ui'ére hã, taré dapo're na da te 're wapari za'ra mono nherê, te za 'Re ãhãmmana u'ãsi mono hã te te 're da'awēsãmri. Mare di. ãsimiroti zarina 're dahãmmana wê za'ra mono wapsi, te za te te 're da'awēsãmri, 'Re ãhãmmana u'ãsi mono hã. ¹⁴ 'Re ãhãmmana u'ãsi mono nhimiroti na Mozési te te ãrob'ui'érezé hã zudezu'õ norĩ ma, tãma 're hãmmana za'ra mono õ di. Tãma 're hãmmana za'ra mono õ nherê, si'uihã na ãsimiroti zarina 're hãmmana wê za'ra mono wamhã, 'Re ãhãmmana u'ãsi mono ma, te za te te tãma ãma 're uwaimrami za'ra, tãma 're hãmmana za'ra mono õ nherê, 'Re ãhãmmana u'ãsi mono nhimiroti na ãbaihã hã. ¹⁵ Ta norĩ hã si'uihã na 're hãmmana wê za'ra mono wamhã, 'Re ãhãmmana u'ãsi mono nhimiroti hã ãpê'ê 're, tãma 're ãhãmmana u'ãsi za'ra mono zé, te wasu'u. Duré ãwê hã te te dama 're 'manharĩ za'ra mono wamhã, 'rãwi te za tipê'ê na 're sisaze za'ra. Duré marĩ ãwasédé hã te te 're 'manharĩ za'ra mono wamhã, 'rãwi te za tiwasété na 're sisãmri za'ra. Taha wa,

tipě'ě na 'râwi 're sisaze za'ra mono wamhã, duré 'râwi tiwasété na 're sisãmri za'ra mono wamhã, 'Re ãhãmri u'âsi mono nhimiroti, ãpě'ě 're, tãma 're ãhãmri u'âsi za'ra mono zé, te wasu'u. ¹⁶ ãne hã ãwasu'uwě na te dama 're ãrowasu'u mono zéb zarina, te za tô nimahã na tiromhãiba, 'Re ãhãmri u'âsi mono nhimipisutuzéb zarina, Zezu Cristu hã da'ãma ãsipo'ozéb da hã. 'Râwi dasima si da te 're ãrosa'rata za'ra mono na te za oto da'awaihu'u. Taha zarina te za dama arowairébé oto, Cristu hã.

Mozési hã 'Re ãhãmri u'âsi mono nhimiroti na te te ãrob'ui'érézém na rowasu'u

¹⁷ Zudezu norĩ, ãhãna wa za ai'ãma rob'ui'éré za'ra wa'wa. A norĩ wa'wa hã, danhipai u 'Re ãhãmri u'âsi mono te te 're asawi pese uptabi za'ra wa'aba mono na, te dama 're asiwasu'u za'ra wa'aba mo, ãsib'a'uwě 're anomro aba mono wě te. 'Re ãhãmri u'âsi mono nhimiroti na Mozési te te ãrob'ui'érézé hã, aima wa'aba si 're hãmri za'ra wa'aba mono wě te, te ato sina 're anomro aba mo, aima wa'aba si 're hãmri za'ra wa'aba mono wa, 'Re ãhãmri u'âsi mono hã te te 're aiwěsãmri za'ra wa'aba mono da newa, aiwasédé hã te te oto ai'ãma 're ã'ab'madã'ã za'ra wa'aba mono õ zarina.

¹⁸ 'Re ãhãmri u'âsi mono te te aima 're ã'apisutu aba mono zéb zarina 're ã'manharĩ za'ra wa'aba mono zéb da hã, aima waihu'u pese za'ra wa'aba di. Duré 'Re ãhãmri u'âsi mono nhimiroti 'rata na rob'ui'éré hã ma tô 're ãwaihu'u za'ra wa'aba mo, ãma 're anomro wě wa'aba mono da.

¹⁹ ãne na te duré asi'ãma si 're ãrosa'rata upa za'ra wa'aba mo: “Wa norĩ si datob'a ne 're ãdanomro mono norĩ hã, wa wa te 're simro, tô sena. Robra u'âsi 're ãdanomro mono norĩ ma, wa wa te 're rowa'a za'ra. ²⁰ Duré 're ãdahãmri wě za'ra mono

zéb da hã, da te 're ïwaih'u za'ra mono õ norĩ ma hã, wa wa te 're roti za'ra ïwẽ na, duré ai'uté ne hâimana nhimiza'rese ãna 're ïhâimana za'ra mono norĩ ma zama.” ãne na te asi'ãma 're ïrosa'rata upa za'ra wa'aba mo. Duré 'Re ïhâimana u'âsi mono nhimiroti 'rata na rob'ui'ééré hã aima 're hâimana za'ra wa'aba mono wẽ te, te duré ãne na asi'ãma 're ïrosa'rata upa za'ra wa'aba mo: “Wa norĩ ma si, wama waih'u'u pese za'ra di, uburé roti ïwẽ hã tô sena uptabi hã.” ãne na te duré asi'ãma 're aiwata za'ra wa'aba mo. ²¹ E marĩ wa, a norĩ wa'wa hã dama 're roti za'ra wa'aba mono nherẽ, 'rãwi duré asima zama 're roti za'ra wa'aba mono õ di. Marĩ na dawĩ 're danhipsaihuri za'ra mono tõe da, dama 're roti za'ra wa'aba mono nherẽ, te a norĩ wa'aba zama marĩ na dawĩ 're asipsaihuri za'ra wa'aba mo. ²² Duré damro na dasiwi 're danhipsaihuri za'ra mono tõe da, dama 're roti za'ra wa'aba mono nherẽ, te duré a norĩ wa'wa hã aimro na asiwi 're asipsaihuri za'ra wa'aba mo. Duré uburé romhãiba 'manharĩ hã 'Re ïhâimana u'âsi mono upana, ãma 're ïdawata za'ra mono zé hã asiwi 're wẽ'õ pese za'ra wa'aba mono nherẽ, te 'ri para 're ïsimasa mono zéb u 're asisisi aba mo, marĩ, 're simi'uri za'ra wa'aba mono da. ²³ A norĩ wa'wa hã zudezu na da te 're aiwaptêrẽ za'ra wa'wa, 'Re ïhâimana u'âsi mono nhimiroti 'rata na rob'ui'ééré hã aima wa'aba si 're hâimana mono wẽ te, te dama asina 're ïwasu'u za'ra wa'aba mo. Tane nherẽ, ïsimiroti si 're 'madâ'â za'ra wa'aba mono õ di. Duré asiwi 're wazéb za'ra wa'aba mono õ di. Taha zarina, zudezu'õ norĩ ma hã tâma wẽ za'ra õ di, 'Re ïhâimana u'âsi mono hã. ²⁴ ãne ma tô duréihã ai'ãma rob'ui'ééré sirõmo za'ra wa'wa, 'Re ïhâimana u'âsi mono zadawa wasu'u 'rata 'wa hã:

“A norĩ wa'wa hã zudezu na 're aihâimana za'ra wa'aba mono, 'Re ãhâimana u'âsi mono nhimiroti zarina si 're aihâimana za'ra wa'aba mono õ wa, te zudezu'õ norĩ hã 'Re ãhâimana u'âsi mono ãma te te 're wasété za'ra.”

Ãne ma tõ duréihã ai'ãma rob'ui'ééré za'ra wa'aba ni, ãbahã na hã.

²⁵ 'Re ãhâimana u'âsi mono nhimiroti 'rata na rob'ui'ééré hã 're 'madâ'â pese za'ra wa'aba mono wamhã, ã'uwaibaba te za 're asihãiwata nhihãri za'ra wa'aba mo. Tane nherẽ, ãsimiroti si 're 'madâ'â pese za'ra wa'aba mono õ wamhã, sihãiwata nhihãri ãna 're ãnomro mono norĩ ne, te za tãma 're aihâimana za'ra wa'aba mo, 'Re ãhâimana u'âsi mono ma hã aiwa. ²⁶ Zudezu'õ norĩ hã sihãiwata nhihãri ãna 're nomro mono nherẽ, ãsimiroti 'rata na si 're hãimana wẽ za'ra mono wamhã, ãsib'a'uwẽ ne, te za 'Re ãhâimana u'âsi mono hã te te 're 'madâ'â za'ra, zudezu norĩ ne. ²⁷ A norĩ wa'wa hã zudezu na 're aihâimana za'ra wa'aba mono hã, 'Re ãhâimana u'âsi mono nhimiroti 'rata na rob'ui'ééré hã 're 'madâ'â pese za'ra wa'aba mono õ di, ãbahã na rob'ui'ééré hã aima 're hãimana za'ra wa'aba mono nherẽ, duré asihãiwata nhihãri ré 're aihâimana za'ra wa'aba mono nherẽ. Tane nherẽ, ni'wam norĩ hã zudezu'õ norĩ hã sihãiwata nhihãri ré, 're hãimana za'ra mono õ nherẽ, te 'Re ãhâimana u'âsi mono nhimiroti 'rada hã te te 're 'madâ'â pese za'ra. Taha zarina te za 'Re ãhâimana u'âsi mono hã te te siwi 're aiwẽ'õ pese za'ra wa'wa, te te 're aihã za'ra wa'aba mono da, zudezu'õ norĩ si ãsimiroti hã te te 're 'madâ'â pese za'ra mono wa, ai'upana za'ra wa'aba. ²⁸⁻²⁹ A norĩ wa'wa hã, e asihãiwata nhihãri ré 're anomro aba mono wa, te 'Re ãhâimana u'âsi mono

nhib'a'uwẽ uptabi na 're aihâimana za'ra wa'aba mo. E danho'a uburé marĩ hã zudezu hâimanazéb zarina si 're 'manharĩ za'ra wa'aba mono wa, te za 'Re ãhâimana u'âsi mono nhib'a'uwẽ uptabi hã 're anomro aba mo. Mare di. ãne hã ã'uwaibaba nherẽ, ã'uwaibaba õ di, 'Re ãhâimana u'âsi mono ma hã. 'Rãwi aipẽ'ẽ 're, ãsimiroti hã aima 're hâimana u'âsi za'ra wa'aba mono wapsi, tawapsi te za ãsib'a'uwẽ uptabi na 're aihâimana za'ra wa'aba mo, 'Re ãhâimana u'âsi mono pẽ'ẽzani nhimipawaptob zarina si. 'Re ãhâimana u'âsi mono nhimiroti 'rata na rob'ui'éré hã danho'a 're ãwapari za'ra wa'aba mono zém na, tawamhã, ãsib'a'uwẽ uptabi na 're anomro aba mono õ di za. 'Rãwi aipẽ'ẽ 're, ãsimiroti hã aima 're hâimana u'âsi za'ra wa'aba mono wapsi, tawapsi te za ãsib'a'uwẽ uptabi na 're aihâimana za'ra wa'aba mo. ãsib'a'uwẽ uptabi na 're ãhâimana za'ra mono norĩ hã ti'ai ãma ré, da te 're wêsãmri za'ra mono dai õ nherẽ, te 'Re ãhâimana u'âsi mono si te te sima 're wasu'u wẽ za'ra.

3

'Re ãhâimana u'âsi mono hã, tô sena na te te dama 're ãaropisutu mono zém na rowasu'u

¹ Tawamhã zudezu na 're ãaihâimana za'ra wa'aba mono zé hã, e taré, te bété asihâiwata nhihâri ré 're anomro aba mo. E taré, 'Re ãhâimana u'âsi mono ma hã. ² Mare di. Tô sena tãma hã, zudezu na 're aihâimana za'ra wa'aba mono zé hã. Tãma wẽ di, 'Re ãhâimana u'âsi mono ma hã. E niha, wa za tawamhã ãne hã waihu'u za'ra ni, zudezu norĩ 're ãhâimana za'ra mono zé hã. Duréihã 'Re ãhâimana u'âsi mono hã ma tô zudezu norĩ si te te sima 're awẽ, ãsimiroti na rob'ui'éré 'rada hã uburé da'udãna te te 're 'madã'ã pese za'ra mono

da, dawī simani tō da. ³ Tane nherē, ni'wam norĩ hã zudezu norĩ hã 'Re ãhãimana u'ãsi mono nhimiroti zarina 're ãnomro mono na hã te te tãma ãma 're uwaimrami za'ra mono õ di. E tawamhã 'Re ãhãimana u'ãsi mono hã asa te te tãma ãma 're uwaimrami za'ra mono õ di za, uburē marĩ na te te tãma ãma 're ãropisutu za'ra mono zéb zarina. ⁴ Te za tō te te tãma ãma 're uwaimrami u'ãsi za'ra, te te tãma 're ãaropisutu mono zéb zarina. Uburē ti'ai ãma dazadawa nhipese na dasima 're dahãimana za'ra mono nherē, 'Re ãhãimana u'ãsi mono si, sadawa nhipese õ di, tō sena. Duréihã ma tō ãne na ãma rob'ui'éré Dawi hã, 'Re ãhãimana u'ãsi mono ãma hã:

“A hã marĩ na dama 're roti mono wamhã, tō sena asadawa nhipese õ na te za da te 're aiwaihu'u za'ra, tō sena asimiroti hã. Duré ni'wam norĩ hã asadawa nhipe te te ai'ãma 're sa'ra mono wamhã, ta norĩ si ãsadawa nhipese na te za da te dasiwi 're waihu'u za'ra, ai'upana.”

Ãne na ma tō duréihã rob'ui'éré Dawi hã, ãbaihã na hã.

⁵ Ni'wam norĩ hã te ãne na te te si'ãma 're rosa'rata upa za'ra: “Wa norĩ hã wahãimana wasété na si, wa za oto 're wahãimana za'ra, 're ãwanomro wasété uptabi mono na, da te 're wawaihu'u za'ra mono wa, 'Re ãhãimana u'ãsi mono si wasété ãna 're ãmorĩ wē uptabi na, da te 're waihu'u za'ra mono da, wanhipai u. Tawamhã, wahãimana wasété na 're wahãimana za'ra mono nherē, e te za te te 're wa'ahã za'ra, 'Re ãhãimana u'ãsi mono hã. Mare di. Te te 're wa'ahã za'ra mono õ di za.” ãne te ni'wam norĩ hã te te si'ãma 're rosa'rata upa za'ra. ⁶ E tawamhã ãuwaibaba te

ta norĩ hã ãne na hã te te 're rosa'rata za'ra. Mare di. Ī'uwaibaba õ di. 'Re ĩhâimana u'âsi mono hã te tũ ĩ'uwaibaba si te te 're da'ahã za'ra. Ī'uwaibaba na si te marĩ na te te dama 're arowairébé. ãne zarina te te dama 're arowairébé mono õ 'wa'âhã, aré te te da'awẽ'õ waihu'u õ di, za da'ãma ĩsipo'ozéb ãma hã, 'Re ĩhâimana u'âsi mono hã.

⁷ Áté ni'wam norĩ hã te za duré ãne na te te si'ãma 're rosa'rata upa za'ra: “Wa norĩ hã wawasédé, wa te 're 'manharĩ za'ra mono wamhã, áté te za ãne na da te wa'ãma 're rosa'rata za'ra: ‘Õ norĩ hã wasété uptabi na te 're nomro. 'Re ĩhâimana u'âsi mono si, te wẽ uptabi na 're hâimana, õhõ si si-waprosi.’ ãne na te za 'Re ĩhâimana u'âsi mono si 're ĩmorĩ wẽ uptabi na, da te dasiwi 're waihu'u za'ra, wawasété si, wa te 're ĩ'manharĩ za'ra mono na, da te 're ĩwawaihu'u za'ra mono zém na hã. E tawamhã ĩ'uwaibaba, 'Re ĩhâimana u'âsi mono, wawasédé te te wa'ãma 're ĩ'aza'ra mono zéb da hã. Mare di. Ī'uwaibaba õ di.” ãne na te duré ni'wam norĩ hã te te si'ãma 're rosa'rata upa za'ra. ⁸ Taha zarina te duré te te sima 're nharĩ za'ra: “Wawasété si, wa za tũ wa te 're 'manharĩ u'âsi za'ra, 'Re ĩhâimana u'âsi mono si ĩwẽ uptabi na, da te dasiwi 're ĩwaihu'u za'ra mono zéb da hã.” Ni'wam norĩ hã ma tũ ãne na ĩnhimiroti wasédé hã ĩ'ãma sa'ra, ĩsi'uihã na ãne hã te ãma ĩwaihu'u za'ra newa. Ma tũ ĩ'ãma wasété za'ra. Taha wa, te za 'Re ĩhâimana u'âsi mono hã ta norĩ si siwi wẽ'õ pese za'ra, ĩ'uwaibaba.

Dahâimana wasété na 're ĩdahâimana za'ra mono na rowasu'u

⁹ Tawamhã wa norĩ hã zudezu norĩ hã e taré zudezu na 're wahâimana za'ra mono wa, te za, zudezu'õ norĩ hâimanazém nhipai u, te te 're wa'awẽsãmri, 'Re ĩhâimana u'âsi mono hã. Mare di.

Uburé aiwapsi tãma 're ãdahâimana za'ra mono zé hã. Uburé dahâimana wasédé hã da te 're ã'manharĩ za'ra mono na si te 're dahâimana za'ra, zudezu norĩ hã duré zudezu'õ norĩ zama. Dawasété hawi, dasi'uihã na 're dawairébé waihu'u mono õ di, dama siptete wa, dawasédé hã. ãne, wa tô aima waihu'u pari za'ra wa'wa. ¹⁰ Duréihã ma tô ãne na ni'wam norĩ hã ãma rob'ui'ééré za'ra:

“Ni'wam norĩ hã si'uihã na 're ãnomro wẽ mono zém na, 'Re ãhâimana u'ãsi mono te te 're ãwasu'u wẽ za'ra mono zéb da hã, robaba di. Uburé 're ãdanomro wasété mono na si, te 're dahâimana za'ra.

¹¹ Duré ni'wam norĩ hã ãne te te waihu'u za'ra õ di, dawẽ na 're ãdanomro mono zé hã. Duré ni'wam norĩ hã 'Re ãhâimana u'ãsi mono zô 're sõpré mono õ di, ãhâimanazém na te te 're ãwaihu'u za'ra mono zéb da hã. ãne hã tãma robaba uptabi di, 'Re ãhâimana u'ãsi mono ma hã.

¹² A'uwẽ mono bâ ma tô 'Re ãhâimana u'ãsi mono wi, 're dasipizari za'ra.

Dasi'uihã na marĩ ãwẽ hã da te 're 'manharĩ waihu'u za'ra mono õ di. Taré ma tô 're ãdanomro. Ni'wam norĩ hã marĩ ãwẽ hã te te 're 'manharĩ za'ra mono õ di. Mare uptabi di.

¹³ Uburé ãanhoto hã wasété di. Wasété uptabi di.

ãanhoto wasété na te ãazadawa nhipse na, da te ãasima 're ãnarĩ wasété za'ra.

Duré wahi hã te te 're ãahãzu mono wa, ti'wa wa'u na te te 're ããanhimroi mono ne, te ãamreme na da te ãasima 're ãnarĩ wasété za'ra, rowẽ hã da te ãasiwi 're ãprosi za'ra mono da.

- 14 Damreme ïwasété uptabi na si te dasi'ãma da te 're wasété za'ra.
- 15 Dasi'aba're na te duré 're dasi'u'a za'ra. Dasi'aba're na te duré 're dasisimro.
- 16 Daro mono bâ 're danomro mono sidâpâsi, te da te dasiwi 're rowamnarĩ u'âsi za'ra. Taha wa, te dasisa'u hã robzei'õ u'âsi 're dahâimana za'ra.
- 17 Rowẽ na 're ïdahâimana za'ra mono zéb da hã, marĩ hã ïwẽ hã da te dasima 're 'manharĩ waihu'u za'ra mono õ di.
- 18 'Re ïhâimana u'âsi mono zama, da te dasiwi 're hâimana wazé mono õ di.”

Ñe na ma tô 'Re ïhâimana u'âsi mono nhimiroti na da'ãma rob'ui'ére sirõmo za'ra.

19 Duréihã 'Re ïhâimana u'âsi mono nhimiroti na ma tô Mozési hã rob'ui'ére, zudezu norĩ ma, õhõ na si ãma 're hâimana za'ra mono da. Taha wa, 'Re ïhâimana u'âsi mono nhimiroti 'rata na rob'ui'ére hã 're hâimana sirõmo mono wa, ni'wa hã tiwẽ na 're ïmorĩ wasété õ na dama 're siwasu'u waihu'u mono õ di. Uburé dawasété na 're dasisãmri za'ra mono da si, te dama 're hâimana, rob'ui'ére 'rada hã, duré 'Re ïhâimana u'âsi mono, dawasété na te te 're ïda'awẽ'õ mono zé hã da te dasina 're waihu'u za'ra mono da. ²⁰ E 'Re ïhâimana u'âsi mono nhimiroti 'rata na rob'ui'ére zarina, marĩ hã da te 're ïmanharĩ wẽ za'ra mono na, te za te te sima da'ãma 're aroti, dawasédé hã te te oto da'ãma 're ab'madâ'â tô mono da, taha zarina te te oto 're da'awësãmri mono da, dapo're'õ nherẽ, te te 're da'ahâ za'ra mono tô da. Mare di. Taha nai õ di. Uburé marĩ hã da te 're ïmanharĩ wasété za'ra mono na, 'rãwi 're dasiwaihu'u za'ra mono da si, te dama 're hâimana, rob'ui'ére 'rada hã.

'Re ĩhâimana u'âsi mono te te 're ĩda'awêsãmri mono zém na rowasu'u

²¹ Tane nherẽ, 'Re ĩhâimana u'âsi mono ma tô oto dama waihu'u, te te 're ĩda'awêsãmri mono zém na hã, sô'awi da te oto 're ĩwaihu'u za'ra mono zéb da hã. 'Re ĩhâimana u'âsi mono hã te te sima da'ãma 're aroti mono õ di, uburé marĩ hã da te 're ĩmanharĩ wẽ za'ra mono zéb zarina, dawasédé hã te te oto da'ãma 're ĩab'madâ'â mono õ zéb da hã, taha zarina te te oto 're ĩda'awêsãmri mono zéb da hã. Duréihã 'Re ĩhâimana u'âsi mono nhimiroti 'rata na rob'ui'ééré'wa norĩ hã ma tô ãne na ãma rob'ui'ééré za'ra, 'Re ĩhâimana u'âsi mono te te 're ĩda'awêsãmri mono zém na hã. ²² Zezu Cristu, Danho'reptui'wa na da te dasina 're ĩumnhasi za'ra mono zém na si, ma tô 'Re ĩhâimana u'âsi mono hã te te sima da'ãma 're aroti, dawasédé hã te te oto da'ãma 're ab'madâ'â tã mono da, taha zarina si te te oto 're da'awêsãmri mono da, dawasété na 're danomro mono nherẽ, te te oto 're da'ahâ za'ra mono tã da. Uburé Zezu Cristu te te 're ĩsaze za'ra mono norĩ si, te te oto 're awêsãmri. ãne hã aiwapsi te uburé tãma 're hâimana za'ra, zudezu norĩ hã, duré zudezu'õ norĩ zama. ²³ A'uwẽ mono bâ te uburé dawasété na 're danomro. Taha wa, te 'Re ĩhâimana u'âsi mono nhiti 're dahâimana za'ra, 're ĩmorĩ wẽ uptabi nhiti. ²⁴ Tane nherẽ, 'Re ĩhâimana u'âsi mono nhiti 're dahâimana za'ra mono nherẽ, Zezusi te te 're ĩsaze za'ra mono norĩ hã te te 're awêsãmri, da'ãma 're ĩpê'ézé mono zéb zarina, asa tãma 're ĩdasiwa'âbâ za'ra mono zéb zô, sina 're simnhasi mono ãna. Cristu Zezusi hã tidâ'ázém na ma tô da'awa'â. Taha wa, ma tô dawasété hawi te te 're da'awaibu. Taha na si te oto 'Re ĩhâimana u'âsi mono hã te te 're da'awêsãmri, dawasédé hã za oto te te da'ãma 're ĩab'madâ'â mono õ zéb

zarina. ²⁵ 'Re ìhâimana u'âsi mono hã ma tô Zezusi hã pisutu, dazada ìdâ'âzém na dawasédé, da te 're ì'manharĩ za'ra mono zé hã te te dama 're apari mono da, taha zarina tiwi 'rusimani da, ìwa'rãmi da'ãma 're pê'êzé mono da. Duré taha na si te te 're ìda'awêsãmri mono zé hã, 'rãwi da te dasina 're waihu'u za'ra mono da, ma tô ãne da pisutu, Zezusi hã. Zezusi hã da te 're sazei pese za'ra mono wapsi, te za dawasédé hã te te dama 're apari. 'Re ìhâimana u'âsi mono hã da'ãma 're wa'a su'u mono õ wa, dawasédé hã te te da'ãma 're ab'madâ'â mono õ di aré. ²⁶ Tane nherê, ãhãna hã dawasédé hã da te 're ì'manharĩ za'ra mono zém na, te te da'ãma 're ab'madâ'â mono ãna 're hâimana mono õ di oto. Te oto te te ãma 're da'ab'madâ'â u'âsi, uburé marĩ hã ì'uwaibaba si te te 're ì'ab'manharĩ wê mono na, da te dasina 're waihu'u za'ra mono da, duré uburé Zezusi hã da te 're ìsazei pese za'ra mono norĩ hã te te 're ìda'awêsãmri mono na, da te dasina 're waihu'u za'ra mono da.

²⁷ E tawamhã wasi'uihã na, wa za wawê na wasina 're wawata za'ra, 'Re ìhâimana u'âsi mono te te 're ìwa'awêsãmri mono na hã. Mare di. E marĩ wa. 'Re ìhâimana u'âsi mono nhimiroti si, wa te 're ì'madâ'â pese za'ra mono na, te te sima wa'ãma 're aroti mono õ na dâ'âsina, taha zarina wawasédé hã te te wa'ãma 're ab'madâ'â tã mono da. Taré, Zezusi hã wa te 're ìsazei pese za'ra mono na, te te sima wa'ãma 're aroti, taha zarina wawasédé hã te te oto wa'ãma 're ab'madâ'â tã mono da, taha zarina te te 're wa'awêsãmri mono da. ²⁸ ãne hã wa tô wasina waihu'u pese za'ra ni oto. Tô sena, Zezusi hã da te dasina 're umnhasi za'ra mono wapsi, te za tô 'Re ìhâimana u'âsi mono hã te te sima da'ãma 're aroti, dawasédé hã te te oto

da'âma 're ã'ab'madâ'â mono õ zéb zarina, te te oto 're ãda'awêsãmri mono zéb da hã. Ta hã te te sima da'âma 're aroti mono õ di, ãsimiroti na rob'ui'ére 'rata zarina, marĩ hã uburé da te 're ã'manharĩ wẽ za'ra mono na, dawasédé hã te te oto da'âma 're ã'ab'madâ'â mono õ zéb da hã, taha zarina te te duré 're ãda'awêsãmri mono zéb da hã. ãne wasu'u zarina, wa tô wa norĩ hã wasina waihu'u pese za'ra ni oto. ²⁹ E zudezu norĩ nhib'apito si, te 'Re ãhâimana u'âsi mono hã 're hâimana. E zudezu'õ norĩ ma hã, 're hâimana mono õ di bété. Ta norĩ ma zama te duré 're hâimana. ³⁰ 'Re ãhâimana u'âsi mono hã tô sena, misire uburé Danhib'apito uptabi hã. Zezusi hã te te 're ãsazei pese za'ra mono zéb zarina si, te za te te sima ãma 're aroti, ãwasédé hã te te oto ãma 're ab'madâ'â tõ mono da, taha zarina si te te oto 're awêsãmri mono da, zudezu norĩ hã, duré zudezu'õ norĩ zama. ³¹ Zezusi hã da te dasina 're ã'umhãsi za'ra mono zém na si, 'Re ãhâimana u'âsi mono hã dawasédé hã te te oto da'âma 're ab'madâ'â tõ mono da, te te sima da'âma 're aroti mono wamhã, e tawamhã, 'Re ãhâimana u'âsi mono nhimiroti 'rata na rob'ui'ére hã, wama hã taré hã. E wa te 're 'madâ'â pese za'ra mono õ di za. Wa za tô taha zama, wa te 're 'madâ'â pese za'ra, tô sena wa.

4

Abra'ãhã wasu'u, 'Re ãhâimana u'âsi mono te te 're ãsazei pese mono zém na

¹ ãhãna hã wasiré zudezu norĩ hi'rada, wa za aima wasu'u za'ra wa'wa, Abra'ã hã. ² Ta hã uburé marĩ hã te te 're ã'ab'manharĩ wẽ mono na, 'Re ãhâimana u'âsi mono, ãwasédé hã te te oto ãma 're 'madâ'â mono tõ da, te te sima ãma roti 'wa'ãhã,

duré taha zarina Abra'ã hã 'râwi tiwẽ na sina 're wata mono 'wa'âhã, te aré tô sena 'râwi sina 're wata. Tane nherẽ, marĩ hã te te 're ã'ab'manharĩ wẽ mono na, 'râwi sina 're wata waihu'u mono õ di Abra'ã hã, taha zarina 'Re ãhãmãna u'âsi mono hã te te sima ãma roti õ wa, ãwasédé hã te te oto ãma 're ã'madã'ã mono õ zarina, te te ãwẽsãmrizéb da hã. ³ Duréihã Abra'ãhã wasu'u na, ma tô ni'wa hã ãma rob'ui'ééré, ãne na hã:

“Abra'ã hã 'Re ãhãmãna u'âsi mono si, ma tô te te sina 're umnhasi u'âsi, te te tãma ãropisutuzém na hã. Taha ãma si, ma tô sasõ. Taha wa, ma tô 'Re ãhãmãna u'âsi mono hã sima ãma roti, ãwasédé hã te te oto ãma 're 'madã'ã tõ mono da, duré taha zarina si te te oto wẽsãmri da. Taha wa, tãma wẽ uptabi di, 'Re ãhãmãna u'âsi mono ma hã.”

Ãne ma tô Abra'ãhã wasu'u na ãma rob'ui'ééré ni'wa hã, ãbãihã na hã. Á hã Abra'ã hã, marĩ hã te te 're ã'ab'manharĩ wẽ mono na, 'râwi sina 're ãwata mono õ zé wasu'u. ⁴ Ni'wãm norĩ hã te te dama 're romhuri za'ra mono wãmã, da te 're ãpawa'ãbã za'ra mono ré, te 're hãmãna za'ra. E sõpru wa, te za taré ãsib'apito hã rob'ui'prazé hã te te tãma 're sõmri za'ra. Mare di. Sõpru wa, te te tãma 're sõmri za'ra mono õ di. Te te tãma 're ãromhuri za'ra mono zé wa'rãmip si, te za te te tãma 're sõmri za'ra, ãpawa'ã hã. ⁵ Tanei õ di, 'Re ãhãmãna u'âsi mono hã. Marĩ hã da te 're ã'manharĩ wẽ za'ra mono na, te 'râwi 're dasi'madã'ã ze za'ra, taha na si 'Re ãhãmãna u'âsi mono hã dawasédé hã te te oto da'ãma 're ã'ab'madã'ã mono õ na, te te sima da'ãma 're aroti mono newa. Tane nherẽ, te te sima da'ãma 're aroti mono õ di, taha na dawasédé hã te te oto da'ãma 're ab'madã'ã tõ mono da, taha zarina te te

oto 're ĩda'awēsāmri mono zéb da hã. 'Re ĩhâimana u'âsi mono hã da te dasina 're umnhasi za'ra mono wapsi, te za te te sina 're da'awēsāmri, dawasédé hã za oto te te da'ãma 're ab'madâ'â mono õ wa, duré dawasété na 're danomro mono nherẽ, te te 're da'ahâ za'ra mono tõ da. ⁶'Re ĩhâimana u'âsi mono te te sima da'ãma 're aroti mono õ di tõ, uburé marĩ hã da te 're ĩ'manharĩ wẽ za'ra mono zéb zarina, dawasédé hã te te oto da'ãma 're ĩ'ab'madâ'â mono õ zéb da hã, taha zarina te te oto 're ĩda'awēsāmri mono zéb da hã. Da te 're ĩsaze za'ra mono zém na si te oto te te 're da'awēsāmri tõ. Taha zarina, dama 're ĩrowẽ uptabi za'ra mono zém na hã, ma tõ Dawi hã ãne na ãma rob'ui'éré, duréihã:

⁷“Ni'wam norĩ ma hã, 'Re ĩhâimana u'âsi mono hã ĩwasédé te te oto ãma 're 'madâ'â za'ra mono õ wamhã, ta norĩ ma si, tãma 're rowẽ za'ra mono di za, ĩwasété na oto ãma 're po're pu'u za'ra mono õ wa, ta norĩ ãma hã.

⁸'Re ĩhâimana u'âsi mono hã ĩwasédé hã te te oto ãma 're sa'rata za'ra mono õ wa, tãma 're rowẽ za'ra mono di.”

Ãne na ma tõ Dawi hã ãma rob'ui'éré, dama 're ĩrowẽ uptabi za'ra mono zém na.

⁹Ãne hã, e sihâiwata nhihâri ré 're ĩnomro mono norĩ si, te za rowẽ uptabi na 're nomro. E ã norĩ si, te wasu'u, Dawi hã. Mare di. Sihâiwata nhihâri ãna 're ĩnomro mono norĩ zama, te wasu'u. Ãne na, wa tõ aima waihu'u pari za'ra wa'wa, Abra'ãhã wasu'u na rob'ui'éré hã, duréihã:

“Abra'ã hã 'Re ĩhâimana u'âsi mono si, ma tõ te te sina 're umnhasi u'âsi, te te tãma ĩropisutuzém na hã. Taha ãma si ma tõ sasõ. Taha wa, ma tõ 'Re ĩhâimana u'âsi mono hã sima ãma roti, ĩwasédé hã te te oto ãma 're

'madâ'â tō mono da, duré taha zarina si te te oto wēsāmri da. Taha wa, tãma wē uptabi di, 'Re ìhâimana u'âsi mono ma hã.”

Ãne, wa tō aima waihu'u za'ra wa'wa. ¹⁰ E tawamhã Abra'ã hã sihâiwata nhizâri sirōmo, ma tō 'Re ìhâimana u'âsi mono hã sima âma roti, te te wēsāmri da. Mare di. Sihâiwata nhizâri õ ré, ma tō wēsã. ¹¹ 'Re ìhâimana u'âsi mono hã, Abra'ã hã te te sina ì'umnhasi pese zém na si, ma tō wēsã, sihâiwata nhizâri õ nherê. Taha wa, sihâiwata nhizâri õ ré, Abra'ã hã, 'Re ìhâimana u'âsi mono te te ìwēsãmrizém na hã, te wama wasu'u, tō sena na uburé da te 're ìwaihu'u za'ra mono zéb da hã. Taha wa, Abra'ã hã uburé 'Re ìhâimana u'âsi mono, da te dasina 're ì'umnhasi za'ra mono norĩ hi'rada, ta hã. Sihâiwata nhihâri õ nherê, 'Re ìhâimana u'âsi mono te te 're ì'awēsãmri mono norĩ hi'rada. ¹² Duré, ìsihâiwata nhihâri ré norĩ hi'rada, zudezu norĩ hi'rada. E tawamhã sihâiwata nhihâri ré 're hâimana za'ra mono wa, te ta norĩ hi'rada hã 're hâimana, Abra'ã hã. Mare di. Abra'ã hã sihâiwata nhizâri õ ré, 'Re ìhâimana u'âsi mono te te ìsazei pese ne, ìsine te te 're ìsazei pese za'ra mono norĩ hi'rata si, te 're hâimana, Abra'ã hã.

Abra'ãhã ma, 'Re ìhâimana u'âsi mono te te ìropisutuzé wasu'u

¹³ Duréihã 'Re ìhâimana u'âsi mono hã Abra'ãhã ma, ma tō ropisutu, uburé danhipti'ai mono bâ te te tãma 're anhomri mono da, ìsihudu norĩ ma ropibu ma, ìsihudu sidâpâsi. E ìsimiroti hã uburé te te 're 'madâ'â pese uptabi mono wa, duré nimahã na marĩ na misi ìsimiroti na te te upai õ wa, ma tō ãne na tãma ropisutu. Mare di. Taha wab õ di. 'Re ìhâimana u'âsi mono te te ìsazei pese na, te te

wěsãmri wa, ma tō ãne na tãma ropisutu siro. ¹⁴ 'Re ãhãmmana u'ãsi mono nhimiroti 'madã'ã'wa norĩ hã zudezu norĩ hã, ãsimiroti te te 're ã'madã'ã pese za'ra mono zéb zarina, 'Re ãhãmmana u'ãsi mono, ta norĩ ma, uburé danhipti'ai mono bã te te tãma 're ã'anhomri mono da hã, te te ropisutu 'wa'ãhã, taré te aré da te 're saze za'ra, 'Re ãhãmmana u'ãsi mono hã. Marĩ dai õ di aré. Taré te aré 'Re ãhãmmana u'ãsi mono hã dama ropisutu, daro hã te te dama 're ã'anhomri mono zém na hã. Dama hã, aré marĩ õ di. ¹⁵ 'Re ãdahãmmana wē za'ra mono zéb da hã, dasi'uihã na da te dasima 're ãpisutu za'ra mono zé hã dama 're hãmmana za'ra mono õ 'wa'ãhã, aré da te ãma 're upai waihu'u za'ra mono õ di. Tane, 'Re ãhãmmana u'ãsi mono nhimiroti na Mozési te te ãrob'ui'érézé hã dama 're hãmmana za'ra mono õ 'wa'ãhã, aré da te ãma 're upai waihu'u za'ra mono õ di duré. Tane nherē, te tō dama 're hãmmana, ãsimiroti na rob'ui'éré 'rada hã. Taha wa, da te 're waihu'u pese za'ra mono nherē, da te 're 'madã'ã pese za'ra mono õ wamhã, 'Re ãhãmmana u'ãsi mono te te 're ãda'ãhã za'ra mono zé, te wasu'u.

¹⁶ Tawamhã e marĩ hawi, ma tō 'Re ãhãmmana u'ãsi mono hã Abra'ãhã ma ropisutu, ãsihudu norĩ ma ropibu ma. Abra'ã hã te te ãsazei pese zém hawi, ma tō tãma ropisutu. Te te tãma ãropisutuzé wa'rãmi, asa tãma ãsiwa'ãbãzéb zō 're ãsimnhasi mono õ na, da te dasina 're ãwaihu'u pese za'ra mono zéb da hã, ma tō 'Re ãhãmmana u'ãsi mono hã Abra'ã te te ãsazei pese zém hawip si, tãma ropisutu. E Mozésihi nhimi'ui'éré 'madã'ã'wa norĩ ma si, te 'Re ãhãmmana u'ãsi mono nhimiropisutuzé hã tãma 're hãmmana za'ra, zudezu norĩ te te 're ãsazei pese za'ra mono norĩ ma si. Mare di. Abra'ã hã, 'Re ãhãmmana u'ãsi

mono si te te sina ã'umnhasi ne, uburé 're ãdahâimana za'ra mono norĩ ma zama, te tãma 're hâimana za'ra, 'Re ãhâimana u'âsi mono nhimiropisutuzé hã. E marĩ wa. Abra'ã hã uburé wahi'rata wa, uburé wasiré ãsazei'wa norĩ hi'rata wa. ¹⁷ Duréihã ni'wa hã ma tô ãne na 'Re ãhâimana u'âsi mono mreme na rob'ui'ééré, Abra'ãhã ãma hã:

“Wa hã wa tô aipisutu, daro mono bâ da te dasina 're ã'umnhasi za'ra mono norĩ hi'rata na, da te 're asisi za'ra mono da.”

Ãne ma tô 'Re ãhâimana u'âsi mono nhimipisutuzém na ãma rob'ui'ééré. 'Re ãhâimana u'âsi mono nhimiropisutuzé hã, tô sena. Pire uptabi di. E marĩ wa. Ô hã tô sena, 're hâimana mono wa. Taha si, ma tô Abra'ã hã te te sina 're umnhasi u'âsi. Taha si, 're dadâ'â za'ra mono nheré, dahâiwa'utu'wa hã te 're hâimana. Taha si marĩ ô ré, Ropoto mono 'wa hã. ¹⁸⁻¹⁹ Duréihã Abra'ã hã 100 na ãma ãwahubzéb u hã romhutu na ma tô 'Re ãhâimana u'âsi mono hã tãma ropisutu, ãne: “Asihudu sidâpâsi, da'ahâ uptabi di za.” Ãne rob'ui'ééré 'rata na ãwasu'u hã. Abra'ã hã romhutu na ma tô tidâ'âzé hã sina waihu'u, ãhâiba sib'uware na hã oto. Timro zama ma duré waihu'u, 'ra waihu'u ô na, Sara hã. Tane nheré, siptete sina ma tô 'Re ãhâimana u'âsi mono si saze, za ã'ra te te tãma ãsômrizém na hã. Te te 're wawãi mono ãna, te sô 're simipari u'âsi, 'Re ãhâimana u'âsi mono nhimiropisutuzéb zô hã, marĩ hã tãma hâimana ô nheré, sô 're ãsimipari mono zéb da hã. Taha wa, ma tô 'Re ãhâimana u'âsi mono hã pisutu, daro mono bâ da te 're ãsazei pese za'ra mono mono norĩ hi'rata na, da te 're sisi za'ra mono da. ²⁰ 'Re ãhâimana u'âsi mono te te tãma ãropisutuzém na hã te te ãma wawãi

õ di. Ìmreme hã te te ïsazei pese zéb zarina, ma tô siptete uptabi na 're hâimana. Te duré âma 're wata u'âsi. ²¹ 'Re ïhâimana u'âsi mono te te tãma ïropisutuzé hã za te te tãma âma ï'uwaimramizéb zô, te te 're sazei pese u'âsi. Te te sazei utõrĩ õ di, Abra'ã hã. ²² Taha wa, te te ïsazei pese na ma tô sima âma roti 'Re ïhâimana u'âsi mono hã, ïwasédé hã te te oto âma 're 'madâ'â mono tõ da, taha zarina te te wësãmri da, duré po're'õ nherẽ, za te te azãri tõ da, dame. ²³ Duréihã rob'ui'ééré 'rata na Abra'ãhã wasu'u hã, 'Re ïhâimana u'âsi mono te te ïwësãmrizém na hã, taha wasu'u si õ di. ²⁴ Wa norĩ zama, wa te wasina 're ï'umnhasi za'ra mono norĩ hã te za duré te te 're wa'awësãmri, Wanhíb'apito Zezusihi hâiwa'utu'wa, wa te wasina 're ï'umnhasi za'ra mono norĩ hã. ²⁵ 'Re ïhâimana u'âsi mono hã ma tô Zezusi hã dama tisõ, da te dasiwi wĩrĩ da, wawasété na 're wanomro mono wa. Ma tô duré hâiwa'utu, taha na te te 're wa'awësãmri mono da, wawasédé hã te te oto wa'ãma 're ab'madâ'â tõ mono da, 'Re ïhâimana u'âsi mono hã.

5

Cristuhu zazei'wa, toi u'âsi 're ïnomro mono zé wasu'u

¹ Wanhíb'apito Zezu Cristu hã ma tô wazada tidâ'â za'ra, wa'upana. Taha wa, 'Re ïhâimana u'âsi mono hã ma tô te te sima wa'ãma 're aroti, wa te 're ïsazei pese za'ra mono na, wawasédé hã te te oto wa'ãma 're ab'madâ'â tõ mono da, taha zarina si te te duré 're wa'awësãmri mono da, wawasété na 're wanomro mono nherẽ, te te 're wa'ahã za'ra mono tõ da. Taha wa, rowẽ u'âsi, wa oto âma 're wanomro, 'Re ïhâimana u'âsi mono âma hã. ² Zezusi hã wa te wasina 're umnhasi za'ra

mono wa, te 'Re ĩhâimana u'âsi mono hã ĩwẽ si te te wama 're ab'madâ'â. Taha na si, wa oto wa norĩ hã 're wahâimana za'ra. Niwapsi te za 'Re ĩhâimana u'âsi mono hã te te wama 're apisutu, ĩwaihu'u pese zarina ĩhâiba na rowa'a za'êtẽ na ĩsiré 're wahâimana u'âsi za'ra mono da, rowẽ uptabi na. Taha wa, wato sina, wa sô 're wanhimipari za'ra, wa te 're sazei utõrĩ za'ra mono ãna. ³ Duré Cristuhu zazei'wa, 're wanomro mono 'ru te, da te wama 're rob'manharĩ za'ra mono wa, wa te 're robzépata za'ra mono ré, wa watoi u'âsi 're wahâimana za'ra õne haré, wa te 're ĩrobzépata za'ra mono zéb zarina, õhõ ãma si wanhiptete sina 're ĩwahâimana za'ra mono zéb da hã, wa te wasima ãma 're sa'êtẽ za'ra mono wa. ãne hã wa te wasina 're waihu'u pese za'ra mono wa, wa za watoi u'âsi 're wahâimana za'ra. ⁴ Tawamhã wanhiptete sina, ãma 're ĩwahâimana za'ra mono zéb da hã, wa te tãma ãma 're uwaimrami za'ra mono wamhã, te za 'Re ĩhâimana u'âsi mono hã wa'ãma 're wata za'ra. Tawamhã wa'ãma 're ĩwata za'ra mono zém na, wa te wasina 're waihu'u za'ra mono wamhã, marĩ te te wama 're ĩ'apisutu mono zéb zô, wa te 're wawã za'ra mono ãna, wa za wasina 're wanhimipari u'âsi za'ra. ⁵ ãne zô si 're wanhimipari za'ra mono wamhã, taré sô 're wanhimipari za'ra mono õ di za. Taré, wa te wasina 're umnhasi baba za'ra mono õ di za. E marĩ wa. 'Re ĩhâimana u'âsi mono hã Tipẽ'êzani te te wama 're ĩ'anhomri mono na, tinhimizawi pese zé hã te te wama 're awaihu'u mono wa, taré, wa te wasina 're umnhasi baba za'ra mono õ di za. Taha wa, taré sô 're wanhimipari za'ra mono õ di za, marĩ ĩwẽ hã te te wama 're ĩ'apisutu mono zô hã.

⁶ Duréhã 're ãdahâimana za'ra mono na'rata zém hawimhã, marĩ da te 're ã'manharĩ wẽ za'ra mono zém na hã 'Re ãhâimana u'ãsi mono te te da'ãma sima 're aroti mono õ di, taha zarina dawasédé hã te te oto da'ãma 're ab'madâ'ã tã mono da, duré dapo're'õ nherẽ, te te 're da'ahã za'ra tã mono da. Ta hawim haré, dahâimana wẽ zém na 'rãwi 're dasi'madâ'ã waihu'u za'ra mono õ di, dawasédé hã te te da'ãma 're ã'ab'madâ'ã mono õ zarina, te te 're ãda'awẽsãmri mono zéb da hã, 'Re ãhâimana u'ãsi mono hã. Taha ré, ma tã Cristu hã dazada dãrã, uburé dawasété na 're ãdahâimana za'ra mono norĩ zãda, 'Re ãhâimana u'ãsi mono, bãdã te te ãma ãpisutuzé hã ãwa ãwaptã'ãzém na. ⁷ Ni'wa hã uburé ãanhimiroti wẽ hã te te 're 'madâ'ã pese mono nherẽ, taha upana ãda'matã'ã da hã, mare di. Ni'wa hã da'ãma 're ãsiwãmri mono, 're 'maihâimana mono wãmã, taha upana si ãda'matã'ã da hã, ãté te za 're si'madã'ã za'ra. ⁸ Taneĩ õ di, 'Re ãhâimana u'ãsi mono nhimizawizé hã. Wa norĩ hã wawasété na 're wahâimana za'ra mono nherẽ, ma tã Cristu hã pisutu, wazada dãã da, wa'upana. ãne hã ma tã 'Re ãhâimana u'ãsi mono hã te te wama 're awaihu'u, te te 're ãwa'azawi pese mono zém na hã. ⁹ Zezusi wazada ãdã'ãzém na, ma tã 'Re ãhâimana u'ãsi mono hã te te 're wa'awẽsãmri, wawasédé hã te te oto wa'ãma 're ã'ab'madã'ã mono õ zarina. ãne wa, te za duré Zezusi hã tidã'ãzém na te te 're wa'anho'reptu, 'Re ãhâimana u'ãsi mono nhimihãzé wi, ro hã za ãsi'utõrĩzéb ãma hã. ¹⁰ 'Re ãhâimana u'ãsi mono nhitob'ru, wa aré 're wanomro. Tane nherẽ, ti'ra dããzém na ma tã wa'ãma 're siwadi za'ra oto. Tawãmã ãsiwadi oto 're wahâimana za'ra mono wa, te za tã oto Zezusi hã te te 're wa'anho'reptu, dãã nherẽ, apã hãiwa'utu wa, dãã ãna 're hãimana

u'âsi mono wa za oto. ¹¹ Tane nherẽ, taha si õ di. 'Re ãhâimana u'âsi mono ãma, wa duré watoi u'âsi 're wahâimana za'ra, Wanhîb'apito Zezu Cristu dã'ázém na, wa'ãma 're siwadi za'ra mono wa oto.

Adãhã wasu'u, Cristuhu wasu'u me

¹² Tawamhã e ma hawi, ma tô dawasédé hã tinhana'rata. Adã hã ma tô duréhã tiwasété 'rata. Ta hawimhã ma tô dawasédé hã te te ropé, uburé dapoto mono bã. Ta hawim haré, te aihĩni 're dadã'ã u'âsi za'ra, dawasété na 're danomro mono wa. ¹³⁻¹⁵ Dawasété ãna 're ãdahâimana za'ra mono zéb da, 'Re ãhâimana u'âsi mono nhimiroti hã dama 're hâimana za'ra mono õ nherẽ, dawasédé hã te te dã'ãma 're aza'ra mono õ di, 'Re ãhâimana u'âsi mono hã. Tane nherẽ, duréhã Mozésihi ma, tinhimiroti hã te te waihu'u õ ré, duré te te rob'ui'éré õ ré, te dawasété na si 're dahâimana u'âsi za'ra. Ñsimiroti na rob'ui'éré hã dama 're hâimana za'ra mono õ nherẽ, dawasété na si 're dahâimana za'ra mono wa, ma tô Adãhã wasété na'rata hawim haré 're dadã'ã u'âsi za'ra, 'Re ãhâimana u'âsi mono nhimiroti hã dapẽ'ẽ 're, dama 're hâimana za'ra mono nherẽ, da te dasina tãma ãma 're uwaimrami za'ra mono õ wa. Mozésihi ma, za oto 'Re ãhâimana u'âsi mono, tinhimiroti te te ãwaihu'uzéb u hã, dawasété na si 're danomro u'âsi mono wa, ma tô 're dadã'ã u'âsi za'ra. Adãhã wi, 'Re ãhâimana u'âsi mono, rob'rã te te sawi nherẽ, te te sadawa 'madã'ã ãna, ma tô tiwasédé hã 'manha. ãne hã Adãhã wasété ne, aiwa da te 're 'manharĩ za'ra mono õ nherẽ, ma tô aihĩni 're dadã'ã u'âsi za'ra, 'Re ãhâimana u'âsi mono te te dama ãrotizé hã, sã'awi dama 're hâimana za'ra mono õ nherẽ.

Adã hã wasété na'rata wamhã, ma tô ãpire uptabi hã 'manha, tiwasédé hã. Taha uirĩ na si, ma tô Zezusi hã marĩ ãpire uptabi hã 'manha duré ãwê hã, ti'ai ãma 're morĩ ré. Taha wa, Zezusihi ne Adã hã, marĩ ãsine ãpire hã te te 'manharĩ wa. Tane nherê, aiwab õ di, ãsime'manharĩzé hã. 'Re ãhãimana u'ãsi mono hã ãwê te te dama 're ã'anhomri mono hã, Adãhã wasété nei õ di. Adã hã tiwasédé te te ã'manharĩzém hawi, ma tô oto uburé 're dadã'ã u'ãsi za'ra, tô sena. Tane nherê, 'Re ãhãimana u'ãsi mono hã ãwê hã te te dama 're ã'ab'manharĩ mono zé hã ãpire uptabi di, Adã hã tiwasédé te te ã'manharĩzém nhipai u. Wê uptabi di. E marĩ tawamhã, 'Re ãhãimana u'ãsi mono, ãwê hã te te dama 're ã'ab'manharĩ mono zé hã. Zezusi hã sisawi ãna tihãiba na te te 're ãda'azawi pese mono na, ma tô te te dama 're ab'manharĩ wê, tinhoprubzéb zarina. ¹⁶ Adã hã tiwasédé te te ã'manharĩzém hawim haré, te dawasédé hã da te 're 'manharĩ u'ãsi za'ra oto. Taha zarina, ma tô 'Re ãhãimana u'ãsi mono hã te te siwi 're da'awê'õ pese, dawasédé hã te te da'ãma 're ã'awaihu'u mono zéb zarina. Tane nherê, ta hawim haré, dawasédé hã da te 're 'manharĩ u'ãsi za'ra mono nherê, dama ãsõprubzém na te oto da'ahã na te te 're da'awêsãmri 'Re ãhãimana u'ãsi mono hã, ã'ra dazada ãdã'ãzém na. ãne wa, 'Re ãhãimana u'ãsi mono, dama 're ãsõpru mono zé hã, ãpire uptabi di, Adãhã nhimim'ãmanharĩzé ma hã. ¹⁷ Tô sena aibã hã misi, tiwasédé te te ã'manharĩ na'rata hawi, ma tô oto 're dadã'ã u'ãsi za'ra. Tane nherê, Zezu Cristu hã aibã misi nherê, ãsime'manharĩzé hã ãpire uptabi di, aibã tiwasédé te te ã'manharĩ na'rata zém nhipai u. Wê uptabi di. 'Re ãhãimana u'ãsi mono hã ãwê uptabi hã te te tãma 're ã'apisutu mono norĩ si, te za hãimana ãpire na ãsiré

're hâimana u'âsi za'ra, tinhoprubzé hã te te tãma 're ĩ'anhomri mono norĩ si. Īsõprubzé hã te te 're ĩda'awêsãmri mono zé, te wasu'u. Cristu ĩdâ'âzém na te za hâimana pire na ĩsiré 're hâimana u'âsi za'ra.

¹⁸ Aibã hã misi tiwasédé hã te te ĩ'manharĩzém hawi, ma tô 'Re ĩhâimana u'âsi mono hã uburé te te 're da'awẽ'õ pese, dawasédé hã te te da'ãma 're ĩ'awaihu'u mono zéb zarina. Tane, misi Zezusihi nhimi'manharĩ wẽ zém na, te za oto 'Re ĩhâimana u'âsi mono hã te te 're da'anho'reptu, dapẽ'ẽ 're, dadâ'ã u'âsi ne 're ĩdanomro mono zém hawi, ĩ'rata 're dahâimana u'âsi za'ra mono da oto. ¹⁹ Aibã hã misi nherẽ, 'Re ĩhâimana u'âsi mono te te ĩwapari õ hawimhã, ma tô oto uburé dawasété na si 're dahâimana za'ra. Tane duré, aibã hã misi nherẽ, 'Re ĩhâimana u'âsi mono te te ĩwapari pese zém hawi te za oto 'Re ĩhâimana u'âsi mono hã te te 're da'awêsãmri, Zezu Cristu te te ĩwapari pese zém hawimhã.

²⁰ Duréihã 'Re ĩhâimana u'âsi mono hã ma tô Mozésihi ma tinhimiroti hã waihu'u, te te ãma rob'ui'ééré da, ãma 're dasipo're pu'u za'ra mono wa, dawasédé hã da te oto dasina 're waihu'u za'ra mono da. Tane nherẽ, ma tô dawasédé hã da te dasima 're sa'ëtẽ u'âsi za'ra. Tane nherẽ, dawasédé da te dasima 're ĩsa'ëtẽ za'ra mono zém nhipai u, ma tô 'Re ĩhâimana u'âsi mono hã te te dama 're arob'manharĩ wẽ, da'ãma 're ĩsiwamri u'âsi mono zéb zarina. ²¹ ãne na rowasu'u na, wa za oto aima 'rãsutu za'ra wa'wa. Dawasété na si 're danomro u'âsi mono wa, ma tô aré dapẽ'ẽ 'remhã, dadâ'ã ne 're dahâimana u'âsi za'ra, 'Re ĩhâimana u'âsi mono nhiti. Tane nherẽ, tinhimizawi pese zéb zarina, ma tô 'Re ĩhâimana u'âsi mono hã Wanhib'apito Zezu Cristu dâ'âzéb zarina te te sima 're wa'awẽ,

taha zarina si rowě uptabi na 're wanomro u'âsi mono da oto.

6

'Re ĭdanomro mono zép té wasu'u

¹ 'Re ĭhâimana u'âsi mono hã, simizawi pese uptabi di. Te wa'âma 're pē'ēzé u'âsi. Taha wa, wawasédé hã wa te 're 'manharĩ za'ra mono nherě, tinhimizawizé hã te te wawi 're azawi mono ō di. Wawasédé, wa te 're ĭ'manharĩ za'ra mono zé hã, te duré te te wama 're apari. E tawamhã, wawasédé, wa te 're ĭ'manharĩ za'ra mono zé hã te te wama 're apari mono nherě, wa za wawasédé hã duré apâ wa te 're 'manharĩ u'âsi za'ra, apâ te te duré wama 're apari zahu mono da. E taha da, wa za wawasété u'âsi 're wahâimana za'ra. ² Mare di. 'Re dadâ'â za'ra mono wa, marĩ zô, da te oto 're ĭrob'ruiwapari za'ra mono ō ne, wa norĩ hã wawasété zô, wa te oto 're rob'ruiwapari za'ra mono ō di za. Taha wa, wawasédé hã wa te duré 're 'manharĩ zahu za'ra mono ō di za oto. ³ Wa norĩ hã â dawabzuri, wa te 're 'manharĩ za'ra mono wamhã, Cristu Zezusihi siré, 'râwi oto 're ĭwanomro mono zé, te wasu'u, simisutu. ĭsiré oto 're ĭwanomro mono ne, wa tô duré ĭsiré 're wadâ'â za'ra, simisutu. Āne hã aima waihu'u pese za'ra wa'aba di. ⁴ Tawamhã, â dawabzuri hã oto wa te 're 'manharĩ za'ra mono wamhã, â da te 're ĭwanhamra mono zé, Cristuhu siré 're ĭwadâ'â za'ra mono zé, te wa'âma simiré'é. Ab're 're, ĭsiré da te 're ĭwanheme mono zéb zama, te wasu'u. E marĩ da, wa tô Zezusihi siré 're wadâ'â za'ra. Cristu hã dâ'â nherě, ĭmama hã tiwaihu'u pese na te te ĭhâiwa'utu ne, 're ĭwanomro mono zép tém na si, oto

're ãwahâimana za'ra mono zéb da hã, wa tô ãsiré 're wadâ'â za'ra, wa norĩ hã. ãne wa'ãma ãsimiré'ézé hã.

⁵ Wa norĩ hã Cristuhu siré, wa tô 're wadâ'â za'ra, wawasété zô, wa te oto 're rob'ruiwapari za'ra mono õ wa, 're dadâ'â za'ra mono wa, marĩ zô, da te oto 're ãrob'ruiwapari za'ra mono õ ne. ãne hã simisutu ma tô 'Re ãhâimana u'âsi mono hã wahâiba na atob za'ra, Cristuhu tême. Duré Cristu hã dá'â uptabi nherẽ, ãmama te te ãhâiwa'utu ne, te za duré wa norĩ hã te te 're wa'ahâiwa'utu. Taha na te za duré Cristuhu tême wahâiba na atob za'ra, 'Re ãhâimana u'âsi mono hã. ⁶ Wawasété na 're ãwanomro 'rata mono zé hã, tâibâ oto. Cristu hã wedepo'o nhonhi'rãmi na ãdâ'â ne, ma tô 'Re ãhâimana u'âsi mono hã te te wama 're a'uprosi, 're ãwanomro 'rata mono zé hã. Marĩ ãwasétére si, wa te wasima 're ãruiwapari u'âsi za'ra mono zém hawi, te te 're wa'anho'reptui mono da, ma tô te te wama 're a'uprosi, 're ãwanomro 'rata mono zé hã. Wawasédé hã wa te 're sahâri waihu'u za'ra mono ãna, 're wanomro mono tõe da, ma tô te te wama 're a'uprosi. ãne hã wama waihu'u pese za'ra di. ⁷ 'Re dadâ'â za'ra mono wamhã, dawasédé hã da te 're 'manharĩ waihu'u za'ra mono õ di oto. Tane, 're ãdâ'â za'ra mono norĩ ne, Cristuhu siré 're wadâ'â za'ra mono wa, wawasédé hã wa te 're 'manharĩ u'âsi za'ra mono õ di za oto. ⁸ Taha wa, Cristuhu siré 're wadâ'â za'ra mono wa, wa za wa te wasina 're waihu'u pese za'ra tô sena na, za ãsine 're ãwahâiwa'utu za'ra mono zéb da hã, duré ãsiré za 're ãwahâimana u'âsi za'ra mono zém na hã. ⁹ ãne na, wa tô duré wasina waihu'u pese za'ra ni. Cristu hã dá'â uptabi nherẽ, 'Re ãhâimana u'âsi mono te

te hâiwa'utu wa, taha wa, niwamhã tidâ'â na te te sahu õ di za, ãdâ'âzé hã sib'uware wa oto, Zesusihi ma hã. ¹⁰ Dâ'â wamhã, misi haré ma tô dawasété nhiptetezé hã uprosi. Taha wa, oto dâ'â parimhã, Timama ma, te oto 're hâimana u'âsi, Cristu hã. ¹¹ Taha wa, te za âne na asi'ãma 're ãrosa'rata za'ra wa'aba mo: “Re dadâ'â za'ra mono wa, marĩ zô, da te oto 're ãrob'ruiwapari za'ra mono õ ne, wawasété zô, wa te oto 're rob'ruiwapari za'ra mono õ di za, wa norĩ hã. 'Re ãhâimana u'âsi mono ma, wa te oto 're ãromhuri za'ra mono da si, wa za oto 're wahâimana za'ra. Cristu Zesusihi ãma si, wa za oto 're wahâimana za'ra.” ãne si te za asima ãma 're ãrosa'rata za'ra wa'aba mo.

¹² 'Râwi marĩ na asima 're ãrosa'rata wasété za'ra wa'aba mono zé hã 're 'madâ'â za'ra wa'aba mono tõ da, te za aiwasété wi asina 're asiptete za'ra wa'aba mo, aipê'ẽ na. ¹³ Marĩ ãwasédé hã 're 'manharĩ za'ra wa'aba mono tõ da, te za aihâiba hã 're ã'madâ'â pese za'ra wa'aba mo, aihâiba hawim na marĩ 're 'manharĩ za'ra wa'aba mono tõ da. 'Re atâ'â za'ra wa'aba mono wa, 'Re ãhâimana u'âsi mono te te 're ã'aihâiwa'utu za'ra wa'aba mono ne, te 're aihâimana za'ra wa'aba mo, 're anomro aba mono zép tém na hã. Taha wa, te za 'Re ãhâimana u'âsi mono ma si, 're asisõmri za'ra wa'aba mo, misi haré. Taha ma si, te za aihâiba hã 're ãsõmri za'ra wa'aba mo õne haré, marĩ ãwê si ãma 're ã'manharĩ za'ra wa'aba mono zéb da hã. ¹⁴ 'Re ãhâimana u'âsi mono ãhimiroti 'rata na rob'ui'ére hã asina tãma ãma 're ã'uwaimrami za'ra wa'aba mono zéb zarina, aiwasédé hã te te oto ai'ãma 're ab'madâ'â aba mono tõ da, 're asi'madâ'â za'ra wa'aba mono õ di za. Tinhimizawi pese zém na si, ma tô 'Re ãhâimana u'âsi mono hã ai'ãma 're

pě'ězé za'ra wa'wa, aiwasété na 're aihâimana za'ra wa'aba mono nherě. Taha zarina si, ma tô te te 're aiwěsâmri za'ra wa'wa. Taha wa, te za aiwasété wi asina 're asiptete u'âsi za'ra wa'aba mo oto.

'Re ïhâimana u'âsi mono ma, 're ïdasisômri za'ra mono zé wasu'u

¹⁵ Tawamhã âté âne te za asima 're ïnharĩ za'ra wa'aba mo: “Re ïhâimana u'âsi mono nhimiroti na Mozési te te ïrob'ui'érézé hã wa te 're ï'madâ'â pese za'ra mono zéb zarina, te te sima wa'âma 're aroti mono õ di, taha zarina wawasédé hã te te oto wa'âma 're ab'madâ'â tō mono da, taha zarina te te 're wa'awěsâmri mono da. Tinhimizawi pese zéb zarina si, ma tô te te 're wa'awěsâmri, wawasété na 're wahâimana za'ra mono nherě, wa'âma 're pě'ězé za'ra mono wa. Taha wa, wa za wawasédé hã duré apâ wa te 're 'manharĩ u'âsi za'ra õne u'â, 'Re ïhâimana u'âsi mono hã dawasété nherě, simizawi pese wa.” Æne na asima 're rosa'rata za'ra wa'aba mono õ di za. Tô'ã. ¹⁶ A norĩ wa'wa hã dama 're romhuri za'ra wa'aba mono da, aihâiba hã dama 're sômri za'ra wa'aba mono wamhã, taha nhimiwada'uri na si, te za tô 're aihâimana za'ra wa'aba mo. Æne hã aima waihu'u pese za'ra wa'aba di. Tane, aihâiba hã aiwasété ma, 're sômri za'ra wa'aba mono wamhã, te za tô âma 're asiwasété za'ra wa'aba mo. Taha zarina te za atâ'â u'âsi ne, 're aihâimana za'ra wa'aba mo, aipě'ě 're, 'Re ïhâimana u'âsi mono nhiti. Tane nherě, 'Re ïhâimana u'âsi mono ma, aihâiba hã 're sômri za'ra wa'aba mono wamhã, taha nhimiwada'uri na si te za 're aihâimana za'ra wa'aba mo. Tawapsi te za oto te te 're aiwěsâmri za'ra wa'wa. ¹⁷ Aiwasété na si, ma tô aré 're aihâimana u'âsi za'ra wa'aba mo,

're sahâri waihu'u za'ra wa'aba mono âna. Tane nherê, âne 're aihâimana za'ra wa'aba mono ô di oto. 'Re îhâimana u'âsi mono te te aima 're îroti za'ra wa'aba mono zép si, te oto 're î'madâ'â pese za'ra wa'aba mo. Taha wa, 'Re îhâimana u'âsi mono âma si, wa za 're wawata za'ra. ¹⁸ 'Re îhâimana u'âsi mono hã tinhiptetezé hã ma tô te te aima 're sômri za'ra wa'wa, aiwasété âna oto âma 're anomro aba mono da. Ma tô duré aima si'apito za'ra wa'wa, aiwê na si oto tãma 're aihâimana za'ra wa'aba mono da. ¹⁹ 'Re îdahâimana za'ra mono zém na, wa tô aima âma romnhimiré'é za'ra wa'wa, ãnhimirowasu'u na hã asi'uihâ na sada asimirosa'rata nhiptete waihu'u za'ra wa'aba ô wa. Aihâiba hã aiwasété ma, ma tô 're îsômri za'ra wa'aba mo aré, taha na si 're aihâimana za'ra wa'aba mono da, aihâiba na asina 're aiwasété za'ra wa'aba mono da. Tane nherê, aihâiba hã 'Re îhâimana u'âsi mono ma si, te za oto 're îsômri za'ra wa'aba mo, taha nhimiroti na si oto 're aihâimana za'ra wa'aba mono da, aihâimana wê uptabi na.

²⁰ Aiwasédé hã 're sahâri waihu'u za'ra wa'aba mono âna, 're aihâimana za'ra wa'aba mono ré, 'Re îhâimana u'âsi mono te te aima 're îroti za'ra wa'aba mono zéb zarina 're aihâimana za'ra wa'aba mono ô di aré. ²¹ Aiwasété na si 're aihâimana za'ra wa'aba mono ré, e marĩ ma tô aima 're hâimana za'ra wa'wa, 're î'manharĩ za'ra wa'aba mono zé wa'rãmimhã, âma aima 're îrowê za'ra wa'aba mono zéb da hã. Robaba di. Taha na asimi'manharĩ wasété za'ra wa'aba zém na âma 're aséb za'ra wa'aba mono di oto. Âne si, da te 're 'manharĩ u'âsi za'ra mono wamhã, dapê'ê 're, dadâ'â u'âsi ne, te za tô 're dahâimana za'ra. ²² Tane nherê, 'Re îhâimana u'âsi mono hã tinhiptetezé hã ma

tô te te aima 're sômri za'ra wa'wa oto, aiwasété ãna ãma 're anomro aba mono da oto. Ma tô duré aima si'apito za'ra wa'wa, taha ma si oto 're romhuri za'ra wa'aba mono da. Taha wa, ma tô, tiwi 're asisawi za'ra wa'aba mono ãna, aihâiba hã tâma 're ãsômri za'ra wa'aba mo. Taha wa'rãmi te za rowẽ uptabi na ãrata 're aihâimana u'âsi za'ra wa'aba mono zé hã te te aima 're apisutu 'wa oto. ²³ Dawasété na si 're ãdanomro mono zé wa'rãmi, te za dadâ'â u'âsi ne 're dahâimana za'ra dapẽ'ê 're, 'Re ãhâimana u'âsi mono nhiti. Wanhîb'apito Cristu Zezusihi ãma si 're danomro mono wapsi, te za 'Re ãhâimana u'âsi mono hã sôpru wa, te te dama 're apisutu, ãrata 're ãdahâimana u'âsi za'ra mono zéb da hã, asa tâma 're ãdasiwa'âbâ za'ra mono zéb zô, sina 're simnhasi mono ãna.

7

Ïmro'õ norĩ mrozém na rowasu'u na ãsimiré

¹ ãsisânawã norĩ, 'Re ãhâimana u'âsi mono nhimiroti 'rata na rob'ui'ééré hã aima waihu'u pese za'ra wa'aba di. Taha wa, ãhãna ãnhimi'ui'ééré na te aima ãrowasu'u za'ra wa'aba zé hã, aima waihu'u pese za'ra wa'aba di za duré. Ni'wa hã ti'ai ãma 're hâimana mono ré, te za 'Re ãhâimana u'âsi mono nhimiroti hã pire na tâma 're hâimana, ti'ab ré 're ãdanomro mono zém na roti hã. Tane nherẽ, dâ'â wamhã oto, tâma 're hâimana mono õ di za oto, ãsarina 're ãhâimana mono zéb da hã. E marĩ wa. Tô oto dâ'â wa. ² ãne na wa za aima romnhimiréé za'ra wa'wa. Pi'õ norĩ hã ãmro hã tiwi 're dâ'â za'ra mono õ ré, 'Re ãhâimana u'âsi mono nhimiroti 'madâ'â sina, te te 're rême waihu'u za'ra mono õ di za. ãmro tiwi 're dâ'â za'ra mono wapsi, te za oto

're mro za'ra, 'Re ãhâimana u'âsi mono nhimiroti zarina, aimawi aibâ na, pi'õi wi ãmro 're dâ'â za'ra mono wa, timro na te te 're sahu tõi za'ra mono da, te te ãma roti õ wa, 'Re ãhâimana u'âsi mono hã. ³Tane nherẽ, pi'õ norĩ hã ãmro hã tiwi 're dâ'â za'ra mono õ nherẽ, aibâ aimawi ré 're hâimana za'ra mono wamhã, 'Re ãhâimana u'âsi mono nhimiroti zarina 're hâimana za'ra mono õ wa, te za ipo're'õ hã da te ãma 're sa'ra, pi'õ norĩ ãma hã, tihãiba na tiwasédé te te 're 'manharĩ za'ra mono wa. ãmro tiwi 're dâ'â za'ra mono wapsi, te za oto 're mro za'ra, aibâ aimawi na. Tawapsi tihãiba na tiwasédé hã te te 're 'manharĩ za'ra mono õ di za, apã 're mro za'ra mono wa. ãne hã aima waihu'u pese za'ra wa'aba di. ⁴ ãsisãnawã norĩ, tane duré, a norĩ wa'wa hã. Cristu hã wedepo'o nhonhi'rãmi na asada dâ'â za'ra wa'aba wa, ma tõi ãsiré 're atã'ã za'ra wa'aba mo. Taha wa, 'Re ãhâimana u'âsi mono nhimiroti 'rata na rob'ui'ééré hã asina tãma ãma 're ã'uwaimrami za'ra wa'aba mono zéb zarina, aiwasédé hã te te oto ai'ãma 're ab'madã'ã aba mono tõi da, 're asi'madã'ã za'ra wa'aba mono õ di za. Tãibã oto. 'Re ãhâimana u'âsi mono te te ãhãiwa'utu nhib'a'uwẽ si, wa oto 're wanomro, taha ma si, wa te oto 're romhuri za'ra mono da, ãwẽ na si. Pi'õi wi, ãmro tiwi 're dâ'â za'ra mono wamhã, ãsimiroti hã te te 're wapari za'ra mono õ di za oto. 'Re mro zahu za'ra mono wapsi, te za duré timro tém nhimiroti hã te te 're 'madã'ã pese za'ra. Tane hã 'Re ãhâimana u'âsi mono nhimiroti 'rata na rob'ui'ééré hã asina tãma ãma 're ã'uwaimrami za'ra wa'aba mono zéb zarina, 'Re ãhâimana u'âsi mono, aiwasédé hã te te oto ai'ãma 're ab'madã'ã aba mono tõi da, 're asi'madã'ã za'ra wa'aba mono õ di za oto, pi'õi wi ãmro 're dâ'â za'ra mono wa,

Īsimiroti te te oto 're ĩ'madâ'â za'ra mono õ ne hã. Tãibã oto. Cristuhu ãma si, te za oto 're anomro aba mo, pi'õ hã apã 're ĩmro zahu za'ra mono norĩ, timro tém nhimiroti te te 're ĩwapari pese za'ra mono ne. ⁵ Wahâimana wasété na 're wahâimana za'ra mono ré, wa tô marĩ ĩwasété zô si, wa te 're rob'ruiwapari za'ra aré. Taha ré, 'Re ĩhâimana u'âsi mono nhimiroti 'rata na rob'ui'érezé hã, wawasété ãna 're ĩwanomro mono zé waihu'uzéb da, wama 're hâimana za'ra mono nherẽ, duré wama waihu'u pese za'ra nherẽ, taha upana si, wa tô marĩ ĩwasété zô si, wa te 're rob'ruiwapari za'ra, tô õhõ zô si, 'Re ĩhâimana u'âsi mono te te wawi 're ĩ'azawi mono zô si. Taha zarina wa tô aré wapẽ'ẽ 're, wadâ'â u'âsi ne 're wahâimana za'ra, 'Re ĩhâimana u'âsi mono nhiti. ⁶ Tane nherẽ, 'Re ĩhâimana u'âsi mono hã ma tô te te wama 're apisutu oto, ĩsimiroti na rob'ui'ére 'rada hã wa te wasina tãma ãma 're ĩ'uwaimrami za'ra mono zéb zarina, wawasédé hã te te wa'ãma 're ĩ'ab'madâ'â mono zéb da, 're wasi'madâ'â za'ra mono tõ da oto. ĩsimiroti na rob'ui'ére 'rada hã wa te wasina tãma ãma 're ĩ'uwaimrami za'ra mono zéb zarina, te te 're ĩwa'anho'reptui mono zéb zô, 're wanhopré mono sina, wa te oto tãma 're romhuri za'ra mono õ di, 're ĩwahâimana 'rata za'ra mono zém na hã. ĩpẽ'ẽzani hã te te wama 're ĩ'aroti mono zéb zarina si, wa oto wa te tãma 're romhuri za'ra, wahâimanazép tém na si.

'Re ĩhâimana u'âsi mono nhimiroti, da te oto ĩwaihu'u za'ra zéb zarina, dawasété na 're ĩdasiwaihu'u za'ra mono zé wasu'u

⁷ Tawamhã e 'Re ĩhâimana u'âsi mono nhimiroti 'rata na rob'ui'ére hã wasété di, Mozési te te ãma ĩrob'ui'ére na hã. Mare di. Wasété õ di. ãhã

wasu'u hawi, wa tô wa hã ïwasété na ïsiwaihu'u, 'râwi. ãne, 'Re ïhâimana u'âsi mono nhimiroti 'rata wasu'u hã: “Marĩ ïwẽ hã dawĩ 're 'ruiwapari za'ra wa'aba mono õ di za.” ãne hã te waihu'u õ 'wa'âhã, aré ïwasété na ïsiwaihu'u õ di, marĩ te ïsima ï'ruiwaparizém na hã. ⁸ ãhã wasu'u na te oto waihu'u wamhã, marĩ hã te dawĩ 're ï'ruiwapari mono zéb da si, wa tô te ïsima 're rosa'rata u'âsi, 're ïhâimana wasété mono zéb zarina. 'Re ïhâimana u'âsi mono nhimiroti 'rata na rob'ui'ééré hã dama waihu'u za'ra õ wa, dawasété na 're dasisãmri waihu'u za'ra mono õ di. Wa hã bété. 'Re ïhâimana u'âsi mono nhimiroti 'rata wasu'uzéb zarina si, wa tô ïsiwaihu'u, ïwasété na hã. ⁹⁻¹⁰ Duréihã 'Re ïhâimana u'âsi mono nhimiroti 'rata na rowasu'u hã te waihu'u õ nherẽ, wa tô aré ïsi'ãma rosa'rata na te 're upa. ïwasété na 're ïsi'madâ'â mono ãna, wa tô 're ïhâimana. Tane nherẽ, ïsimiroti 'rata na rob'ui'ééré wasu'u hã te oto waihu'u wamhã, ãne na te oto ïsi'ãma 're rosa'rata mono õ di. 'Re ïhâimana u'âsi mono ma, ïwasété na aré 're ïhâimana mono zém na hã wa tô ïsi'ãma waihu'u. ïdâ'â u'âsi, wa tô aré 're ïhâimana, ïpẽ'ẽ 're. 'Re ïhâimana u'âsi mono hã ma tô tinhimiroti 'rata na rob'ui'ééré hã wama sômri za'ra, wa te wasina tãma 're ï'uwaimrami za'ra mono zéb zarina, rowẽ uptabi na ãma 're wanomro wẽ mono da. Tane nherẽ, te ïsina tãma uwaimrami õ di, wa hã. Taha wa, wa tô aré ïdâ'â u'âsi 're ïhâimana u'âsi, 'Re ïhâimana u'âsi mono nhiti. ¹¹ 'Re ïhâimana u'âsi mono nhimiroti 'rata si te 're ï'madâ'â pese mono na, ïwasédé hã te te oto ï'ãma 're 'madâ'â tã mono da, te te sima ï'ãma roti da newa, wa tô aré ïnhimiza'rese ãna 're ïhâimana. Taha zarina, wa tô aré ïpẽ'ẽ 're, ïdâ'â u'âsi 're

ĩhâimana, 'Re ĩhâimana u'âsi mono nhiti.

¹² Tane nherẽ, ĩsimiroti 'rata na Mozési te te ĩrob'ui'ééré hã wẽ uptabi di. ĩsarina si te wama 're hâimana, ĩwẽ uptabi si. ¹³ E tawamhã, 'Re ĩhâimana u'âsi mono nhimiroti 'rata na rob'ui'ééré hã wẽ uptabi nherẽ, e taha zarina, wa tô aré ĩpê'ẽ 're, ĩdâ'â u'âsi 're ĩhâimana. Mare di. ĩwasété na 're ĩhâimana 'rata mono zéb zarina si, wa tô aré ĩdâ'â u'âsi 're ĩhâimana. Taha zarina, wa tô 're ĩhâimana wasété mono zém na ĩsina waihu'u. Uburé marĩ ĩwasédé hã da te 're ĩmanharĩ za'ra mono zé hã ĩwasété uptabi na wa tô duré waihu'u.

Paru hã 'râwi tinhimirosa'rata wasété na ĩsi'wapézé wasu'u

¹⁴ 'Re ĩhâimana u'âsi mono nhimiroti 'rata na Mozési te te ãma ĩrob'ui'ééré hã e ma hawimhã. ĩpê'ẽzani hawip si. Tane nherẽ, ta hawimhã, wa hã 're ĩhâimana mono õ di. A'uwẽ hâiba na 're ĩmorĩ wa, wa ĩhâimana nhib'uware na 're ĩhâimana, ĩsi'uihã na ĩsina ĩnhiptete waihu'u õ na hã. 'Re ĩhâimana wasété mono zé ma si, wa ĩhâiba hã te 're sômri u'âsi. ¹⁵ ĩnhimiza'rese ãna, wa duré 're ĩhâimana, ĩwasédé hã te 're ĩmanharĩ mono zém na, te ĩsina waihu'u õ wa, 'râwimhã. Uburé marĩ ĩwẽ si te 're ab'madâ'â mono da nherẽ, taha si te 're 'madâ'â mono õ di. Uburé marĩ hã te 're ab'manharĩ tã mono da, te ĩsiwi 're awẽ'õ mono nherẽ, wa tô te te 're ab'manharĩ tã, ĩwẽ upana. ¹⁶ Uburé marĩ hã te 're ab'manharĩ tã mono da, te ĩsiwi 're awẽ'õ mono nherẽ, ĩwẽ upana te 're ab'manharĩ mono wamhã, wa ĩsina waihu'u, 'Re ĩhâimana u'âsi mono nhimiroti 'rata na rob'ui'ééré, ĩwẽ si 're ĩhâimana mono na hã, ĩsarina si. ¹⁷ Uburé marĩ ĩwasédé hã te 're ab'manharĩ mono da, te

ĩsima 're awẽ mono õ nherẽ, ĩwasédé há ĩpẽ'ẽ 're, ĩma 're ĩhâimana mono zéb zarina, wa te te 're ab'manharĩ u'âsi tô, te ĩsiwi 're wẽ'õ waihu'u mono ãna. ¹⁸ Marĩ ĩwẽ há ĩpẽ'ẽ 'remhá ĩma 're hâimana mono õ di. Āne há ĩma waihu'u pese di. Uburé marĩ ĩwẽ si te 're ab'manharĩ mono da, te ĩsima 're awẽ mono nherẽ, te ĩsina 're uwaimrami waihu'u mono õ di, ĩsi'uihâ na há. ¹⁹ Uburé marĩ ĩwẽ si te 're ab'madâ'â mono da nherẽ, taha si te 're 'madâ'â mono õ di. Taha upana, wa ĩwasété si te 're ab'manharĩ, ãne há te 're ab'manharĩ tõ mono da, te ĩsiwi 're awẽ'õ mono nherẽ. ²⁰ Uburé marĩ ĩwasédé há te ĩsima 're awẽ'õ mono nherẽ, te 're ab'manharĩ mono wamhá, e ĩsi'uihâ na te ĩsima ĩwězéb zarina, wa te te 're ab'manharĩ. Mare di. ĩwasédé há ĩpẽ'ẽ 're, ĩma 're ĩhâimana u'âsi mono zéb zarina si, wa te te 're ab'manharĩ.

²¹ Āne há wa tô uburé ĩsina waihu'u, 're ĩhâimana mono zém na há. Marĩ ĩwẽ si te 're ab'manharĩ u'âsi mono da, te ĩsima 're wẽ mono nherẽ, wa ĩ'upana marĩ ĩwasété zô si 're ĩsipizari, te ĩsiwi 're awẽ'õ waihu'u mono ãna. ²² Wá há 'Re ĩhâimana u'âsi mono nhimiroti wẽ wasu'u na há 'râwi wa tô te ĩsima 're wẽ u'âsi, ĩpẽ'ẽ 'remhá. ²³ Tane nherẽ, aimawi 're ĩhâimana mono zéb da há, te ĩma 're hâimana u'âsi, ĩpẽ'ẽ 'remhá, ĩnhimirosa'rata wasédé há. ĩpẽ'ẽ 'remhá ĩnhimirosa'rata wasédé há duré ĩnhimirosa'rata wẽ há te 'râwi nherẽ, 're si'wapé u'âsi zahuré, ĩwasédé há te 're ĩ'manharĩ mono zéb da há, duré te ĩsima 're ĩwẽ mono zéb zarina, ĩwẽ há te 're ĩ'manharĩ mono zéb da há. Nĩ'wam norĩ há danhimiwada'uri zarina si 're hâimana za'ra mono wamhá, marĩ há te te sima 're ĩwẽ za'ra mono zéb zarina, te te 're 'manharĩ

waihu'u za'ra mono õ di. Tane duré, wa hã marĩ ïwē si te 're ab'manharĩ u'âsi mono da, te ïsima 're wē mono nherē, marĩ ïwasédé hã ïpē'ē 'remhã ïma 're ïhâimana mono zarina, wa marĩ ïwasédé hã te 're ab'manharĩ tô. ²⁴⁻²⁵ Wa hã ïwasété u'âsi 're ïhâimana mono zém na, 'râwi 're ïsipo're pu'u mono wa, wa 're ïsiwē'õ u'âsi. 'Re ïhâimana u'âsi mono nhimiroti zarina si 're ïhâimana u'âsi mono da, te ïsima 're rosa'rata wē u'âsi mono nherē aré, tane nherē, ïpē'ē 're, ïwasédé hã ïma 're ïhâimana u'âsi mono zéb zarina si, wa 're ïhâimana u'âsi tô. E 'wa hã te za ãne wamhã, ïnho'reptu, ïpē'ē 're, ïdâ'â u'âsi 're ïhâimana mono zém hawimhã. 'Re ïhâimana u'âsi mono si te za ïnho'reptu, ïdâ'â u'âsi 're ïhâimana mono zém hawi, Wanhib'apito Zezu Cristuhu nhimipawaptobzéb zarina hã. Taha wa, wa oto taha ãma si 're ïwata u'âsi.

8

'Re ïhâimana u'âsi mono pē'ēzani te te dama 're ïawē mono zéb zarina si, 're ïdanomro wē mono zé wasu'u

¹ Taha wa, Cristu Zezusihi ãma 're ïnomro mono norĩ hã, 'Re ïhâimana u'âsi mono te te siwi 're awē'õ mono õ di za oto. Taha zarina, te te hã za'ra õ di za. ² 'Re ïhâimana u'âsi mono pē'ēzani hã ma tô te te 're wa'apisutu, Cristu Zezusihi ãma si 're wanomro wē u'âsi mono da. Taha zarina, ma tô ïwasété u'âsi 're ïhâimana mono nherē, ïnho'reptu, ïpē'ē 're, ïdâ'â u'âsi aré 're ïhâimana mono zém hawi. Tiwaihu'u pese na ma tô ãne hawi ïnho'reptu. ³ 'Re ïhâimana u'âsi mono nhimiroti 'rata na Mozési te te ïrob'ui'érezé hã wa te 're ï'madâ'â pese za'ra mono zéb zarina, te te sima wa'ãma 're aroti mono õ

di za 'Re ãhâimana u'âsi mono hã, wawasédé hã te te oto wa'ãma 're ab'madâ'â tã mono da, taha zarina te te oto 're wa'awêsãmri mono da. E marĩ wa. Wawasété u'âsi wahâimanazém hawi, wanhib'uware na 're wanomro u'âsi mono wa. Taha wa, wa te wasina 're uwaimrami waihu'u za'ra mono õ di, 'Re ãhâimana u'âsi mono nhimiroti 'rata na rob'ui'ééré hã. Wawasété si, wa te 're ã'manharĩ za'ra mono zé hã ma tã te te siwi 're awê'õ pese, 'Re ãhâimana u'âsi mono hã. Taha wa, ma tã ti'ra hã we satõ ti'ai u, da'upana dazada dâ'â da, dawasété u'âsi 're ãdahâimana za'ra mono zém hawi, te te 're da'anho'reptui mono da. Ti'ai ãma dahâiba na ma tã 're mo, Cristu hã. Tane nherê, dasine ti'ai ãma hã tiwasédé hã te te 're ab'manharĩ mono õ di, tihâiba na hã. ⁴ ãne ma tã 'Re ãhâimana u'âsi mono hã 'manha, ãsimiroti na rob'ui'ééré hã wa te wasina 're ãuwaimrami za'ra mono zéb da hã, ãpê'êzani, wa te 're ã'madâ'â pese za'ra mono zéb zarina, wapê'ê 're wanhimirosa'rata wasété na 're wahâimana za'ra mono õ wamhã. ⁵ Ni'wam norĩ hã 're ãhâimana wasété za'ra mono ma si, tihâiba te te 're ãsõmri u'âsi za'ra mono norĩ hã ta norĩ hã te siwa'ru 'ráwi te te sima 're ãwê za'ra mono zéb zarina si, te te 're rosa'rata wasété u'âsi za'ra. Tane nherê, ni'wam norĩ hã 'Re ãhâimana u'âsi mono pê'êzani nhimiroti zarina si 're ãhâimana za'ra mono norĩ hã, ta norĩ si te te sima 're rosa'rata wê u'âsi za'ra, ãpê'êzani te te tãma 're ãwê za'ra mono zéb zarina si. ⁶ Ni'wam norĩ hã tihâimana wasété ma si, tihâiba te te 're sõmri u'âsi za'ra mono wamhã, ta norĩ hã te za tipê'ê 're, dâ'â u'âsi 're hâimana za'ra, 'Re ãhâimana u'âsi mono nhiti. Tane nherê, ni'wam norĩ hã 'Re ãhâimana u'âsi mono pê'êzani te te tãma 're ãwê za'ra mono zéb zarina si, 're hâimana wê

za'ra mono wamhã, ta norĩ si te za 'Re ãhãimana u'ãsi mono 'rata 're hãimana u'ãsi za'ra, robzei u'ãsi na. ⁷ Ni'wam norĩ hã siwa'ru 'rãwi te te sima 're ãwẽ za'ra mono zẽb zarina si, te te 're rosa'rata waseté u'ãsi za'ra mono wamhã, ta norĩ hã te za 'Re ãhãimana u'ãsi mono nhitob'ru 're hãimana za'ra. Ta norĩ hã 'Re ãhãimana u'ãsi mono nhimiroti te te 're 'madã'ã za'ra mono õ di. Te te 're 'madã'ã waihu'u za'ra mono õ di, tõ. ⁸ Ni'wam norĩ hã tihãimana wasété ma, tihãiba te te 're sãmri u'ãsi za'ra mono wamhã, ta norĩ ma, 'Re ãhãimana u'ãsi mono hã tãma 're toi waihu'u za'ra mono õ di za.

⁹ Tane nherẽ, a norĩ wa'wa hã aipẽ'ẽ 're, aiwasédé hã aima 're ãhãimana za'ra wa'aba mono zẽb zarina, 're anomro aba mono õ di oto. 'Re ãhãimana u'ãsi mono pẽ'ẽzani te te aima 're ãpisutu za'ra wa'aba mono zẽb zarina si, te oto 're aihãimana wẽ za'ra wa'aba mo, ãpẽ'ẽzani hã sena na aipẽ'ẽ 're, 're sãmra za'ra wa'aba mono wamhã. Ni'wam norĩ ma, ãpẽ'ẽzani, ãpẽ'ẽ 're, tãma 're hãimana za'ra mono õ wamhã, ta norĩ hã Cristuhu nhib'a'uwẽ 're hãimana za'ra mono õ di. ¹⁰ A norĩ wa'wa hã Cristu, aipẽ'ẽ 're, aima 're hãimana za'ra wa'aba mono nherẽ, niwamhã te za aihãiba za'ra wa'wa hã aiwi 're si'utõrĩ za'ra wa'wa, aiwasédé hã aima 're hãimana za'ra wa'aba mono wa. Tane nherẽ, 'Re ãhãimana u'ãsi mono te te 're ãaiwẽsãmri za'ra wa'aba mono zẽb zarina si, te za ãpẽ'ẽzani hã te te 're aipisutu za'ra wa'wa, ãrata 're asimroi u'ãsi aba mono da. ¹¹ 'Re ãhãimana u'ãsi mono hã Zezusihi hãiwa'utu'wa hã, ãpẽ'ẽzani te aipẽ'ẽ 're, 're sãmra za'ra wa'wa. Tõ õ hã Cristu te te ãhãiwa'udu hã te za aihãiba hã niwamhã aiwi 're si'utõrĩ pese za'ra wa'aba mono nherẽ, te te 're aihãiwa'utu za'ra wa'wa, ãpẽ'ẽzani hã aipẽ'ẽ 're, 're

ĩsãmra za'ra wa'aba mono zéb zarina.

12 Īsisãnawã norĩ, taha wa, wapẽ'ẽ 'remhã wanhimirosa'rata wasété na 're ĩwahâimana za'ra mono zé hã, mare di za oto. 13 Aipẽ'ẽ 'remhã asimirosa'rata wasété na 're aihâimana za'ra wa'aba mono wamhã, te za atâ'â u'âsi ne 're anomro aba mo, 'Re ĩhâimana u'âsi mono nhiti. 'Re ĩhâimana u'âsi mono pẽ'ẽzani nhimipawaptobzém na, uburé aiwasédé 're ĩ'manharĩ za'ra wa'aba mono zé hã asiwi 're uprosi pese za'ra wa'aba mono wapsi, te za 're aihâimana u'âsi za'ra wa'aba mo, 'Re ĩhâimana u'âsi mono 'rata. 14 Uburé 'Re ĩhâimana u'âsi mono pẽ'ẽzani 'madâ'â sina 're ĩhâimana za'ra mono norĩ si, te 'Re ĩhâimana u'âsi mono 'ra, 're nomro, Ĩpẽ'ẽzani te te 're ĩsimroi wẽ mono norĩ hã. 15 E marĩ da, ma tô 'Re ĩhâimana u'âsi mono hã Tipẽ'ẽzani te te aima 're sômri za'ra wa'wa. E ĩsimirob'manharĩzé ma, 're aipahi za'ra wa'aba mono sina, tãma 're romhuri za'ra wa'aba mono da, ma tô te te aima 're sômri za'ra wa'wa. Mare di. Taha dai õ di. 'Re ĩhâimana u'âsi mono hã ai'ãma 're 'ra za'ra wa'aba mono da si, ma tô te te aima 're sômri za'ra wa'wa, Tipẽ'ẽzani hã. Taha nhimipawaptobzéb zarina, wa 'Re ĩhâimana u'âsi mono hã wa te 're 'mahârâ za'ra, âne: “Wamama, Wamama.” Âne wa te 're ĩ'mahârâ za'ra mono zé hã. 16 Wa norĩ hã 'rãwi wapẽ'ẽ 're, wa tô wa te wasina 're waihu'u pese za'ra, 'Re ĩhâimana u'âsi mono 'ra oto 're ĩwahâimana za'ra mono na. Duré Ĩpẽ'ẽzani hã te te wama 're ĩ'awaihu'u mono zéb zarina zama, wa tô 'rãwi wa te wasina 're waihu'u za'ra, ĩ'ra oto 're ĩwahâimana za'ra mono na. 17 'Re ĩhâimana u'âsi mono 'ra, oto 're wanomro mono wa, marĩ ĩwẽ na tinhib'a'uwẽ ma, 're ĩsõpru mono

zéb da, te te tãma 're ãropisutu za'ra mono zéb ré, wa za 're wahâimana za'ra. Duré uburé marĩ ãwẽ na Cristuhu ma, ãsõprubzéb da, te te tãma ãropisutuzéb ré, wa za ãsiré 're wahâimana za'ra. Zezusihi ne, wa te 're robzépata za'ra mono wamhã, wa za ãsine rowẽ uptabi na 're wahâimana za'ra.

'Re ãhâimana u'âsi mono, tizazei'wa norĩ ma, za ãwẽ te te tãma 're ã'apisutu mono zé wasu'u

¹⁸ Ti'ab ré, wa te 're ãrobzépata za'ra mono zé hã, taré, 'Re ãhâimana u'âsi mono, za ãwẽ hã te te wama 're ã'apisutu mono zé ma hã. Tô sena, wa tô ãne na waihu'u, wa hã. ¹⁹ 'Re ãhâimana u'âsi mono hã uburé te te ã'apoto mono hã, simisutu te umnhasi sina sô 're simipari za'ra, bâdã ãwa ãwaptã'ãzéb zô, uburé ti'ra na sô'awi za te te oto dama ãwasu'u hãiré za'ra zô. ²⁰⁻²¹ 'Re ãhâimana u'âsi mono, marĩ te te ã'apoto mono hã te wasété na 're hâimana za'ra, a'ã. Tinhimipoto mono bâ, niha tãma 're ãhâimana za'ra mono zéb da, te te tãma 're apisutu mono nherẽ, te te sina tãma ãma 're uwaimrami za'ra mono õ di. Siwa'ru te a'ã 're hâimana za'ra, siwamnarĩ na. Tane nherẽ, ãne na si'uihã na 're hâimana za'ra mono õ di. 'Re ãhâimana u'âsi mono si, ma tô tãma pisutu za'ra, siwa'ru a'ã 're hâimana za'ra mono da. Niwapsi uburé marĩ te te ã'apoto mono hã wasété u'âsi 're ãhâimana za'ra mono hawi, te za anho'reptu. Taha zô, wa sô 're wanhimipari u'âsi za'ra, siwamnarĩ ãna oto 're hâimana za'ra mono da. Tawamhã wasine, robzei u'âsi te za oto 're hâimana za'ra, 'Re ãhâimana u'âsi mono 'ra, oto 're wanomro mono wa, rowẽ u'âsi 're ãwahâimana za'ra mono ne. ²² Pi'õi ãma, ãwasã 're sépu'u za'ra mono wamhã, te za 're wab'ëtẽ za'ra, 're séptã'ã za'ra mono hã. Tane te za duré uburé marĩ hã

'Re ãhâimana u'âsi mono te te ã'apoto mono hã a'â 're wab'êtê za'ra, ti'ab ré, wasété na 're ãhâimana za'ra mono zém hawi 're wairébé mono hã. ãne hã wama waihu'u pese za'ra di oto. ²³Tane nherê, uburé ropodo hã ta norĩ si 're wab'êtê za'ra mono õ di. Wa norĩ zama, wa 're wawab'êtê u'âsi za'ra, 'Re ãhâimana u'âsi mono hã tinhoprubzéb zarina, ãmorĩ'rata na Tipê'êzani, te te wama 're anhomri mono wa, wapê'ê 're, 're ãsãmra u'âsi mono da hã. 'Rãwi wapê'ê na, wa 're wawab'êtê u'âsi za'ra, 'Re ãhâimana u'âsi mono hã uburé ti'ra na sõ'awi za te te oto dama ãwawasu'u hãi'rê za'ra zéb zô, 're wanhimipari za'ra mono ré. Duré ti'ab ré, wanhib'uware na wahâimana wasété na 're ãwahâimana za'ra mono zém hawi, za te te 're ãwa'awaibui mono zéb zô, 're wanhimipari za'ra mono ré, wa 're wawab'êtê u'âsi za'ra. ²⁴⁻²⁵'Re ãhâimana u'âsi mono, ãwê si za te te wama 're ã'apisutu mono zéb zô, wa te 're wawã za'ra mono ãna, sõ 're ãwanhimipari za'ra mono zéb zarina, ma tô te te 're wa'anho'reptu. Ti'ab ré, marĩ zô 're wanhimipari za'ra mono ré, wa te oto 're 'madã'ã za'ra mono wamhã, e wa za õne u'âsi sõ 're wanhimipari za'ra. Mare di. Tãibã oto, sõ 're ãwanhimipari za'ra mono zé hã za. Marĩ zô 're ãwanhimipari za'ra mono zé hã, zahadu wa te 're 'madã'ã za'ra mono õ ré si, wa za tô wanhiptete sina sõ 're wanhimipari u'âsi za'ra, wa te 're sazei utõrĩ za'ra mono ãna.

²⁶Tane duré 'Re ãhâimana u'âsi mono, ãwê hã za te te wama 're ã'apisutu mono zéb zô, wasina sõ 're wanhimipari wa'a za'ra mono wamhã, ãpê'êzani si te za te te 're wa'apawapto, sõ 're wanhimipari wa'a za'ra mono tã da. Duré, wa norĩ hã niha 'Re ãhâimana u'âsi mono ma, wasi'ãma 're

ĩwamreme zusi mono zéb da hã, wa te wasina tãma
 ãma 're uwaimrami waihu'u za'ra mono dai õ
 nherẽ, te za ĩpẽ'ẽzani si wa'ãma 're mreme u'ãsi,
 'Re ĩhãimana u'ãsi mono ma, wahãiba mono bâ,
 wa'ãma 're pẽ'ẽzé uptabi mono sina. Wasi'uihã
 na ĩwẽ hã wa te tiwi 're ĩwaptẽrẽ za'ra mono zém
 na, wa te tãma ãma 're uwaimrami waihu'u za'ra
 mono dai õ nherẽ, te õhõ si wa'ãma 're mreme
 u'ãsi, te te 're wa'apawapto mono da, ĩpẽ'ẽzani hã.
 27 'Re ĩhãimana u'ãsi mono hã dapẽ'ẽ 're, uburé
 danhimirosa'rada hã tãma waihu'u pese di. Taha
 wa, ĩpẽ'ẽzani nhimirosa'rada hã tãma waihu'u pese
 di duré. 'Re ĩhãimana u'ãsi mono te te tãma 're ĩ'awẽ
 mono zéb uwaibaba si, te ĩpẽ'ẽzani hã ĩsib'a'uwẽ
 norĩ ãma 're mreme u'ãsi. 28 'Re ĩhãimana u'ãsi
 mono zawi pese 'wa norĩ da, marĩ ĩwasédé hã ahã
 na sada 're hãimana za'ra mono nherẽ, te za 'Re
 ĩhãimana u'ãsi mono hã ĩwẽ si te te tãma 're apisutu
 ĩwa'rãmi, te te sima 're ĩ'awẽ mono zéb zarina,
 tinhib'a'uwẽ da, te te sima 're ĩ'apisutu mono norĩ
 ma hã. ãne hã wama waihu'u pese za'ra di oto
 wa norĩ hã. 29 Duréihã marĩ õ ré hã, 'Re ĩhãimana
 u'ãsi mono te te sima ãma ĩrotizéb zarina, te te sima
 're ĩwa'apisutu mono norĩ hã, ĩ'ra ne, tô Zezusihi ne,
 oto 're wahãimana za'ra mono da, ma tô duré te
 te 're wa'apisutu siro. Ta hã uburé ĩsazei'wa norĩ
 dub'rada, 're hãimana mono da, ma tô ãne te te 're
 wa'apisutu siro, sima. 30 Duré 'Re ĩhãimana u'ãsi
 mono te te sima 're ĩwa'apisutu mono norĩ hã ma
 tô te te sima 're wa'awẽ, ĩtẽme 're wanomro mono
 da, wa te 're saze za'ra mono da. Tawamhã ĩtẽme
 're wanomro mono wamhã, ma tô duré te te 're
 wa'awẽsãmri, wawasédé hã te te oto wa'ãma 're
 ĩ'ab'madã'ã mono õ zarina. Ma tô duré te te wama

're apisutu siro, niwapsi ã'ra Zezusi 're ãmorĩ wẽ uptabi ne, 're wahâimana za'ra mono da oto.

Cristuhu nhimizawi pese zé hã dawĩ ãsi'utõrĩõzé wasu'u

³¹ 'Re ãhâimana u'ãsi mono hã ãne hã te te wama 're apisutu mono wamhã, e niha za tawamhã. Ta hã, wa niwĩ oto 're hâimana za'ra mono wa, e 'wa hã te za wa'ãma ai'uté. Mare di. Uburé wanhitob'ru norĩ nhiptetezé hã, tarére 'Re ãhâimana u'ãsi mono ma hã. ³² 'Re ãhâimana u'ãsi mono hã ti'ra te te wawĩ sawi za'ra õ di, wazada dá'â za'ra tõ da. Wa'udâna ma tõ wama sãmri za'ra tõ, te te wawĩ sawi ãna. E tawamhã uburé marĩ ãwẽ hã te te wama 're anhomri mono õ di za. Te te wawĩ 're azawĩ mono ãna, te za tõ te te wama 're anhomri, 'Re ãhâimana u'ãsi mono hã. ³³⁻³⁴ Wa norĩ hã 'Re ãhâimana u'ãsi mono, tinhĩb'a'uwẽ da, te te sima 're ãwa'apisutu mono norĩ si, ma tõ te te 're wa'awêsãmri, wawasédé hã te te oto wa'ãma 're ãab'madá'â mono õ zarina. E ni'wam norĩ hã wawasédé te te wa'ãma 're sa'ra mono da bâ bété. Ni'wam norĩ hã, wawasédé te te wa'ãma 're sa'ra waihu'u mono õ di za oto. ãne wa za duré aima waihu'u za'ra wa'wa. Cristu Zezusi hã ma tõ wazada dârâ, wa'upana. Apâ ma tõ duré hãiwa'udu. Taha wa, te oto Timama nhimire niwĩ 're sãmra, dama pire na. Timama ma, te duré te te 're wa'awasu'u wẽ u'ãsi, wazada ãdá'ãzéb zarina, wawasédé hã te te wa'ãma 're ab'madá'â tõ mono da oto. ãne wa, e ni'wam norĩ hã wawasété na te te wama 're nharĩ zahu za'ra mono da bâ oto. Mare di. ³⁵ Cristu hã te te 're wa'azawĩ pese uptabi. E 'wa hã te Cristuhu nhimizawi pese zém nhiti te te 're ãwa'azani mono da hã, 're hâimana. Ni'wai õ uptabi di. Tane nherẽ, ãté wa za a'â wa te 're robzépata

za'ětě za'ra. Áté marĩ ĩwasédé hã te za a'â wazô 're wairébé. Áté ĩsazei'wa 're wanomro mono wa, te za a'â da te wama 're rob'manharĩ wasété za'ra. Áté mra hã wa za a'â wa te 're sépata za'ra. Áté wanhibrob ãna, wa za a'â 're wahâimana za'ra. Áté te za duré a'â da te wama 're amhâzépa za'ra, da te 're wanhimroi mono da. Áté te za duré da te 're wanhimro. E tawamhã, ãne na wa te 're robzépata za'ra mono 'ru te, te za Cristu te te 're ĩwa'azawi pese mono zé hã, wawi 're si'utõrĩ za'ra. Mare di. Wawi 're si'utõrĩ waihu'u za'ra mono õ di za. ³⁶ Duréihã apito Dawi hã ma tô ãne na wa'ãma rob'ui'ééré siro, za wa te 're ĩrobzépata za'ra mono zém na hã:

“Wamama, 'Re ĩhâimana u'âsi mono, wa norĩ hã asib'a'uwê 're wanomro mono wa, wama romnhimimnhasi u'âsi na, wa 're wahâimana za'ra, da te 're wanhimroi mono õ'umnhasite.

Pone'ërebâi ãma 're dapě'ëzé za'ra mono ãna, dasazéb da, da te 're ĩsimroi mono ne, te da te dasima 're wawê za'ra, da te 're wanhimroi mono da, da te 're wa'ruiwapari za'ra mono wa oto.”

Ãne duréihã Dawi hã te te wa'ãma ĩrob'ui'ééré sirõmo za'ra hã, te 're hâimana, ĩbaihã na hã.

³⁷ E tawamhã, uburé marĩ ĩwasédé hã wazada 're ĩhâimana za'ra mono zéb zarina, te za Cristu te te 're ĩwa'azawi pese mono zé hã wawi 're si'utõrĩ za'ra. Mare di. Uburé marĩ na da te wama 're rob'manharĩ wasété za'ra mono da nherê, ta hã te te 're ĩwa'azawi pese mono, te za te te 're wa'apawapto, Cristuhu si, wanhitob'ru norĩ ãma wa te ãma 're ai'uté pese za'ra mono da. ³⁸ Uburé marĩ hã wazada 're ĩhâimana za'ra mono zém hawi, 'Re ĩhâimana u'âsi mono hã tinhimizawi pese zé hã

te te wawi 're ĩ'azani mono da hã, mare di. Āne na sena na, wa tō ĩsina waihu'u, wa hã. Wahâiba ré ré 're wahâimana za'ra mono wamhã, duré oto 're wadâ'â za'ra mono nherẽ, tinhimizawi pese zé te te wawi 're azani mono õ di za. Duré ĩhâiba'õ norĩ hã ĩsib'apito norĩ zama, te te wawi 're sani waihu'u za'ra mono õ di, 'Re ĩhâimana u'âsi mono te te 're ĩwa'azawi pese mono zé hã. Duré, ã bātâ na marĩ hã wazada 're hâimana za'ra mono 'ru te, te te wawi 're azani mono õ di za, tinhimizawi pese zé hã, 'Re ĩhâimana u'âsi mono hã. Duré niwamhã uburé marĩ hã za wazada 're hâimana za'ra mono 'ru te, te te wawi 're ĩ'azani mono da hã, mare di za tō. ³⁹ Uburé marĩ hã hâiwa na 're ĩsimasa mono hã duré ti'ai 'rowi 're ĩhâimana za'ra mono hã te te wawi 're sawi waihu'u za'ra mono õ di za, 'Re ĩhâimana u'âsi mono nhimizawi pese zé hã. Uburé 'Re ĩhâimana u'âsi mono te te ĩ'apoto mono hã, niwamhã te te wawi 're sani waihu'u za'ra mono õ di za tō, ĩsimizawi pese zé hã. Robaba uptabi di. Wanhíb'apito Cristu Zesusihi ãma si 're wanomro mono wa, te te 're wa'azawi pese uptabi, 'Re ĩhâimana u'âsi mono hã, õne u'âsi.

9

Izarazéhé nhihudu norĩ, 'Re ĩhâimana u'âsi mono te te sima 're ĩ'apisutu mono zé wasu'u

¹ Tō sena, wa za aima rowasu'u za'ra wa'wa. Wa hã Cristuhu te, 're ĩmorĩ wa, 're ĩzadawa nhipese mono õ di. 'Re ĩhâimana u'âsi mono pē'ēzani te te ĩma ĩwaihu'uzéb zarina, duré 'râwi ĩpē'ē na te ĩsi'ãma 're ĩrosa'rata mono zéb zarina, wa tō waihu'u, dama 're ĩzadawa nhipese mono õ na hã. ²⁻³ ĩsiré zudezu norĩ ãma hã, ãma 're ĩpē'ézé

uptabi za'ra mono di, Cristu hã te te siwi 're wẽ'õ za'ra mono wa. Taha wa, te duré ïwi 're robzei'õ pese, ïpẽ'ẽ 'remhã. Ta norĩ ãma 're ïpẽ'ẽzé uptabi za'ra mono wa, wa aré te ïsima 're rosa'rata u'âsi ïpẽ'ẽ na, 'Re ïhâimana u'âsi mono ma, ïsipisutu da, ï'upana za'ra te te 're ïwẽ'õ mono da, duré Cristuhu nhiti, ï'upana 're ïhâimana u'âsi za'ra mono da. ãne hã 'Re ïhâimana u'âsi mono hã te te ïma 'manharĩ dai õ nherẽ, wa taré ïsiwaihu'u, ïsiré zudezu norĩ ãma 're ïpẽ'ẽzé uptabi za'ra mono zém na. ãne na, wa tô aima ïsiwasu'u za'ra wa'wa, 're ïzadawa nhipese mono õ na hã. ⁴ Ta norĩ hã 'Re ïhâimana u'âsi mono nhimipisudu, te 're hâimana za'ra. Ta norĩ ãma, ma tô 're 'ra za'ra, 'Re ïhâimana u'âsi mono hã. Ta norĩ ma si, ma tô rowa'a na aré ï'rata 're sãmra za'ra 'rãwi, ïwaihu'u pese zé hã duré ïhâimana wẽ zé hã te te waihu'u za'ra da. Simisutu siré, ãma 're hâimana u'âsi za'ra mono da, ma tô duré marĩ ïwẽ hã te te tãma 're apisutu. ïsimiroti na Mozési te te ïrob'ui'érezé hã ma tô duré tãma sômri za'ra. Ta norĩ ma, ma tô duré 're siwaihu'u za'ra, ï'uwaibaba si ãma 're ïwata za'ra mono zéb da hã. Ta norĩ ma, ma tô duré ahã na te te tãma 're aropisutu, zudezu norĩ ma, za te te tãma ãma 're ï'a'uwaimrami mono zém na hã. ⁵ Wahi'rata norĩ nhihudu uptabi, te ta norĩ hã 're hâimana za'ra, dama ïpire uptabi za'ra norĩ nhihudu. Cristu hã zudezu hãiba na, ma tô podo, ti'ai ãma. Cristu hã ta hã, 'Re ïhâimana u'âsi mono, uburé marĩ hã te te 're ï'ab'madã'ã mono. Taha ãma uburé 're wawata u'âsi za'ra wa'aba mono. Tô sena, wa ãne na aima ãma rowasu'u za'ra wa'wa.

⁶ E tawamhã, Izarazéhé nhihudu norĩ hã Cristu te te siwi 're wẽ'õ za'ra mono wa, te te tãma ãma

're a'uwaimrami mono õ di, 'Re ìhâimana u'âsi mono, te te tãma 're ìropisutu za'ra mono zém na hã. Ma tô te te tãma ãma 're a'uwaimrami, tô. Izarazéhé nhihudu norĩ hã, 'Re ìhâimana u'âsi mono nhimipisudu hã aihĩni 're hâimana za'ra mono õ di, ìsib'a'uwẽ uptabi, 're nomro mono da. ⁷ Duré Abra'ãhã nhihudu sidâpãsi ìsihudu norĩ hã, ìsihudu ahã na za 're ìhâimana za'ra mono na, 'Re ìhâimana u'âsi mono te te tãma ìropisutuzéb zarina, aihĩni uptabi, ãma 're hâimana za'ra mono õ di, 'Re ìhâimana u'âsi mono 'ra uptabi hã 're ìhâimana za'ra mono na hã. Duréihã 'Re ìhâimana u'âsi mono hã ma tô ãne na Abra'ãhã ma ropisutu, romhã ré: "Izatihi nhihudu norĩ si, te za ìnhib'a'uwẽ uptabi hã 're hâimana za'ra." ãne ma tô tãma waihu'u siro, 'Re ìhâimana u'âsi mono hã. ⁸ Taha wa, Abra'ãhã nhihudu mono norĩ hã 'Re ìhâimana u'âsi mono 'ra, aihĩni 're ìnomro mono õ na, te wasu'u ã hã, duréihã Abra'ãhã ma, 'Re ìhâimana u'âsi mono te te ìwaihu'uzém na. Abra'ã hã 'Re ìhâimana u'âsi mono nhimiropisudu hã te te ãma ìsaze ne, tane duré ìsimiropisutu na, da te 're ìsaze za'ra mono norĩ si, te za Abra'ãhã nhihudu ne oto 're dahâimana za'ra. ⁹ Duréihã 'Re ìhâimana u'âsi mono hã Abra'ãhã ma, te te ìropisutuzé hã, ãne ìsimiroti wasu'u hã: "Wahub amo na, wa za duré we atême wi, tô ã a'amo za duré ìwa ìwaptã'ázém na. Tawamhã apã we atême ìwisi õ ré, te za Saraha ma ì'ra podo, aibã na." ãne duréihã Abra'ãhã ma, 'Re ìhâimana u'âsi mono te te ìropisutuzé hã.

¹⁰ Tawamhã Saraha 'ra hã ma tô tiprédu oto, Izati hã. Ta hã wahi'rada. Prédu wamhã, ma tô timro, Rebecaha ãma. Ta hã ma tô duré ti'ra, ì'ra maparane ìsi'ubza hã, aibã zahuré hã. ¹¹⁻¹² Tane

nherẽ, ãdi'i 're, zahadu hâimana zahuré nherẽ, duré marĩ ãwẽ hã te te waihu'u zahuré õ nherẽ, zahadu marĩ ãwaséde hã te te duré waihu'u zahuré õ nherẽ, ma tô ãne 'Re ãhâimana u'ãsi mono hã tãma waihu'u siro, Rebecaha ma: “Ïdub'rada hã te za tinoi ma wapu na 're hâimana.” ãne ma tô 'Re ãhâimana u'ãsi mono hã ãno si sima pisutu, tidub'rata ma, pire na 're hâimana mono da. E marĩ hã te te 're ãmanharĩ wẽ zahuré mono zéb zarina, ma tô ãno si sima pisutu, 'Re ãhâimana u'ãsi mono hã. Mare di. Taha wab õ di. Si'uihã na te te sima ãwẽzéb uwaibaba, ma tô sima pisutu, ãno si. ¹³ ãne na hã 'Re ãhâimana u'ãsi mono zadawa wasu'u'wa hã ma tô ãmreme na rob'ui'ére, ãbaihã na hã: “Zacoho si, ãma sawi di. Eza'uhu si, wa tô ãsiwi wẽ'õ.” ãne 'Re ãhâimana u'ãsi mono, si'uihã na te te sima ãwẽzéb zarina, Zaco te te sima ãpisutuzé hã, ãdub'rata upana.

¹⁴ ãté ãne na te za asima 're ãrosa'rata za'ra wa'aba mo: “'Re ãhâimana u'ãsi mono hã te te sima ãwẽzéb zarina, ãno si te te sima ãpisutu na hã ma tô ãma upa. ã'uwaibaba õ di.” ãne na hã asima ãma 're rosa'rata za'ra wa'aba mono õ di za. ã'uwaibaba si te te dama ãma 're a'uwaimrami u'ãsi, 'Re ãhâimana u'ãsi mono hã. Te te dama ãma 're a'upai mono õ di. ¹⁵ Duréihã Mozésihi ma, ma tô ãne na siwasu'u: “Ni'wam norĩ ãma 're ãpẽ'ézé za'ra mono da, te ãsima 're wẽ za'ra mono wamhã, wa za tô ãma 're ãpẽ'ézé za'ra, ãma 're ãsiwãrĩ za'ra mono da, ta norĩ ãma hã. Duré ni'wam norĩ ãma 're ãpẽ'ézé za'ra mono da, te ãsima 're wẽ za'ra mono õ wamhã, ãma 're ãpẽ'ézé za'ra mono õ di za tô, ta norĩ ãma hã, te 're apawapto mono da.” ãne Mozésihi ma, ãsiwaihu'uzé hã, 'Re ãhâimana u'ãsi mono hã. ¹⁶ Taha wa, da te dasima 're ãwẽ za'ra mono zéb zarina,

te te 're da'apisutu mono õ di, da'ãma 're ãpẽ'êzé mono zém na hã, 'Re ãhãimana u'ãsi mono hã. Duré dasi'uihã na sô 're ãdasiwasutu za'ra mono na, te te 're da'apisutu mono õ di, da'ãma 're ãpẽ'êzé mono zém na hã. Si'uihã na te te sima 're ãda'awẽ mono zéb zarina si, te za tô da'ãma 're pẽ'êzé, da'ãma 're ãsiwãrĩ mono zéb da hã. ¹⁷ Duréihã ma tô Mozési hã ãne na ãma rob'ui'ére, 'Re ãhãimana u'ãsi mono hã apito Para'oho ma te te ãrowasu'uzém na, ãne:

“Wa hã wa tô aipisutu, dama asi'apito da. Wa tô duré nasi ai'rãnhito, asimirosa'rata nhiptete na aihãimana mono da, a'ã. Wa tô duré nasi aima rob'manharĩ wasété, ãnhimiwaihu'u pese zém na, da te 're ãwaihu'u za'ra mono da, duré daro mono bã ãnhisi na, da te 're ãwaihu'u pese za'ra mono da oto.”

Ãne duréihã apito Para'oho ma, ãsiwasu'uzém na ma tô ãbaihã na ãma rob'ui'ére, Mozési hã. ¹⁸ Taha wa, 'Re ãhãimana u'ãsi mono hã ni'wam norĩ ãma 're pẽ'êzé za'ra mono da, te te sima 're wẽ za'ra mono wamhã, te za tô ãma 're pẽ'êzé za'ra, ãma 're siwãrĩ za'ra mono da. Duré te te sima 're ãda'awẽ mono zéb uwaibaba, te za te te 're da'a'rãnhito, danhimirosa'rata wasété nhiptete na a'ã 're dahãimana za'ra mono da.

'Re ãhãimana u'ãsi mono, te te sima 're ãda'awẽ mono zéb zarina si, marĩ hã te te dama 're ã'apisutu mono zé wasu'u

¹⁹ Áté ni'wam norĩ hã ãne wa'rãmi te za te te ãma 're nharĩ za'ra, asiré 're aihãimana za'ra wa'aba mono norĩ hã. Áté ãne te za ta norĩ hã te te ãma 're nharĩ za'ra: “'Re ãhãimana u'ãsi mono hã danhimirosa'rata wasété nhiptete na a'ã 're dahãimana za'ra mono da, te te 're da'a'rãnhito

mono wamhã, ãne wamhã, e niha te za te te siwi 're da'awẽ'õ. Te te siwi 're da'awẽ'õ waihu'u mono õ di za. E 'wa hã, te 'Re ìhâimana u'âsi mono nhimipisutu da, hâimana nhiptete na 're hâimana. Robaba di. Ni'wai õ di.” Áté, ãne te za ni'wam norĩ hã te te ìma 're nharĩ za'ra, te te 're waihu'u za'ra mono õ nherẽ. ²⁰ E a norĩ wa'wa hã 'Re ìhâimana u'âsi mono ma, aipire za'ra wa'aba bâ, te za ãne na ìma 're ìnharĩ za'ra wa'aba mo. Piza na zé 'manharĩ hã, e ti'manharĩ'wa te za sina sadanharĩ za'ra, ãne: “E marĩ da, ma tô ãne ìwa'ab'manha.” ãne na te te sina sadanharĩ waihu'u za'ra õ di za. ²¹ Ì'manharĩ'wa hã te te sima ìwẽzéb uwaibaba si, te za zé hã te te 're ab'manharĩ, piza na. Zé hã te te su pese wamhã, misi te za oto sada ub'rã. Tawamhã te za sima rosa'rata, piza maparane te te sima 'manharĩ da, ãma. Tawamhã te te ì'manharĩ 'rada hã, wẽ uptabi na te za 'manha, ì'madâ'â ze da hã. Duré ìhâiba amo hã si'aba'ré na te za 'manha, wẽ prã na, ta hã marĩ da si 're hâimana mono da, taré.

²² Tane te za duré 'Re ìhâimana u'âsi mono hã wa'manharĩ'wa hã marĩ hã te te wama 're apisutu, zé 'manharĩ'wa ne. Te te sima 're ìwẽ mono zéb zarina, te za uburé marĩ hã te te dama 're apisutu, ìwẽ hã duré ìwẽ prã hã. Ta hã te te sima 're wẽ u'âsi, tiwaihu'u pese na dapo're'õ norĩ hã te te 're ahã za'ra mono da, taha zarina ìsimihã nhiptetezém na da te dasina 're waihu'u za'ra mono da. Tane nherẽ, te te siwi 're ì'awẽ'õ pese mono norĩ ãma hã, 're wa'a su'u mono õ di, za te te 're ìda'uprosi za'ra mono norĩ ãma hã. ²³ ãne hã ma tô duré te te sima 're wẽ, pire na 're ìhâimana wẽ uptabi mono zém na, dama 're siwaihu'u mono da. Uburé

wa'ãma 're ãpẽ'ẽzé mono zéb zarina, wa'ãma 're ãsiwãrĩ za'ra mono norĩ ma, ma tô ãne na wama 're siwaihu'u, 'Re ãhãimana u'ãsi mono hã. Wa norĩ hã ma tô oto te te 're wa'apisutu siro, rowẽ uptabi ãma ãrata 're wahãimana u'ãsi za'ra mono da. ²⁴ Wa norĩ hã ma tô 'Re ãhãimana u'ãsi mono hã te te 're wa'apisutu, ãsib'a'uwẽ uptabi hã oto 're wanomro mono da. E 'wam norĩ hã tawamhã, 'Re ãhãimana u'ãsi mono te te 're ã'apisutu mono norĩ hã. Wa norĩ hã zudezu norĩ hã aihĩni õ nherẽ, duré zudezu'õ norĩ hã aihĩni õ nherẽ, ma tô wasiwazari te te 're wa'apisutu, ãsib'a'uwẽ oto 're wanomro mono da, wasiré. ²⁵ Duréihã 'Re ãhãimana u'ãsi mono zadawa wasu'u'wa hã ma tô ãmreme na rob'ui'ééré, Ozéza na ãsisi hã. Zudezu'õ wasu'u na ma tô ãne na rob'ui'ééré:

“ãnhib'a'uwẽ'õ, aré 're ãnomro mono norĩ hã, wa za oto ãnhib'a'uwẽ na te 're sisi za'ra.

Aré te 're ãsawi za'ra mono õ norĩ hã, wa za oto ãma ãsawi pese na te 're waptẽrẽ za'ra.

²⁶ Tirob ãma 're si'ubumroi mono ré, wa tô aré te tãma 're nharĩ za'ra, ãne: A norĩ wa'wa hã ãnhib'a'uwẽ'õ te 're aihãimana za'ra wa'abamo. Tane nherẽ, tame 're si'ubumroi mono ré, wa za oto ã'ra na te 're sisi za'ra, wa hã 'Re ãhãimana u'ãsi mono 'ra na.”

ãne Ozéza, ãmreme na te te ãrob'ui'éérézé wasu'u hã.

²⁷⁻²⁸ Iza'iza hã ma tô duré ãne na ãma rob'ui'ééré, Izarazéhé nhihudu norĩ ãma hã:

“'Re ãhãimana u'ãsi mono hã Wanhib'apito hã te za sa'ëtẽ da'ahã za'ra waptu sina, daro mono bâ dawasété na te te 're ãda'awaihu'u mono zéb zarina. Taha wa, Izarazéhé nhihudu norĩ hã ã poré zaihã na supara 're ãsimi'wara mono ne, ahã uptabi nherẽ, te za umro na si

te te 're anho'reptu, 'Re ãhâimana u'âsi mono hã.”

Ãne Iza'iza hã, Izarazéhé nhihudu norĩ ãma te te ãrob'ui'érezé hã.

²⁹ Iza'iza hã ma tô duré ãne na rob'ui'éré:

“Wanhib'apito hã danhipai u ãsiptete uptabi, te 're hâimana. Õ hã uburé wahi'rata norĩ hã zudezu norĩ hã te te wawi 're a'uprosi mono 'wa'ãhã, wa aré wasiré zudezu norĩ hã 're wasi'utõrĩ pese, Sodoma na 'ri nho'õmo nhisi ãma uburé ãdasi'utõrĩ ne, duré Domora na 'ri nho'õmo nhisi ãma ãdasi'utõrĩ ne. Tane nherê, ma tô ni'wam norĩ ãma tipê'ézé za'ra, te te sô'reptu za'ra da, uburé si'utõrĩ tã da, wasiré zudezu norĩ hã.”

Zudezu norĩ hã Cristu te te siwi 're ãwê'õ za'ra mono zé wasu'u

³⁰ E marĩ te wama wasu'u za'ra, tawamhã, ã hã. E niha, wa za tawamhã ãma waihu'u za'ra ni, ãhã wasu'u na hã. ãne, wa za ãma waihu'u za'ra ni. Zudezu'õ norĩ hã 'Re ãhâimana u'âsi mono, ãwasédé hã te te ãma 're ã'ab'madã'ã mono õ zarina, te te 're ãwêsãmri za'ra mono zéb da hã, te te aré sô 're rob'ruiwapari za'ra mono õ nherê, ma tô te te 're awêsãmri, taré te te 're ãsaze za'ra mono zém na si nherê. ³¹ Tane nherê, Izarazéhé nhihudu norĩ hã 'Re ãhâimana u'âsi mono nhimiroti 'rata na Mozési te te ãrob'ui'éré hã te te 're ã'madã'ã pese za'ra mono na, 'Re ãhâimana u'âsi mono, ãwasédé te te oto ãma 're ab'madã'ã tã mono da, duré taha zarina te te 're awêsãmri mono da, te te sima ãma 're aroti mono newa, ma tô ta norĩ hã taré sô 're si'wapé za'ra, te te 're ã'awêsãmri mono zéb zõ. 'Re ãhâimana u'âsi mono hã, ãwasédé hã te te ãma 're ã'ab'madã'ã mono õ zarina, te te 're ãwêsãmri za'ra

mono zéb da hã, te te sina tãma 're uwaimrami za'ra mono õ di, ta norĩ hã. ³² E marĩ wa, te te sina tãma 're uwaimrami za'ra mono õ di. 'Re ãhãmãna u'ãsi mono te te 're ãsazei pese za'ra mono zém na si, te te 're ãwēsãmri za'ra mono zéb da hã, 're si'madã'ã za'ra mono õ wa, 'Re ãhãmãna u'ãsi mono nhimiroti 'rata na rob'ui'éré na si 're si'madã'ã ze za'ra mono wa. Cristuhu ãma, wa za oto êne hã aima ãma simiré'é za'ra wa'wa. Êtẽ tõmo wawẽ hã bãdãdi wa, 're sa'wari mono wa, te za ãma 're dasi'marõpãrĩ za'ra. Taha wa, te za 're dasirẽme za'ra. Tane duré, zudezu norĩ hã ma tõ Cristu te te siwi 're ãwẽ'õ za'ra mono zém na si'uihã na sima 're simiza'repese za'ra, wedepo'o nhonhi'rãmi na dazada ãdã'ãzé hã taré newa, Cristu hã da te 're ãsaze za'ra mono zém na, 'Re ãhãmãna u'ãsi mono te te 're ãda'anho'reptui mono õ newa. ³³ Duréihã Iza'iza hã ma tõ ãne na ãma rob'ui'éré, 'Re ãhãmãna u'ãsi mono mreme na:

“Ma'ãpé, ãwapari pese za'ra wa'aba. Zeruzarẽ u, wa za ni'wa hã satõ, Si'ã na sa'a nhisi u. Êtẽ tõmo wawẽ hã bãdãdi wa, dawi 're ãsa'wari mono hã, te te 're da'marõpãrĩ za'ra mono wa, 're ãdasirẽme za'ra mono ne, 'Re ãhãmãna u'ãsi mono 'rata 're ãdanomro u'ãsi mono zé hã da te dasina 're uwaimrami za'ra mono õ di za, da te dasiwi 're wẽ'õ pese za'ra mono wa, 'Re ãhãmãna u'ãsi mono Zeruzarẽ u te te ãsatõrĩ hã.

Tane nherẽ, ni'wam norĩ hã te te sina 're umnhasi za'ra mono wamhã, taré te te sina 're umnhasi baba za'ra mono õ di za. ãwẽ hã te za tõ te te tãma ãma 're a'uwaimrami, 'Re ãhãmãna u'ãsi mono hã. Taha wa, tãma 're rowẽ u'ãsi za'ra mono di za.”

Ãne ma tô duréhã Iza'iza hã ãma rob'ui'ééré siro,
Cristu za da te dasiwi ãwẽ'õzém na hã.

10

¹ Ìsisãnawã norĩ, 'Re ãhãimana u'âsi mono te te 're ãda'anho'reptui mono zé hã, uburé ãsiré zudezu norĩ hã te te sina tãma 're uwaimrami za'ra mono da, wa tô ãsima wẽ uptabi za'ra. Taha da, wa ta norĩ ãma 're ãmreme u'âsi za'ra, 'Re ãhãimana u'âsi mono ma. ² Ta norĩ hã te te sima 're wẽ uptabi za'ra, 'Re ãhãimana u'âsi mono ma, 're sisõmri u'âsi za'ra mono da, õhõ ma si, te te 're romhuri pese za'ra mono da. ãne na, wa tô ãsi'uihã na ãma waihu'u pese za'ra, tô sena. Tane nherẽ, 'Re ãhãimana u'âsi mono ma, da te 're ãromhuri pese za'ra mono zé hã te te waihu'u pese za'ra õ wa, te te sina tãma 're uwaimrami za'ra mono õ di. ³ 'Re ãhãimana u'âsi mono, dawasédé te te oto da'ãma 're ã'ab'madã'ã mono õ zarina, te te 're ãda'awẽsãmri mono zé hã, tãma waihu'u pese za'ra õ di. Te te 're ãda'awẽsãmri mono zéb da, 'Re ãhãimana u'âsi mono te te tãma 're ãpisutu za'ra mono zé hã, te te 're 'madã'ã pese za'ra mono õ di, ta norĩ hã. Si'uihã na te te sima 're ãpisutu za'ra mono zéb zarina si, ma tô 'rãwi sô 're si'wapé za'ra, taha na te te 're wẽsãmri za'ra mono da newa. ⁴ 'Re ãhãimana u'âsi mono nhimiroti na Mozési te te ãrob'ui'ééré hã da te 're ã'madã'ã pese za'ra mono na, da te ãma 're rosa'rata u'âsi za'ra mono õ di za oto, taha zarina 'Re ãhãimana u'âsi mono, te te sima da'ãma 're aroti mono newa, dawasédé te te oto da'ãma 're ab'madã'ã tõ mono da, duré taha zarina te te 're ãda'awẽsãmri mono zéb da hã. Tãibã. ãne hã ma tô Cristu hã dawu uprosi. Ta hã Danho'reptui'wa na te te sina 're ã'umnhasi

za'ra mono norĩ si, te za 'Re ãhâimana u'âsi mono hã te te 're awêsãmri, ãwasédé hã te te oto ãma 're ã'ab'madã'ã mono õ zarina, po're'õ nherẽ, te te 're ahã za'ra tõ mono da.

'Re ãhâimana u'âsi mono te te 're ãda'anho'reptui mono zé wasu'u

⁵ Duréihã Mozési hã ma tõ ãne na rob'ui'ére:

“Ni'wa hã ãsimiroti na rob'ui'ére hã uburé te te 're 'madã'ã pese uptabi mono wapsi, nimahã na marĩ na misi ãsimiroti na te te upai õ wapsi, tawapsi te za rowẽ na 're hãimana u'âsi, 'Re ãhâimana u'âsi mono 'rata.”

Ãne ma tõ Mozési hã ãma rob'ui'ére. ⁶⁻⁸ Tane nherẽ, ni'wa hã ãne te te 'manharĩ waihu'u õ di, ãsimiroti zarina uptabi hã. Ni'wa hã ãsimiroti upai'õ'wa hã 're morĩ õ di. Robaba di. Ãté ãne na te za 'rãwi asima 're ãnharĩ za'ra wa'aba mo: “E 'wa hã te za hãiwa u mo, Cristu hã apã we te te saprõni da, wa'upana wazada ãdã'ã za'ra da hã.” Ãne hã asima 're nharĩ za'ra wa'aba mono õ di za, Cristu hã Danho'reptui'wa da, 'Re ãhâimana u'âsi mono te te ãpisudu hã wei morĩ õ newa, ti'ai u.

Ãté te za duré ãne na 'rãwi asima 're ãnharĩ za'ra wa'aba mo: “E 'wa hã te za mo, adã 're ãhâimana za'ra mono zéb u, Cristu hã te te hãiwa'utu da apã.”

Ãne hã asima 're nharĩ za'ra wa'aba mono õ di za duré, Cristu hã apã hãiwa'utu õ newa, ab're hawi. 'Re ãhâimana u'âsi mono, da te 're saze za'ra mono wapsi, te te 're ãda'awêsãmri mono zém na, ma tõ Mozési hã ãne na ãma rob'ui'ére, duréihã:

“'Re ãhâimana u'âsi mono zadawa wasu'u hã ma tõ aipẽ'ẽ 're, 're ãsazei pese za'ra wa'aba mo, 'rãwi. Taha na, ma tõ duré dama 're

asiwasu'u u'âsi za'ra wa'aba mo, asadawa na.”

Ãne Mozési te te ãma ãrob'ui'érezé hã. Taha na, wa tô duré wa norĩ hã wa te dama 're sadawa wasu'u za'ra, Cristu, da te 're sazei pese za'ra mono wapsi, 'Re ãhãimana u'âsi mono te te 're ãda'awêsãmri mono zém na, dawasédé te te oto da'ãma 're ã'ab'madã'ã mono õ zarina. ⁹ Zezusi hã Asib'apito uptabi na, asadawa na danho'a 're sisi za'ra wa'aba mono wamhã, duré 'rãwi aipê'ê 're 'Re ãhãimana u'âsi mono, Zezusi te te ãhãiwa'utuzém na, 're sazei pese za'ra wa'aba mono wamhã, tawapsi te za te te 're asõ'reptu za'ra wa'wa, 'Re ãhãimana u'âsi mono hã. ¹⁰ Zezusi hã wapê'ê 're, wa te wasina 're ã'umnhasi za'ra mono zém na, 'Re ãhãimana u'âsi mono hã te te 're ãwa'awêsãmri mono zé hã. Zezusi hã Wanhíb'apito na danho'a, wa te dama 're ãsisi za'ra mono zém na, 'Re ãhãimana u'âsi mono te te 're ãwa'anho'reptui mono zé hã. ¹¹ Duréhã Iza'iza hã ma tô duré ãne na ãbaihã na rob'ui'ére: “Re ãhãimana u'âsi mono hã, Danho'reptui'wa da, te te ãpisudu hã da te dasina 're umnhasi za'ra mono wamhã, niwamhã te te sina 're umnhasi baba za'ra mono õ di za. Te za te te dama ãma 're a'uwaimrami u'âsi.” ãne Iza'iza hã te te ãma ãrob'ui'érezé hã. ¹² Zudezu norĩ hã zudezu'õ norĩ me, 'Re ãhãimana u'âsi mono ma hã, tô õhõ si, tãma 're ãhãimana za'ra mono zé hã. Siwanhizari, tãma 're hãimana za'ra mono õ di oto ta norĩ hã. 'Re ãhãimana u'âsi mono, uburé Danhíb'apito uptabi, te dama 're hãimana. Taha wa, ni'wam norĩ hã 'Re ãhãimana u'âsi mono te te 're sõ'reptu za'ra mono da, te te tiwi 're waptêrê za'ra mono wamhã, ta norĩ ma, te za tô te te tãma ãma 're a'uwaimrami, dama 're ãsõpru mono zéb zarina. ¹³ Duréhã 'Re ãhãimana

u'âsi mono zadawa wasu'u'wa hã ma tô duré ãne na rob'ui'ééré:

“Ni'wam norĩ hã Danhib'apito uptabi te te 're sō'reptu za'ra mono da, te te tiwi 're waptẽrẽ za'ra mono wamhã, ta norĩ hã te za tô te te 're anho'reptu, ãhãiba mono bã.”

Ãne duréihã 'Re ãhãimana u'âsi mono zadawa wasu'u'wa te te ãma ãrob'ui'éérézẽ hã.

¹⁴ E niha te za tawamhã da te tiwi 're waptẽrẽ za'ra, te te 're da'apawapto mono da hã, Cristu, da te dasina 're umnhasi za'ra mono õ nherẽ. Ãne wamhã, dama waihu'u õ di. Duré Zezusihi wasu'uwẽ hã dapo're'õ na da te 're wapari za'ra mono õ ré hã, e niha te za da te dasina 're umnhasi za'ra, Zezusi hã. Da te dasina 're umnhasi waihu'u za'ra mono õ di. E niha te za duré Zezusihi wasu'uwẽ na, da te 're dapawapto za'ra mono õ nherẽ, da te 're wapari za'ra. Dama waihu'u õ di.

¹⁵ Duré, e niha te aré Zezusihi zadawa wasu'u'wa norĩ hã daro mono bã datẽme 're nomro, ãmreme na te te 're dapawapto za'ra mono da, 'Re ãhãimana u'âsi mono hã te te datẽme 're satõrĩ za'ra mono õ nherẽ. Ãne wamhã, te te ãma 're dapawapto waihu'u za'ra mono õ di aré. Tane nherẽ, 'Re ãhãimana u'âsi mono, ma tô te te datẽme 're satõrĩ za'ra tô. Duréihã Iza'iza hã ma tô ãne na ãma rob'ui'ééré:

“Rowasu'u wẽ hã nima hawi da te dama 're ãwisi za'ra mono wamhã, dama 're rowẽ uptabi za'ra mono di za.”

Ãne ma tô Iza'iza hã romhã ré rob'ui'ééré, Zezusihi wasu'uwẽ hã ãsada wasu'u'wa norĩ hã te te oto datẽme 're ãwisi za'ra mono zém na hã.

¹⁶ Tawamhã Zezusihi wasu'uwẽ hã, ãsada wasu'u'wa norĩ hã te te oto datẽme 're ãwisi za'ra

mono nherẽ, uburé da te ãma 're saze za'ra mono õ di, wẽ nherẽ. Iza'iza hã ma tô duré ãne na ãma rob'ui'ééré, 'Re ãhâimana u'âsi mono ma, te te ãnharizém na: “Wanhib'apito, wa te dama 're asadawa wasu'u za'ra mono wamhã, e ma tô ai-wasu'u na da te 're wazaze za'ra. Mare di. Da te ãma 're wazaze za'ra mono õ di.” ¹⁷ Tane nherẽ, Cristuhu wasu'uwẽ na, da te ãma 're dapawaptob za'ra mono õ nherẽ, da te ãma 're sasõmri waihu'u za'ra mono õ di. Cristuhu wasu'uwẽ hã dapo're na da te 're wapari za'ra mono wapsi, te za da te 're saze za'ra.

¹⁸ E zudezu norĩ hã zahadu ãwasu'uwẽ hã te te 're wapari za'ra mono ã bâ bété. ãwasu'uwẽ hã ma tô te te 're wapari za'ra aré ta norĩ hã, tô sena. Duréihã Dawi hã ma tô ãne na ãma rob'ui'ééré:

“Ësadawa wasu'u'wa norĩ mreme hã ma tô daro mono bâ te te 're ropé.

Ta hã ma tô ropâ dapo're na da te 're wapari za'ra, daro mono bâ.”

Ãne ma tô Dawi hã ãma rob'ui'ééré.

¹⁹ E tawamhã, Izarazéhé nhihudu norĩ hã ãwasu'uwẽ te te 're wapari za'ra mono wamhã, e te te 're waihu'u za'ra mono õ di. Ma tô te te 're waihu'u za'ra. Tane nherẽ, tipẽ'ẽ na te te sima 're wẽ za'ra mono õ di, te te 're ãsaze za'ra mono da hã. Zudezu'õ norĩ si, ma tô te te sima 're wẽ za'ra, te te 're saze za'ra mono da. ãne na, ma tô Mozési hã duréihã ãma rob'ui'ééré 'rata, zudezu norĩ ma 'Re ãhâimana u'âsi mono te te tãma ãrowaihu'u za'ra zém na hã:

“Ënhib'a'uwẽ'õ aré 're ãnomro mono norĩ hã oto ãma 're ãnhib'a'uwẽ za'ra mono wa, te za oto ta norĩ hã asiwi 're ãruiwapari za'ra wa'aba mo, ãzadawa parab õ nherẽ.

Ta norĩ hã aré te te 're ĩwaih'u pese za'ra mono õ nherẽ, wa tô ãma 're ĩnhib'a'uwẽ za'ra aré. Taha wa, te za asib'ru na sada 're aihâimana u'âsi za'ra wa'aba mo, ĩzadawa parab õ nherẽ.”

Ãne zudezu norĩ ma, 'Re ĩhâimana u'âsi mono te te ĩrowaih'u mono zé hã.

²⁰ Iza'iza hã ma tô duré ãne na ĩsa'u ãma rob'ui'ére, zudezu'õ norĩ wasu'u na hã. Zudezu norĩ hã te te siwi 're ĩwẽ'õ pese za'ra mono zém na, ma tô siptete sina ãma rob'ui'ére, 'Re ĩhâimana u'âsi mono mreme na:

“Ni'wam norĩ hã aré ĩzô 're sôpré u'âsi mono õ nherẽ, ma tô te te siwi 're ĩsâmri za'ra.

ĩzô 're sinharĩ za'ra mono õ nherẽ, wa tô ta norĩ ma 're ĩsiwaih'u za'ra.”

²¹ Ãne na ma tô duré Iza'iza hã zudezu norĩ ãma rob'ui'ére, 'Re ĩhâimana u'âsi mono mreme na:

“Wa hã wa tô aré Izarazéhé nhihudu norĩ zô 're ĩnhimiwẽ u'âsi za'ra, te 're azawi pese mono wa, apâ ĩtême we 're sihutu mono da. Ta norĩ hã po're ãna 're nomro u'âsi mono wa, te te siwi 're ĩwẽ'õ pese za'ra mono nherẽ, wa tô aré sô 're ĩnhimiwẽ u'âsi za'ra, te 're ĩsawi pese za'ra mono zéb zarina.”

Ãne ma tô Iza'iza hã 'Re ĩhâimana u'âsi mono mreme na ãma rob'ui'ére, Izarazéhé nhihudu norĩ ãma hã.

11

'Re ĩhâimana u'âsi mono, Izarazéhé nhihudu norĩ ãma 're ĩpẽ'ezé mono zé wasu'u

¹ E tawamhã, 'Re ĩhâimana u'âsi mono hã tinhib'a'uwẽ norĩ hã ma tô te te siwi 're wẽ'õ za'ra,

Izarazéhé nhihudu norĩ hã. Mare di. Te te siwi 're awě'õ mono õ di. Mare uptabi di. Wa hã bété, Izarazéhé nhihudu 're ĩmorĩ hã, duré Abra'ãhã nhihudu 're ĩmorĩ hã. Duré Bězamihĩ nhihudu norĩ siré 're ĩmorĩ wamhã, e ma tô siwi ĩwě'õ, Izarazéhé nhihudu 're ĩmorĩ nherě. Mare di. Te te siwi ĩwě'õ õ di, 'Re ĩhâimana u'âsi mono hã. ²⁻³Tinhib'a'uwě norĩ hã, tô sena te te siwi 're awě'õ mono õ di 'Re ĩhâimana u'âsi mono hã, duréihã ĩsãna'rata hawimhã, te te sima 're ĩ'apisutu mono norĩ hã. Duréihã Eriasi hã 'Re ĩhâimana u'âsi mono zadawa wasu'u'wa hã ma tô Izarazéhé nhihudu norĩ ãma ĩwasété na ãma sa'ra, 'Re ĩhâimana u'âsi mono ma. ãne na te te ãma ĩrob'ui'éérézė hã, aima waihu'u pese za'ra wa'aba di. ãne ma tô ãma rob'ui'ééré:

“Wanhib'apito, asadawa wasu'u 'rata 'wa norĩ hã ma tô ta norĩ hã te te 're simro. Duré étė za'ra 'manharĩ hã, ĩsisiwi aima danhoprubzėb da, marĩ, da te ĩwa 're ĩsa'ra za'ra mono zė hã ma tô uburé te te 're prub za'ra, ĩne hã. ĩsiwaprosi uptabi, wa oto 're ĩhâimana, te 're ĩ'asawi pese mono hã. Taha 'ru te, te duré ĩzada 're hâimana za'ra, ĩzama te te siwi ĩwĩrĩ da.”

ãne Eriasi hã 'Re ĩhâimana u'âsi mono ma, Izarazéhé nhihudu ãma ĩwasété na te te ĩsa'razėm na te te ãma ĩrob'ui'ééré hã, ĩbaihã na. ⁴Tawamhã 'Re ĩhâimana u'âsi mono hã e niha ma tô asa tãma waihu'u, Eriasihi ma. ãne ma tô tãma waihu'u:

“ãme ĩnhib'a'uwě nhipti'ai ãma hã, wa tô te ĩsima 're sawi pese za'ra, 7 miu na ĩhãiba za'ra hã, tisiré norĩ wazari si'utõrĩ tõ da dame, ĩhãiba'õ na dame ãma 're ĩwata za'ra mono õ

norĩ hã, Ba'a na romhãiba nhisi ãma hã. Ta norĩ si, te ĩzarina 're hãimana u'âsi za'ra.”

Ãne 'Re ĩhãimana u'âsi mono hã Eriasihi ma, asa te te ĩwaihu'uzem na rob'ui'ére hã. ⁵ Tane te duré ãhãna hã dama 're romhãimana za'ra. Da'ãma 're pẽ'êzé mono wa, da'ãma 're ĩsiwãrĩ mono zéb zarina, ma tô 'Re ĩhãimana u'âsi mono hã Izarazéhé nhihudu norĩ hã te te sima 're apisutu, umro na, ĩsib'a'uwẽ uptabi si oto 're hãimana za'ra mono da. ⁶ E tawamhã, marĩ hã te te 're ĩ'manharĩ wẽ za'ra mono zéb zarina, ma tô te te sima 're apisutu, 'Re ĩhãimana u'âsi mono hã, zudezu norĩ hã. Mare di. Taha zarina te te sima 're apisutu mono õ di. Taré ãma 're ĩpẽ'êzé za'ra mono zéb zarina, ãma 're siwãrĩ ze za'ra mono wa, ma tô si'uihã na te te sima 're apisutu, õhõ ãma si 're hãimana u'âsi za'ra mono da. Marĩ hã da te 're ĩ'manharĩ wẽ za'ra mono zéb zarina, te te sima 're da'apisutu mono 'wa'ãhã, ãne zarina 'wa'ãhã, aré senai õ di, 'Re ĩhãimana u'âsi mono, da'ãma 're ĩpẽ'êzé mono zéb zarina si, da'ãma 're ĩsiwãrĩ mono zé hã.

⁷ Tawamhã e niha, wa za ãne na hã ãma waihu'u pese za'ra ni. Ãne, wa za oto ãma waihu'u za'ra ni. Izarazéhé nhihudu norĩ hã 'Re ĩhãimana u'âsi mono, ĩwasédé hã te te oto ãma 're ab'madã'ã tõ mono da, duré taha zarina te te 're ĩwẽsãmri za'ra mono zéb da hã, sô 're sõpré u'âsi mono nherẽ, te te sina tãma ãma 're uwaimrami za'ra mono õ di, ta norĩ hã. 'Re ĩhãimana u'âsi mono, umro na te te sima 're ĩpisutu za'ra mono norĩ si, ma tô te te sina tãma 're uwaimrami za'ra, 'Re ĩhãimana u'âsi mono te te 're ĩwẽsãmri za'ra mono zém na hã. Tane nherẽ, ni'wam norĩ hã Izarazéhé nhihudu nherẽ, 'Re ĩhãimana u'âsi mono nhiti 're ĩhãimana za'ra mono norĩ hã, ta norĩ si ma tô 'Re ĩhãimana

u'âsi mono hã po're nhitob za'ra, ãmreme hã te te 're waihu'u za'ra mono ãna, a'â 're nomro mono da.

⁸ Duréhã Mozési hã ma tô ãne na ãma rob'ui'ééré:

“Re ãhãimana u'âsi mono hã ma tô ta norĩ hã ti-waihu'u pese na te te 're po're nhitob za'ra, simipari ãna 're hãimana za'ra mono da a'â. Ta norĩ hã ma tô duré te te 're 'rãiwamnarĩ za'ra, rosa'rata waihu'u ãna, a'â 're nomro mono da. Taha wa, te ta norĩ hã 'Re ãhãimana u'âsi mono te te siwi 're waihu'u za'ra mono ãna, siwa'ru 're hãimana za'ra.”

Ãne duréhã Mozési hã te te ãma ãrob'ui'éérézé wasu'u hã. ⁹ Dawi hã ma tô duré ãne na ta norĩ ãma rob'ui'ééré za'ra, zudezu norĩ ãma hã:

“Re ãhãimana u'âsi mono hã ta norĩ ma, ãwẽ na tãma 're sõprub za'ra mono wẽ te, ma tô 're si'madã'ã ze za'ra, taha na tãma 're rowẽ za'ra mono da newa. Taha wa, marĩ wasété pire na 're si'marõpãrĩ za'ra mono neza, 'rãwi. Duré 'Re ãhãimana u'âsi mono hã te te hã za'ra neza.

¹⁰ Te te duré 're tõmo nhitob za'ra mono neza, datob'a na 're ãdanomro mono ne, 're nomro mono da oto. Duré ta norĩ hã marĩ pire hã da te 're 'wasari mono wa, ãré 're ãdanhãpã za'ra mono ne, te te 're robzépata u'âsi za'ra mono neza.”

Ãne duréhã Dawi hã Izarazéhé nhihudu norĩ ãma, te te ãrob'ui'éérézé wasu'u hã.

¹¹ E tawamhã, zudezu norĩ hã 'Re ãhãimana u'âsi mono wi, 're si'marõpãrĩ za'ra mono nherẽ, apã ãtẽme 're wahutu waihu'u za'ra mono õ di za. E tawamhã apã ãtẽme 're sipizari waihu'u za'ra mono õ di za. Te za tô apã ãtẽme 're sipizari za'ra. Ta norĩ hã 'Re ãhãimana u'âsi mono wi, 're sipizari

za'ra mono wa, tiwasédé hã te te 're 'manharĩ za'ra mono wa, ma tô 'Re ãhãimana u'âsi mono hã zudezu'õ norĩ ma a'â pisutu za'ra, te te 're ãda'anho'reptui mono zé hã. Zudezu norĩ hã te te ãma 're 'ruiwapari za'ra mono da, ma tô zudezu'õ norĩ ma a'â pisutu za'ra, te te 're ãda'anho'reptui mono zé hã, zudezu norĩ hã apã ãtẽme 're sipizari za'ra mono da, te te 're ãda'anho'reptui mono zém niwĩ. ¹² Zudezu norĩ hã 'Re ãhãimana u'âsi mono te te 're ãwêsãmri za'ra mono zéb da hã, te te sina tãma 're uwaimrami za'ra mono õ wa, ma tô 'Re ãhãimana u'âsi mono hã zudezu'õ norĩ ma, hãiwa hawi marĩ ãwẽ na tãma 're sõprub za'ra, daro mono bâ. Tawamhã zudezu norĩ hã 'Re ãhãimana u'âsi mono niwĩ, ahã uptabi na apã za ãtẽme 're sipizari za'ra mono wamhã, tawapsi, te za oto marĩ ãwẽ uptabi hã te te dama 're anhomri, 'Re ãhãimana u'âsi mono hã hãiwa hawi, uburé tinhib'a'uwẽ norĩ ma hã.

Zudezu'õ norĩ, 'Re ãhãimana u'âsi mono te te 're ã'anho'reptui mono zé wasu'u

¹³ Zudezu'õ norĩ, wa za oto aima ãsiwasu'u za'ra wa'wa. Wa hã Cristuhu zadawa wasu'u'wa, wa aima 're ãhãimana za'ra wa'wa. Wa hã te aima 're ãromhuri za'ra wa'aba mono zé hã, taréi õ di. Taha wa, wa za tô ãnhimi'ẽ na te aima 're romhuri u'âsi za'ra wa'wa. ¹⁴ Wa hã te aima 're romhuri za'ra wa'aba mono wa, ãsiré zudezu norĩ hã te te ãma 're ai'ruiwapari za'ra wa'aba mono da, wa tô ta norĩ si te ãsima 're wẽ za'ra, ni'wam norĩ hã apã 'Re ãhãimana u'âsi mono u 're sipizari za'ra mono wa, te te 're anho'reptui mono da. ¹⁵ Ta norĩ hã te te 're saze za'ra mono õ wa, ma tô 'Re ãhãimana u'âsi mono hã asa te te siwi 're awẽ'õ, a'â. ãne wa,

ma tô a'â ai'ãma si 're siwadi za'ra wa'wa, zudezu'õ norĩ ãma hã. Tane nherẽ, ta norĩ hã niwapsi 'Re ãhãimana u'âsi mono u, apã 're ãsipizari za'ra mono zéb zarina, te te 're wësãmri za'ra mono wa, te za oto rowẽ uptabi na 're hãimana za'ra, ãwasédé hã te te oto ãma 're ã'ab'madã'ã mono õ zarina. 'Re dadã'ã za'ra mono wa, apã 're dahãiwa'utu za'ra mono wa, dama 're ãrowẽ za'ra mono ne, te za oto ta norĩ hã rowẽ uptabi na 're hãimana za'ra.

¹⁶ ãne na, wa za oto aima ãma romnhimiré'é za'ra wa'wa. ã'u'ëtẽ wapu hã da te 're 'manharĩ za'ra mono wamhã, sebre õ ré, te za syry na da te 're po'o za'ra, 'Re ãhãimana u'âsi mono ma, da te 're sãmri za'ra mono da. Misi ã'u'ëtẽ wa'õno hã da te tãma 're sãmri za'ra mono nherẽ, wahuré da te tãma 're ãsãmri za'ra mono zé, te wasu'u. Duré ãté ni'wa hã te za 'Re ãhãimana u'âsi mono ma tinha, ãne: “ã hã wede 're ãsa mono zari hã wa aima pisutu, ate da.” ãne hã wede hã zahadu 're sa mono ré, ni'wa hã wedezari si 'Re ãhãimana u'âsi mono te da, te te tãma pisutu nherẽ, ãpanhipti zama ãte hã za. ã hã wedezari hã, Izarazéhé nhihudu norĩ hi'rata norĩ, te wasu'u. Duré ãpanhipti hã ta norĩ nhihudu norĩ, te wasu'u. Izarazé norĩ hi'rata norĩ hã, 'Re ãhãimana u'âsi mono ma si, 're hãimana za'ra mono da, te te 're ãpisutu za'ra mono ne, te za duré ãsihudu norĩ zama tãma 're hãimana za'ra, wedezari si 'Re ãhãimana u'âsi mono te da, da te tãma 're pisutu za'ra mono nherẽ, ãpanhipti zama ãte ne. ¹⁷ ãne na, wa za duré aima ãma romnhimiré'é za'ra wa'wa. ãté azeitona wede hã te a'ubuni wi 're sa, oriwera na ãsisi hã 'madã'ã ãna ãprédu hã, tede'wai õ nherẽ. Ta hã zudezu'õ norĩ, te wasu'u. Duré azeitona wede hãiba amo hã te duré

're sa, danho'a da te dasiwi 're ĩ'madâ'â pese mono hã. Ta hã zudezu norĩ, te wasu'u. Tawamhã áté azeitona wede hã danho'a 're ĩsa mono panhipti hã te za nima niwĩp si panhipti nhi'ẽ za'ra ni, taré simi'wara da, dasiré 're 'rã za'ra mono õ wa. Ta hã, zudezu norĩ hã 'Re ĩhâimana u'âsi mono te te 're ĩsaze za'ra mono õ norĩ, te wasu'u. Áté a'ubuni wi azeitona wede 're ĩsa mono panhipti hã te za misi wẽ'ẽ ni, azeitona wede hãiba amo hã dama ĩ'madâ'â pese u ĩwede wãi wa, da te ãma wasisi da, dasiré oto 're 'rãĩ mono da. Ta hã, zudezu'õ norĩ ãma, 'Re ĩhâimana u'âsi mono, oto ãma 're ĩsib'a'uwẽ za'ra mono zé, te wasu'u. Tawamhã azeitona wede, dama ĩ'madâ'â pese wede wa'u na te za oto tipanhipti prédu, wẽ na, a'ubuni wi azeitona wede 're ĩsa mono panhipti hã rob'rãĩ wede amoi u, da te ãma ĩwasi hã. Tane duré, zudezu norĩ ma, 'Re ĩhâimana u'âsi mono hã marĩ wẽ na tãma 're ĩsõprub za'ra mono zé hã, te duré aima 're hâimana za'ra wa'wa oto, zudezu'õ norĩ na 're aihâimana za'ra wa'aba mono ma hã. ¹⁸ Taha wa, rob'rãĩ wede, dama ĩ'madâ'â pese panhipti hã 're 'rã za'ra mono õ wa, da te 're ĩsi'ẽ za'ra mono ne, 'Re ĩhâimana u'âsi mono a'â te te siwi 're ĩ'awẽ'õ mono norĩ ma, aipire na tãma 're aihâimana za'ra wa'aba mono zém na, asina 're sa'ra wa'aba mono õ di za. E ĩwede panhipti wa'ui hawi, te ĩwede zari hã 're prédu za'ra. Mare di. ĩwede zari hawip si, te ĩwede panhipti hã 're prédu za'ra. Tane, a norĩ wa'wa hã zudezu norĩ ma, aipire na 're aihâimana za'ra wa'aba mono õ di. Taha wa, aipire na tãma 're aihâimana za'ra wa'aba mono zém na, 'rãwi asina 're aiwata waihu'u za'ra wa'aba mono õ di za.

¹⁹ Zudezu'õ norĩ, áté ãhã wasu'u zarina, te za

ãne asima 're ãnharĩ za'ra wa'aba mo: “Re ãhãimana u'ãsi mono hã rob'rãi wede panhipti, da te 're ãsi'ẽ za'ra mono ne, e marĩ da, ma tã te te siwi 're awẽ'õ, zudezu norĩ hã. Wa norĩ hã ãwa'rãmi 're wahãimana za'ra mono da, ma tã ta norĩ hã te te siwi 're awẽ'õ. Rob'rãi wede amo panhipti hã ãwede amo na da te ãma 're ãwasisi za'ra mono ne, wa oto wa norĩ hã 're wahãimana za'ra, ã'upana za'ra.” ²⁰ ãne na asima 're nharĩ za'ra wa'aba mono wamhã, ã'uwaibaba te za tã asima ãma 're ãrowaihu'u za'ra wa'aba mo, ta norĩ ãma hã. Ta norĩ hã ma tã te te 're awẽ'õ tã siwi, te te 're saze za'ra mono õ wa. A norĩ wa'aba si 're sazei pese za'ra wa'aba mono wa, te tã ta norĩ wa'rãmi 're aihãimana za'ra wa'aba mo. Tane nherẽ, a norĩ wa'wa hã asina 're aiwata za'ra wa'aba mono õ di za. Tã'ã. Taha wa, te za 'Re ãhãimana u'ãsi mono si asiwi 're ãwazéb za'ra wa'aba mo. ²¹ E 'Re ãhãimana u'ãsi mono hã zudezu norĩ ma, tinhimihãzé te te tãma 're ba'a za'ra mono õ nherẽ, te za bété a norĩ wa'aba ma tinhimihãzé hã te te aima 're ba'a za'ra wa'wa, tiwi 're aipizari za'ra wa'aba mono wamhã. Mare di. Te za tã te te 're aihã za'ra wa'wa, tiwi 're aipizari za'ra wa'aba mono wamhã. Taha wa, te za 'Re ãhãimana u'ãsi mono si asiwi 're ãwazé pese za'ra wa'aba mo. ²² ãhã wasu'u na, wa za 'Re ãhãimana u'ãsi mono nhimizawi pese zé hã ãma waihu'u za'ra ni. ãsimihãzé pire na zama, wa za duré ãma waihu'u pese za'ra ni. Tiwi 're ãsi'marõpãrĩ pese za'ra mono norĩ si, te za te te 're ahã za'ra za'ëté. Tane nherẽ, a norĩ wa'wa hã 'Re ãhãimana u'ãsi mono te te 're asawi pese za'ra wa'aba mono zéb zarina, marĩ ãwẽ na te te 're aipawaptob za'ra wa'aba mono zéb da hã, tãma asina 're uwaimrami u'ãsi za'ra wa'aba mono wamhã, te za tã rowẽ hã te te aima

're pisutu u'âsi za'ra wa'wa, hâiwa hawi, ai'âma 're ïpě'ézé za'ra wa'aba mono zéb zarina. Æne na tãma asina 're uwaimrami za'ra wa'aba mono õ wamhã, a norĩ wa'aba zama te za te te siwi 're aiwě'õ pese za'ra wa'wa, rob'rãi wede panhipti hã 're 'rã za'ra mono õ wa, da te 're ïsi'ẽ za'ra mono ne. ²³ Duré zudezu norĩ hã Zezusihi zazei'õ'wa na 're ïhâimana za'ra mono norĩ hã, 'Re ïhâimana u'âsi mono u oto 're sipizari za'ra mono wamhã, te za oto apã ãma 're sib'a'uwě za'ra, ta norĩ ãma. Æne hã 'Re ïhâimana u'âsi mono ma, waihu'u pese di, zudezu norĩ ma, apã te te 're ï'manharĩ wě za'ra mono zéb da hã. ²⁴ Æne na, wa za oto rowasu'u na aima 'rãsutu za'ra wa'wa, azeitona wede panhipti wasu'u na ãma ïsimiré'ézém na hã. A norĩ wa'wa hã zudezu'õ na 're aihâimana za'ra wa'aba mono norĩ hã, a'ubuni wi azeitona wede panhipti, da te 'maiwě'ei wa, azeitona wede dama ï'madâ'â pese wede u, da te ãma ïwede wasisi ne, te oto simisutu 're aihâimana za'ra wa'aba mo, zudezu norĩ me. Duré zudezu norĩ hã azeitona wede dama ï'madâ'â pese panhipti ne, te 're hâimana za'ra. Taha wede panhipti hã da te 're si'ei mono wa, da te 're ïsãmra mono hã ï'madâ'â'wai ma, tãma wapure di, tõ ïwede na apã te te ãma 're ï'ato mono da hã. Tane duré, 'Re ïhâimana u'âsi mono ma hã wapure di, zudezu norĩ ãma apã 're ïsib'a'uwě za'ra mono zéb da hã, ta norĩ hã tiwi 're sipizari za'ra mono nherě, aré.

Zudezu norĩ hã, ahã na 'Re ïhâimana u'âsi mono u, za apã 're ïsipizari za'ra mono zé wasu'u

²⁵ ïsisãnawã norĩ, zudezu'õ na da te 're aiwaptěřě za'ra wa'aba mono norĩ hã, marĩ aré dama ïwaihu'u'õ na roti pire wasu'uzém na wa za

oto aima rowasu'u za'ra wa'wa, asimiza'rese ãna 're aihâimana za'ra wa'aba mono tã da. Zudezu norĩ upana, 'Re ãhâimana u'ãsi mono hã ai'ãma wa'aba si 're sib'a'uwẽ mono newa, 'rãwi asi'ãma 're aiwata za'ra wa'aba mono tã da, wa za oto ãne na aima rowasu'u za'ra wa'wa. Izarazéhé nhi-hudu norĩ hã 'Re ãhâimana u'ãsi mono wi, pẽ'ẽ tete uptabi na 're hâimana za'ra mono nherẽ, pẽ'ẽ tete u'ãsi, tiwi 're hâimana za'ra mono õ di za. Duréhã, 'Re ãhâimana u'ãsi mono te te sima ãpisutu sirõmo zéb zarina, zudezu'õ norĩ hã da'ahã uptabi na Cristu za da te 're ãsaze za'ra mono norĩ za'ratazé hã, oto ãwa waptã'ã wapsi, te za oto zudezu norĩ hã ahã uptabi na ãtẽme 're sipizari za'ra, õhõ ãma si oto 're nomro mono da. ²⁶ ãne 'Re ãhâimana u'ãsi mono te te 're ãsõ'reptu za'ra mono zéb da hã, Izarazéhé nhihudu norĩ hã. ãne na ma tã duréhã Iza'iza hã ãma rob'ui'ééré siro, ta norĩ ãma hã:

“Danho'reptui'wa da hã, Zeruzarẽ ãma Si'ã na sa'a nhisi ãma, dasiré za 're ãhâimana mono hã, tame.

Ta hã Zacoho nhihudu norĩ 're ãwasété za'ra mono zé hã te za te te tãma 're apari.

²⁷ 'Re ãhâimana u'ãsi mono hã ma tã ta norĩ ãma tinhimirosa'rada hã waihu'u siro, ãne: ‘Ta norĩ ma, te ãropisutuzé hã wa za tã tãma ãma uwaimrami za'ra, ãwasédé te tãma 're ã'apari mono zém na.’ ”

ãne Iza'iza hã ta norĩ ãma te te ãrob'ui'éérézé wasu'u hã.

²⁸ Zudezu norĩ hã Cristuhu wasu'uwẽ hã ma tã ahã na te te siwi 're wẽ'õ za'ra. Taha wa, te oto 'Re ãhâimana u'ãsi mono nhitob'ru ne 're hâimana za'ra. Taha wa'rãmi, ma tã ai'ãma 're siwadi za'ra wa'wa, asiré zudezu'õ norĩ ãma hã. Tane nherẽ,

ĩsib'a'uwẽ 're nomro mono da, te te pisutu za'ra wa, te ta norĩ hã te te 're azawi pese u'âsi sima, ta norĩ hi'rata ma, te te sina ĩropisutu za'ra zéb zarina. ²⁹ 'Re ĩhâimana u'âsi mono te te sima 're da'apisutu mono nherẽ, duré marĩ ĩwẽ na dama 're sôprub za'ra mono nherẽ, e te za tinhimirosa'rata na te te ãma 're saprĩ. Mare di. Misi haré, ĩsimirosa'rada hã te tãma 're hâimana u'âsi. ³⁰ Duréhã, aih'i'rata norĩ wa'wa hã 'Re ĩhâimana u'âsi mono nhimiroti hã te te 're wapari za'ra mono ãna, ma tô aré 're hâimana za'ra, zudezu'õ norĩ hã. Tane nherẽ, zudezu norĩ hã 'Re ĩhâimana u'âsi mono si te te 're sazei pese za'ra mono õ wa, ma tô oto ai'ãma 're pẽ'êzé za'ra wa'wa, ai'ãma 're sib'a'uwẽ za'ra wa'aba mono da, zudezu'õ 're aihâimana za'ra wa'aba mono nherẽ. ³¹ A norĩ wa'wa hã aré asimipari ãna 're anomro aba mono nherẽ, ai'ãma 're ĩpẽ'êzé za'ra wa'aba mono ne, te za oto duré zudezu norĩ ãma zama 're pẽ'êzé 'Re ĩhâimana u'âsi mono hã, po're ãna duré ta norĩ hã tiwi 're hâimana za'ra mono nherẽ. ³² 'Re ĩhâimana u'âsi mono wi, danhimipari ãna 're danomro mono wa, ma tô te te siwi 're da'awẽ'õ pese, dawasédé hã te te da'ãma 're ĩ'ab'madá'â mono hawi. Dazazéb 're, da te 're danheme mono wa, apâ dasi'uihã na 're ĩdawairébé waihu'u mono õ ne, dawasété hawi 'rãwi 're dasisõ'reptui waihu'u za'ra mono õ di. Taha na, dasi'uihã na da te dasina 're waihu'u za'ra mono da, ma tô te te siwi 're da'awẽ'õ. Uburé da'ãma 're pẽ'êzé mono da, ma tô ãne hã te te dama 're apisutu, 'Re ĩhâimana u'âsi mono hã.

Ĩwaihu'u pese na 'Re ĩhâimana u'âsi mono wasu'u

³³ 'Re ĩhâimana u'âsi mono hã uburé da'ãma 're ĩsiwamri mono zé hã tãma sa'êtẽ uptabi di, te te

dama 're ã'ab'manharĩ wẽ mono zéb da hã. Ñwaihu'u pe hã tãma sa'êtẽ uptabi di duré. E 'wa hã te za marĩ hã te te sima 're ã'apisutu mono zé hã tiwi waihu'u. E 'wa hã te za duré tiwi waihu'u, uburé marĩ hã te te 're ã'ab'manharĩ mono zé hã. ³⁴Duréihã Iza'iza hã ma tô ãne na ãma rob'ui'ééré:

“E 'wai ma, Wanhib'apito nhimirosa'rada hã waihu'u pese di.

E 'wa hã roti na tãma ãwa'rãmi'wa da hã, te 're hãimana. Robaba di.”

³⁵Wahĩ'rata hãiba amo hã ma tô duré ãne na ãma rob'ui'ééré, Zo na ãsisi hã:

“Re ãhãimana u'ãsi mono si, roptede'wa 're hãimana mono nherẽ, e niha te za ni'wa hã marĩ hã tãma tisõ, ãwa'rãmi marĩ na te te tãma ãwa'ãbã da hã. ãne hã robaba uptabi di, tãma hã.”

ãne ma tô Zo hã rob'ui'ééré, duréihã.

³⁶'Re ãhãimana u'ãsi mono si ma tô uburé te te aropoto, sima. Taha wa, te uburé marĩ hã te te 're ab'madã'ã, tiwaihu'u pese na. ãne wa, 'Re ãhãimana u'ãsi mono ãma, aihĩni, ãma 're wawata u'ãsi za'ra wa'aba mono za. Tane tô.

12

'Re ãhãimana u'ãsi mono ma, 're ãdasisõmri za'ra mono zé wasu'u

¹ ãsisãnwã norĩ, 'Re ãhãimana u'ãsi mono hã e wa'ãma 're pẽ'ézé mono õ di, wa'ãma 're ãsiwãrĩ mono zéb da hã. Wa'ãma 're ãpẽ'ézé mono zé hã, tãma sa'êtẽ uptabi di. Taha wa, wa za oto aima roti pese za'ra wa'wa, ãne na hã. 'Re ãhãimana u'ãsi mono ma si, te za 're asisõmri u'ãsi za'ra wa'aba mo, tiwi 're asisawi za'ra wa'aba mono ãna. Taha ma si, te za aiwẽ uptabi na tãma 're

aihâimana za'ra wa'aba mo, te te 're ai'madâ'â wê u'âsi za'ra wa'aba mono da. ãhã zarina, ãma 're anomro wê u'âsi aba mono wamhã, taha si tô sena, ãma 're ï'aiwata za'ra wa'aba mono zé hã. ² Ti'ai ãma dahâimana wasété na 're ïdanomro mono nori ãma hã, 're sasõmri za'ra wa'aba mono õ di za. 'Re ïhâimana u'âsi mono wi si, te za 're ïrowaptêrê u'âsi za'ra wa'aba mo, asimirosa'rata wê na si, aipê'ê 're, 're aihâimana za'ra wa'aba mono zé hã te te aima 're pisutu za'ra wa'aba mono da, 're aihâimana za'ra wa'aba mono zép tém na si, oto 're anomro aba mono da. Tawapsi te za 'Re ïhâimana u'âsi mono, te te aima 're ïpisutu za'ra wa'aba mono hã asina 're ïwaihu'u pese za'ra wa'aba mo, marĩ ïwê si tãma 're ï'manharĩ za'ra wa'aba mono zém na hã.

³ 'Re ïhâimana u'âsi mono hã tinhimizawi pese zéb zarina, ma tô ïpisutu, ïsadawa wasu'u'wa na oto 're ïhâimana mono da. Taha wa, wa za oto ãne na aima roti pese za'ra wa'wa. Dama aipire na, duré dama aiwê na 're aihâimana za'ra wa'aba mono õ nherê, 'rãwi aipire na 're asi'madâ'â za'ra wa'aba mono õ di za. 'Re ïhâimana u'âsi mono, ma tô te te sima 're aipisutu za'ra wa'wa, õhõ ãma si oto 're anomro aba mono da. Tane nherê, aihĩni ïsazei'wa, asiré 're anomro aba mono nherê, ni'wam nori si te ïsazei pese 'wa hã 're hâimana za'ra. Duré ni'wam nori hã ïsazei prã 'wa, te 're hâimana za'ra. ïsazei prã 'wa nori hã 're sazei pese za'ra wa'aba mono newa, 'rãwi asi'ãma 're rosa'rata za'ra wa'aba mono õ di za, 're sazei pese za'ra wa'aba mono õ nherê. ⁴ Dahâiba misi nherê, dahâiba na hã marĩ hã dama 're ïhâimana za'ra mono hã ahã di, tite mono bâ te te 're ïromhuri

za'ra mono zéb da hã, dapara hã duré danhib'rada hã, duré dato hã, uburé ãre 're ãdahâimana za'ra mono hã. ⁵ Tane hã wa oto wa norĩ hã wasiré ãsazei'wa norĩ hã Cristuhu ãma, wa'ahã nherẽ, 're wahâimana za'ra, simisutu. Dahâiba misi nherẽ, dahâiba na marĩ hã ahã na dama 're ãhâimana za'ra mono hã, tite mono bâ te te 're ãromhuri za'ra mono ne, wa oto wa norĩ hã wasiré ãsazei'wa norĩ hã wanhimiromhuri mono bâ sipu'u pese na, wa te 're romhuri za'ra, 'Re ãhâimana u'ãsi mono ma, dahâiba misi 're ãdahâimana za'ra mono ne, simisutu wasiré 're wahâimana za'ra mono wa oto. ⁶ Taha wa, 'Re ãhâimana u'ãsi mono hã simizawi pese uptabi wa, romhuri te te wama 're ã'apisutu mono zéb zarina, wasipu'u pese na, wa za wa te tãma 're romhuri za'ra, wate mono bâ, ãma 're ãwasipawaptob za'ra mono zéb da hã. 'Re ãhâimana u'ãsi mono zadawa wasu'u na, sena na ãsazei'wa norĩ ma si te te ãma 're ãrowasu'u za'ra mono zéb da, te te sima 're wa'apisutu mono wamhã, taha zarina si, wa za tô ãma 're wasipawaptob u'ãsi za'ra. ãsimiroti zarina si, wa za wa te 're sadawa wasu'u za'ra, wasiré ãsazei'wa norĩ ma. ⁷ Duré ni'wam norĩ hã ãsazei'wa norĩ pawapto'wa da, te te sima 're apisutu mono wamhã, ta norĩ zama te za tô taha zarina si te te tãma 're dapawaptob u'ãsi za'ra. Duré 'Re ãhâimana u'ãsi mono nhimiroti na dama rowahutu'wa da, te te sima 're ã'apisutu mono norĩ hã te za tô ta norĩ zama ãsarina si te te ãma 're dapawaptob za'ra. ⁸ Duré ni'wam norĩ hã 'Re ãhâimana u'ãsi mono hã te te sima 're apisutu mono wamhã, te za ãsazei'wa norĩ ma, ãsimiroti zarina si te te 're rowahutu za'ra, te te 're wapari za'ra mono wa, pẽ'ẽ toi u'ãsi, ãma 're hâimana za'ra mono da, siptete sina. Duré ni'wam norĩ hã

tinhibrom na dama 're sôprub za'ra mono da, te te sima 're apisutu mono wamhã, te za tô ta norĩ hã dawĩ 're sôti za'ra mono ãna, dama ãma 're sôprub za'ra, sa'êtê na. Duré ni'wam norĩ hã ãsazei'wa norĩ 'madâ'â'wa da, te te 're apisutu mono wamhã, te za tô simi'ê na te te 're 'madâ'â u'âsi za'ra, ta norĩ zama. Duré ni'wam norĩ hã te te sima 're apisutu mono wamhã, ta norĩ zama te za da'ãma 're pẽ'êzé za'ra, dahâzé ré norĩ ãma, duré dawĩ 're ãrobzei'õ za'ra mono norĩ ãma. To sina, te za ãne zarina te te 're dapawaptob za'ra, ta norĩ hã. ãne wa za wa te wasima 're rob'ma'wamarĩ, romhuri mono bã, dahâiba hã misi nherê, dahâiba na marĩ hã ahâ na dama 're ãhâimana za'ra mono hã tite mono bã te te sima 're ãromhuri za'ra mono ne.

⁹ Taré asimizawizé hã aima 're hâimana za'ra wa'aba mono tõe da, te za tô sena asimizawi pese zé hã aima 're hâimana u'âsi za'ra wa'wa. Uburé marĩ wasété nhiti, te za 're aihâimana za'ra wa'aba mo, asiwi 're wẽ'õ pese za'ra wa'aba mono sina. Uburé aihâimanazé ãwẽ na si te za oto 're aihâimana za'ra wa'aba mo. ¹⁰ Dasisãnawãĩ uptabi hã 're ãdasisawi pese za'ra mono ne, te za a norĩ wa'wa hã 're asisawi pese za'ra wa'aba mo, Cristuhu ãma asisãnawã oto asiré 're aihâimana za'ra wa'aba mono wa. Te za duré 're asiwazé pese za'ra wa'aba mo. ¹¹ Aiwa'a ãna, te za duré 're ãromhuri pese za'ra wa'aba mo. Wanhĩb'apito ma si, te za asimi'êi uptabi na 're ãromhuri u'âsi za'ra wa'aba mo, aihâiba tiwi 're sawi za'ra wa'aba mono ãna. ¹² Uburé marĩ ãwẽ hã 're ãhâimana u'âsi mono, za te te wama 're ã'apisutu mono zéb zõe, wa za sõe 're wanhĩmipari za'ra mono sina, 're wahâimana za'ra, wato sina. Zezusihĩ zazei'wa oto 're anomro aba mono wa, da te 're ai'ruiwapari za'ra wa'aba mono nherê,

te za asiptete sina ãma 're anomro u'âsi aba mo. 'Re ãhâimana u'âsi mono ma, te za 're aimreme zusi u'âsi aba mo. ¹³ Asiré ãsazei'wa norĩ wi, marĩ zô tiwi 're ãrowaptâ'â za'ra mono zéb zarina, te za asimarĩ na 're ãpawaptob za'ra wa'aba mo. Duré darob amoi hawi atême 're sihotu aba mono wamhã, te za sô 're atob'uzu za'ra wa'aba mo, asiré ãsazei'wa norĩ zô hã, asôrôwa u 're 'mazasi za'ra wa'aba mono da.

¹⁴ Duré Zesusihi zazei'wa 're anomro aba mono 'ru te, da te 're ai'ruiwaparĩ za'ra wa'aba mono wa, da te aima 're rob'manharĩ wasété za'ra wa'aba mono wamhã, ãne wamhã, 'Re ãhâimana u'âsi mono ma, 're dahãiba 'ru za'ra wa'aba mono õ di za, te te 're da'ahã za'ra mono da. Rowẽ hã te te tãma 're ã'apisutu mono da si, te za da'ãma tãma 're aimreme zusi aba mo. ¹⁵ Ni'wam norĩ hã toi uptabi na 're hãimana za'ra mono wamhã, ãsine te za 're atoi uptabi za'ra wa'aba mo, ãsiré. Duré ni'wam norĩ hã pẽ'ézé uptabi na 're hãimana za'ra mono wamhã, ãsine te za duré aipẽ'ézé uptabi na ãsarina 're aihãimana za'ra wa'aba mo. ¹⁶ Duré simisutu te za asimirosa'rata na 're asisazei pese za'ra wa'aba mo, asiré ãsazei'wa nherẽ, asisada 're rosa'rata wasété za'ra wa'aba mono tõ da. Duré aiwẽ na 'rãwi asina 're aiwata za'ra wa'aba mono õ di za. Duré dama ãpire norĩ zapari, marĩ na romhuri wapu na da te dasima 're ãromhuri za'ra mono zé hã asiwi 're wẽ'õ za'ra wa'aba mono õ di za, 're 'manharĩ za'ra wa'aba mono tõ da, ta hã wapu nherẽ. Duré asiré norĩ nhipai u aiwaihu'u pese na 'rãwi asi'ãma 're rosa'rata za'ra wa'aba mono õ di za.

¹⁷ Duré da te aima 're rob'manharĩ wasété za'ra wa'aba mono wamhã, asa dama ãma 're wa'rãmi wasété za'ra wa'aba mono õ di za. Marĩ ãwẽ si 're

ĩ'manharĩ za'ra wa'aba mono na si, te za asima 're asõpré u'âsi aba mo, ãsazei'wa 're anomro aba mono wa, da te ai'ãma 're rosa'rata wasété za'ra wa'aba mono tõ da. ¹⁸ Asada 're dahâimana za'ra wa'aba mono nherẽ, rowẽ na si dasiré 're aihâimana u'âsi za'ra wa'aba mono da, te za asina 're ãrosa'rata wẽ u'âsi za'ra wa'aba mo. ¹⁹ Duré nimahã na, da te aima 're rob'manharĩ wasété za'ra wa'aba mono wamhã, 'Re ãhâimana u'âsi mono upana asi'uihã na 'rãwi 're asi'ruiwa'ãbã za'ra wa'aba mono õ di za. Taha si, tinhimihãzém na te te 're ai'ruiwa'ãbã za'ra wa'aba mono da, te za õhõ si 're ã'madã'ã za'ra wa'aba mo. Duréihã ãne na ma tõ Wanhib'apito mreme na rob'ui'ééré, Mozési hã:

“Wa hã ãsiwaprosi, wa za te 're da'a'ruiwa'ãbã. ãwétési, wa za te dama ãma 're awa'rãmi, marĩ, da te 're ã'manharĩ wasété za'ra mono zém na hã.”

Ãne duréihã Wanhib'apito mreme na rob'ui'ééré wasu'u hã, ãbaihã na hã. ²⁰ Duré ãne 'Re ãhâimana u'âsi mono nhimiroti amo na rob'ui'ééré wasu'u hã: “Asitob'ru norĩ hã mra te te 're sépata za'ra mono wamhã, ãsa na te za 're ãpawaptob za'ra wa'aba mo. Duré 'rubu wamhã, te za tãma 're ã'õb za'ra wa'aba mo. Ãne zarina, asitob'ru norĩ ma, 're 'manharĩ wẽ za'ra wa'aba mono wamhã, ta norĩ hã 'rãwi 're siwaihu'u za'ra mono wa, te za aima 're siséb za'ra wa'wa.”

Ãne duréihã 'Re ãhâimana u'âsi mono nhimiroti na rob'ui'ééré wasu'u hã. Ãhã zarina si te za dama 're ã'manharĩ wẽ u'âsi za'ra wa'aba mo. Taha wa, a norĩ wa'wa hã 'rãwi asi'uihã na 're asi'ruiwa'ãbã za'ra wa'aba mono õ di za. ²¹ Ãhã wasu'u na, wa za oto ãnhimirowasu'u na hã aima 'rãsutu za'ra wa'wa.

'Râwi dasi'uihâ na 're ãdasi'ruiwa'âbâ za'ra mono zém na hã da'ãma 're sasômri za'ra wa'aba mono ô di za. Marĩ ãwê si te za dama 're ã'manharĩ wê u'âsi za'ra wa'aba mo, taha na dahâimana wasédé hã dawi 're uprosi za'ra wa'aba mono da, duré taha zarina, tô sena oto ai'ãma 're dasiwadi za'ra wa'aba mono da.

13

Ti'ai ãma dama ãpire norĩ nhimiroti, da te 're ãwapari pese za'ra mono zéb da na rowasu'u

¹ Ti'ai ãma dama ãpire norĩ hã, roti'wa norĩ hã si'uihâ na 're sipisutu za'ra mono ô di, dama 're si'apito za'ra mono da hã. 'Re ãhâimana u'âsi mono te te 're ã'apisutu mono zarina si, te dama 're hâimana za'ra uburé. Taha wa, te za uburé aihĩni 're ãwapari pese za'ra wa'aba mo, ãsimiroti hã.

² Ni'wam norĩ hã dama ãpire norĩ nhimiroti te te siwi 're wê'ô za'ra mono wamhã, taha si te te siwi 're wê'ô za'ra mono ô di za. ã'u'âbâ te za duré 'Re ãhâimana u'âsi mono te te 're ã'apisutu mono zé hã te te siwi 're wê'ô za'ra. ãne hã ni'wam norĩ te te 're 'manharĩ wasété za'ra mono wamhã, 'râwi te za si'uihâ na te te sisada 're sani za'ra, ti'ai ãma dama ãpire norĩ nhimihâzé hã, 'Re ãhâimana u'âsi mono zadawa para. ³ ãne, marĩ te te 're ã'manharĩ wasété za'ra mono norĩ si, te za dama ãpire norĩ nhimihâzé ma, 're pahi za'ra. Tanei ô di, marĩ te te 're ã'manharĩ wê za'ra mono norĩ hã. Dama ãpire norĩ ma, 're pahi za'ra mono ô di za. Taha wa, te za ãwê si 're ã'manharĩ za'ra wa'aba mo, dama ãpire norĩ ma, tãma 're aipahi za'ra wa'aba mono ãna, 're aihâimana za'ra wa'aba mono da. Tawapsi te za te te 're aiwêsãmri za'ra wa'wa, ti'ai ãma dama

roti'wa norĩ hã. ⁴ Ta norĩ hã te 'Re ãhãimana u'ãsi mono zadawa para, te te 're romhuri za'ra, ãwẽ na si te te 're aipawaptob za'ra wa'aba mono da, taha zarina, rowẽ na 're asimroi wa'aba mono da. Tane nherẽ, marĩ ãwasété si 're 'manharĩ u'ãsi za'ra wa'aba mono wamhã, te za tô tãma 're aipahi za'ra wa'aba mo. E marĩ wa. Dama ãpire norĩ hã tô sena siptete uptabi wa, te te 're ãdahã za'ra mono zéb da hã. 'Re ãhãimana u'ãsi mono zadawa para, te ãsimipari'õ norĩ hã te te 're hã za'ra. ⁵ ãne wa, te za uburé ti'ai ãma dama roti'wa norĩ nhimiroti hã 're ãwapari pese za'ra wa'aba mo, asimipari õ wa, 'Re ãhãimana u'ãsi mono te te 're aiwẽ'õ pese za'ra wa'aba mono zéb zarina, te te 're aihã za'ra wa'aba mono tõ da. Duré 're aihãimana wẽ za'ra wa'aba mono zém na, 'Re ãhãimana u'ãsi mono ma, tãma ãma 're ã'uwaimrami za'ra wa'aba mono na, aipẽ'ẽ 're asimirosa'rata na asina 're waihu'u pese za'ra wa'aba mono da, te za ãsarina dama ãpire norĩ nhimiroti hã 're ãwapari pese za'ra wa'aba mo.

⁶ Taha wa, dama ãpire norĩ nhimipisutuzéb zarina te za duré rob'uiprazé hã syry na tãma 're ãpo'o za'ra wa'aba mo, ti'ai ãma dama ãpire norĩ ma. E marĩ wa. Dama ãpire norĩ hã 'Re ãhãimana u'ãsi mono zadawa para, te te 're romhuri za'ra mono wa. ⁷ Taha wa, te za tô ãsarina tãma 're ãpo'o za'ra wa'aba mo, aipawa'ãbãzé hã duré uburé marĩ uiprazé hã. Te za duré tãma 're aihãimana prédub za'ra wa'aba mo, dama roti'wa norĩ ma.

'Re ãdasisawi pese za'ra mono zé wasu'u

⁸ Wa'ãbã ãna, dawĩ 're ãrowaibui wa'aba mono zém na hã, taré dama 're ropisutu za'ra wa'aba mono õ di za. Te za dama ãma 're ã'uwaimrami za'ra wa'aba

mo, dama 're ĩropisutu za'ra wa'aba mono zéb za-rina. Asimizawizém na si te za 're ĩdazawi pese za'ra wa'aba mo. 'Re dazawi pese za'ra wa'aba mono wamhã, uburé 'Re ĩhâimana u'âsi mono nhimiroti 'rata na Mozési te te ĩrob'ui'érezém na te za asina tãma ãma 're ĩ'uwaimrami za'ra wa'aba mo. ⁹Duréihã 'Re ĩhâimana u'âsi mono, Mozésihi ma, te te ĩwaihu'uzéb zarina te te ãma dama ĩrob'ui'érezé hã, ãne:

“Aimro na asiwi 're asipsaihuri za'ra wa'aba mono õ di za. Duré 're danhimroi wa'aba mono õ di za. Duré dawĩ 're asipsaihuri za'ra wa'aba mono õ di za. Duré marĩ ĩwẽ hã dawĩ 're 'ruiwapari za'ra wa'aba mono õ di za.”

Ãne duréihã 'Re ĩhâimana u'âsi mono nhimiroti hã, dahâimanazé mono bã. Ã norĩ hã, duré aimawi hã ĩsimiroti hã ahã uptabi nherẽ, simisutu haré te wasu'u ĩsimiroti hã, ãne:

“Te za 're ĩdazawi pese za'ra wa'aba mo, duré aihâimanazé hã 'rãwi asima 're ĩsawi pese za'ra wa'aba mono ne.”

Ãne ĩsimiroti hã sa'etẽ uptabi nherẽ, misi ĩsimiroti hã te wasu'u, simisutu haré. ¹⁰Ni'wam norĩ hã te te 're dazawi pese za'ra mono wamhã, marĩ hã ĩwasédé hã te te dama 're 'manharĩ waihu'u za'ra mono õ di za. Taha wa, ni'wam norĩ hã te te 're dazawi pese za'ra mono wamhã, ta hã uburé 'Re ĩhâimana u'âsi mono nhimiroti 'madã'ã pese 'wa, te za 're hâimana za'ra.

¹¹Zezusi hã we apã wazô ĩmorĩzéb u hã romhuture di oto, te te ĩwanho'reptu za'ra zé hã te te oto wama ĩrãsutu za'ra da hã. Cristu hã duréi, wa te wasina 're ĩ'umnhasi na'rata za'ra mono hawim nherẽ, romhuture di oto, wama hã. Taha wa, te za oto asimiza'rese 're aihâimana za'ra

wa'aba mo, darési ãna 're ïdanhotõ za'ra mono ne, asimiza'rese ãna 're aihâimana tõ za'ra wa'aba mono da. ãne na ti'ai ãma 're ïwahâimana hutu za'ra mono zé hã aima waihu'u pese za'ra wa'aba di. ãne wa, te za 're ïdazawi pese za'ra wa'aba mo.

¹² Robra ïsi'utõrĩzéb u hã romhuture di oto, ti'ai ãma ré dawasédé, da te 're ï'manharĩ za'ra mono hã. Tâibâ za oto. Cristu hã we apâ morĩ wapsi, rowa'a si te za oto 're hâimana u'âsi, robra wa'rãmi. Taha wa, robra 'rowi dawasédé, da te 're ï'manharĩ za'ra mono ne, 're wanomro mono õ di za oto. Wawasédé hã wa za oto wa te 're sahari pese za'ra. Duré Zezusihi nhimirowa'a na si wa za 're wanomro, robra wi wanhiptete sina ãma 're ïwahâimana za'ra mono zéb da hã, danhimnhi'âsi na dawĩ 're ïdasisõpa za'ra mono ne. ¹³ Wawasété ãna, wa za oto 're wanomro wẽ, rowa'a na 're ïdanomro mono ne. Âzé wa te dame 're âhuri mono õ di za, dato ïwasété u 're dasi'rã'õtõ mono wa, siwa'ru da te 're ï'âhuri mono ne, 're wa'rã siwamnarĩ tõ za'ra mono da. Duré siwa'ru wahâimanazé ïwasédé hã wa te 're 'manharĩ u'âsi za'ra mono õ di za, pi'õ na aibâ na zama. Duré marĩ na 're ïwasiwẽ'õ za'ra mono hawi, wa te wasima 're nharĩ za'ra mono õ di za. Duré marĩ na 're wasi'ruiwapari za'ra mono õ di za. ¹⁴ Siwa'ru 'rãwi asima ïwẽzéb zarina, aipẽ'ẽ 're asimirosa'rata wasété aba na ãma 're rosa'rata za'ra wa'aba mono õ di za. Wanhíb'apito Zezu Cristu 're ïmorĩzém na si te za oto 're aihâimana za'ra wa'aba mo, ïsine.

14

Ïsazei'wa nherẽ, sib'uware na 're ïnomro mono norĩ wasu'u

¹ Īsazei'wa nherē, sib'uware na 're ĩnomro mono norĩ zô, te za asitēme sô 're aihãsi aba mo. Īsimirosa'rata za'ra hã aimawi nherē, aiwab ô nherē, tãma 're nharĩ wasété za'ra wa'aba mono ô di za. Tane nherē, te za sô 're atob'uzu za'ra wa'aba mo. ² Ni'wam norĩ hã ĩsazei'wa norĩ hã uburé tisazéb zô te 're sôpré, te te 're huri mono da, romnhi zô zama, 'Re ĩhâimana u'âsi mono te te tiwi 're ĩsawi za'ra mono ô na, 'râwi 're ĩsisaze za'ra mono zéb zarina. Tane nherē, ni'wam norĩ hã ĩsazei'wa nherē, te za romnhi hã te te siwi 're wē'ô za'ra, te te 're huri mono tō da, 'Re ĩhâimana u'âsi mono te te tiwi 're sawi za'ra mono newa. ³ Taha wa, ni'wam norĩ hã uburé romnhi te te 're ĩhuri mono norĩ hã te te siwi 're wē'ô za'ra mono ô di za, romnhi na dame 're ĩsaihuri mono ô norĩ hã. Duré ni'wam norĩ, romnhi na dame 're ĩsaihuri mono ô norĩ zama, te te siwi 're wē'ô za'ra mono ô di za, uburé siwa'ru romnhi te te 're ĩhuri mono norĩ hã. E marĩ wa. 'Re ĩhâimana u'âsi mono hã ma tō te te 're awēsãmri ô norĩ hã, romnhi na dame 're ĩsaihuri mono ô norĩ me. ⁴ E a norĩ wa'wa hã ĩsib'apito za'ra wa'aba bâ, te za marĩ tiwi 're ĩwē'ô za'ra wa'aba mo, ĩsib'apito upana. Taha si te za te te 're waihu'u za'ra, ĩhâimana wasété na, duré ĩhâimana wē na zama. Tawamhã ĩsazei'wa norĩ hã te za siptete u'âsi 're hâimana za'ra. E marĩ wa. Wanhib'apito 'Re ĩhâimana u'âsi mono hã tiwaihu'u pese na te te 're siptete u'âsi za'ra mono wa.

⁵ Ni'wam norĩ hã ĩsazei'wa norĩ hã te 'râwi te te si'ãma 're rosa'rata za'ra, nima hã bâdâ hã romhuri'ôzé hã ĩwa 're ĩrere'e mono sidâpâsi, bâdâ dama 're ĩpire za'ra mono zém na hã. Duré ni'wam norĩ, ĩsazei'wa norĩ hã te te da'ãma 're rosa'rata za'ra asa, aiwapsi bâdâ hã uburé dama 're hâimana

za'ra mono nherẽ, ãma 're ãdahâimana za'ra mono zéb da hã. Taha wa, ate wa'aba mono bâ romhuri'ôzé bâtâ mono na asimirosa'rata mono bâ te za asiptete sina ãma 're aihâimana za'ra wa'aba mo, tô ôhõ na si. ⁶ Ta norĩ hã nimahã bâdâ hã romhuri'ôzé hã dama 're ãpire za'ra mono zém na te te si'ãma 're ãrosa'rata za'ra mono norĩ hã, Wanhíb'apito ãma 're wata za'ra mono da, te ãne te te 're 'manharĩ za'ra. Duré ni'wam norĩ hã uburé siwa'ru romnhi te te 're ãhuri mono norĩ hã te ãne te te 're 'manharĩ za'ra, Wanhíb'apito 'Re ãhâimana u'ãsi mono ãma 're wata za'ra mono da, dasa na dama 're sõpru mono wa. Duré ni'wam norĩ hã romnhi na dame 're ãsaihuri mono õ norĩ hã, te ãne duré te te 're 'manharĩ za'ra aiwa, 'Re ãhâimana u'ãsi mono ãma 're wata za'ra mono da, waihu'u pese wa, duré sõprub uptabi wa. ⁷⁻⁸ Wasi'uihã na 'ráwi wahâiba misire nherẽ, wasina 're wahâimana za'ra mono õ di za. Wanhíb'apito te te wama 're ã'apisutu mono zéb zarina si, wa tãma 're wahâimana za'ra. Duré wasi'uihã na bâdâ hã wadâ'âzé hã wa te wasima 're pisutu waihu'u za'ra mono õ di za. Wanhíb'apito te te wa'ãma 're ã'apisutu mono zéb zarina si, wa za 're wadâ'â za'ra, ôhõ ma. Taha wa, wahâiba ré 're wahâimana za'ra mono ré, duré oto 're wadâ'â za'ra mono wamhã, ãsib'a'uwẽ, wa za 're wahâimana u'ãsi za'ra, simisutu. ⁹ Cristu hã dâ'â nherẽ, ma tô apã hãiwa'udu, hãiba ré 're ãhâimana za'ra mono norĩ nhíb'apito da hã, duré 're ãdâ'â za'ra mono norĩ nhíb'apito da zama. Uburé ãsazei'wa norĩ nhíb'apito da, ma tô hãiwa'udu apã. Taha wa, wa ãsib'a'uwẽ 're wahâimana u'ãsi za'ra oto, simisutu. ¹⁰ Tane nherẽ, e marĩ wa, te bété asisãnawã norĩ hã 're ãwẽ'õ za'ra wa'aba mo, asiré

ĭsazei'wa 're anomro aba mono nherĕ. E marĭ wa, te 're ĭ'ruiwapari u'âsi za'ra wa'aba mo, asisânawã nherĕ. Niwapsi wa za uburé 'Re ĭhâimana u'âsi mono nho're aimasam ni, te te wa'awaihu'u da, wahâimana wĕ na, wahâimana wasété na zama. Tamep si za te te da'awĕ'ô na dâ'âsina, asi'uihâ na 're asiwĕ'ô pese za'ra wa'aba mono ô di za, ti'ab ré. ¹¹ Duréihã 'Re ĭhâimana u'âsi mono zadawa wasu'u'wa, ma tô âne na âma rob'ui'ééré, ĭmreme na: “Wa hã uburé Danhib'apito, tô sena 're ĭhâimana mono zé hã aima waihu'u pese za'ra wa'aba di. Duré tô sena aima ĭsiwasu'u za'ra wa'aba zéb zarina, wa duré tô sena aima ropisutu za'ra wa'wa. Âne, wa aima ropisutu za'ra wa'wa. Niwapsi te za a'uwĕ mono bâ dahi'rãtitô ĭnho're ĭma ana ni, dama ĭpire uptabi wa. Tawamhã tame dapoto mono bâ te za ĭnhisi za'ra ni, ĭnhisi na 'Re ĭhâimana u'âsi mono na.”

Âne ma tô ĭbaihã na âma rob'ui'ééré, 'Re ĭhâimana u'âsi mono mreme na rob'ui'ééré'wa hã.

¹² Tamep si, wa za oto wasi'uihã na tâma wasiwasu'u za'ra ni wahâiba mono bâ, ti'ab ré wahâimanazém na, uburé marĭ hã wa te 're ĭ'manharĭ za'ra mono zém na hã.

¹³ Taha wa, wasiré ĭsazei'wa nherĕ, 're ĭwasiwĕ'ô za'ra mono zé hã wa za oto rĕme pese za'ra ni. Âne zô si, te za asina 're asôpré wa'aba mo, marĭ ĭwĕ hã 're ĭ'manharĭ za'ra wa'aba mono zéb zô. Marĭ hã 're 'manharĭ za'ra wa'aba mono ré, asiré ĭsazei'wa norĭ hã te te 're ai'madâ'â za'ra wa'aba mono wa, asarina wa'aba tiwasété na 're si'marôpãrĭ tō za'ra mono da, te za marĭ ĭwĕ si 're ĭ'manharĭ u'âsi za'ra wa'aba mo. ¹⁴ Wa hã Wanhib'apito Zezusihi âma

're ĩhâimana mono wa, wa tō ĩsina waihu'u sena na, uburé dasa hã ĩwě na hã, duré ĩwasété õ na si. Tane nherě, ni'wam norĩ hã te za ãne hã te te ãma 're rosa'rata upa za'ra: “Ã hã romnhi hã, wasétére di. 'Re ĩhâimana u'âsi mono ma hã wě õ di, wa te 're ĩhuri mono da hã.” ãne hã ni'wam norĩ hã te te ãma 're rosa'rata za'ra mono wamhã, õ norĩ ma si, romnhi hã wasété di tō. Tane nherě, te te siwi 're wě'õ za'ra mono nherě, te te 're huri mono wamhã, dawasédé te wasu'u. ¹⁵ Áté marĩ dasa hã te za 're ĩhuri aba mo, asiré ĩsazei'wa norĩ te te siwi 're ĩwě'õ za'ra mono hã. Tawamhã, 're huri aba mono wamhã, 'Re ĩhâimana u'âsi mono te te dawi 're awě'õ mono newa, áté te za ãne na tiwi 're ĩrobzei'õ za'ra wa'aba mo, tō õ norĩ wi hã. ãne wamhã, asimizawi pese zé hã tãma ãma 're uwaimrami za'ra wa'aba mono õ di za. Tãma sawi uptabi za'ra wa, ma tō Cristu hã sada tidâ'â za'ra. Taha wa, romnhi hã asiré ĩsazei'wa norĩ te te 're ĩwě'õ za'ra mono hã, 're huri aba mono õ di za, 're huri aba mono wa, ta norĩ hã asa na tiwi 're ĩrobzei'õ za'ra mono zéb zarina, tiwasété na 're ĩsi'marõpãrĩ za'ra mono na 're si'utõrĩ tō mono da. ¹⁶ ãne hã marĩ hã aima wasété aba õ nherě, 're 'manharĩ za'ra wa'aba mono õ di za, da te 're aiwasu'u wasété za'ra wa'aba mono tō da. ¹⁷ E marĩ wa. 'Re ĩhâimana u'âsi mono hã ĩsazei'wa norĩ ãma 're ĩsib'a'uwě mono zé hã, dasa hã da te 're ĩwě'õ za'ra mono zé, te te wasu'u õ di. Uburé marĩ hã da te 're ĩ'âhuri mono zéb zama te te wasu'u õ di duré. E marĩ te wasu'u tawamhã, 'Re ĩhâimana u'âsi mono, da'ãma 're ĩsib'a'uwě mono zé hã. Ta hã 'Re ĩhâimana u'âsi mono nhimiroti zarina 're ĩdanomro wě mono zé, te wasu'u. Duré 'Re ĩhâimana u'âsi mono, Tipě'ěžani na te te 're ĩda'apawapto mono

zéb zarina, rowě uptabi na 're ĩdanomro mono zé, te wasu'u, dato sina. ¹⁸ Āne na ni'wam norĩ hã Cristuhu ma, te te 're romhuri wě za'ra mono wamhã, 'Re ĩhâimana u'âsi mono ma, te za te te sina 're rowě zani za'ra, uburé 're ĩhâimana wě za'ra mono zém na. Tawamhã te za duré da te 're wēsâmri za'ra, ti'ai āma ré.

¹⁹ Taha wa, rowě na wasiré 're ĩwahâimana za'ra mono zéb zô si, wa za wasima 're wanhopré. Wanhib'apito āma wahâimana nhiptete u'âsi 're wanomro mono da, 're ĩwasipawaptob za'ra mono zém na, wa za duré 're wanomro u'âsi. ²⁰ Tawamhã dasa siwa'ru 're huri aba mono wa, 'Re ĩhâimana u'âsi mono, danhiptete sina āma 're ĩdanomro mono zéb da, te te da'āma 're ĩromhuri wě mono zé hã tiwi 're uprosi za'ra wa'aba mono tō da, ātē 're huri aba mono ō di za, siwa'ru dasa hã, romnhi hã. Tō sena uburé dasa hã ĩwě si da te 're ĩhuri mono da hã. Tane nherē, dasa hã siwa'ru 're huri aba mono ré, asiré ĩsazei'wa nherē, sib'uware na 're ĩnomro mono norĩ hã te te 're ai'madâ'â za'ra wa'aba mono wa, asarina wa'aba tiwasété na 're si'marōpārĩ za'ra mono wamhã, tawamhã, aiwasédé te za tō 're ĩ'manharĩ za'ra wa'aba mo. ²¹ Taha wa, romnhi hã siwa'ru 're huri aba mono ō di za, duré uwa 'rāi wa'u ĩsé hã 're âhuri aba mono ō di za, taha zarina asiré ĩsazei'wa norĩ hã tiwasété na apâ 're si'marōpārĩ tō za'ra mono da. Duré siwa'ru marĩ aimawimhã 're 'manharĩ za'ra wa'aba mono wa, ni'wam norĩ hã tiwasété na apâ 're si'marōpārĩ tō za'ra mono da, 're 'manharĩ za'ra wa'aba mono ō di za. ²² 'Re ĩhâimana u'âsi mono si te te āma 're awaihu'u mono da, te za 'râwi asima si āma 're ĩrosa'rata za'ra wa'aba mo, siwa'ru romnhi 're huri aba mono wa, āma 're ĩ'upa za'ra wa'aba mono ō

zém na hã. Ni'wam norĩ hã uburé siwa'ru, tisa te te sima 're ãwẽ uptabi za'ra mono zéb zarina, te te 're ãhuri mono na, 're siwẽ'õ za'ra mono õ wamhã, ãpẽ'ẽ 're tãma 're rowẽ uptabi za'ra mono di za. Duré ni'wam norĩ hã siwa'ru dasa hã te te siwi 're ãwẽ'õ za'ra mono zéb zarina, te te 're ãhuri mono õ na, 're siwẽ'õ za'ra mono õ wamhã, ãpẽ'ẽ 're tãma 're rowẽ uptabi za'ra mono di za duré, ãne hã aiwa. ²³ Tane nherẽ, ni'wam norĩ hã romnhi siwa'ru te te 're huri mono nherẽ, 'rãwi ãma 're siwawã za'ra mono wamhã, 'Re ãhãimana u'ãsi mono hã te za te te 're wẽ'õ za'ra, tisa na 're ãsiwawã za'ra mono zéb zarina. Tane hã marĩ hã wa te 're 'manharĩ za'ra mono nherẽ, 'rãwi ãma 're wasiwawã za'ra mono wamhã, taha na wa za wawasédé hã wa te 're 'manharĩ za'ra.

15

Ãsazei'wa norĩ, prédup sina 're ãsipawaptob za'ra mono zé wasu'u

¹ Wa norĩ hã wanhiptete sina, Wanhib'apito ãma, wa te 're ãsasõmri u'ãsi za'ra mono norĩ hã, marĩ, wa te wasima 're ãwẽ za'ra mono zéb zarina si, wa te 're 'manharĩ za'ra mono õ di za. Wasiré ãsazei'wa nherẽ, hãimana nhib'uware na 're ãhãimana za'ra mono norĩ hã, wa za wa te 're pawaptob za'ra, hãimana nhiptete na wasiré ãma 're hãimana u'ãsi za'ra mono da. ² Wasiré ãsazei'wa norĩ hã marĩ te te sima 're ãwẽ za'ra mono zéb zarina, wa za wa te ãma 're sazei pese za'ra, marĩ ãwẽ na si, wa te ãma 're pawaptob u'ãsi za'ra mono da, hãimana prédub sina oto ãma 're hãimana u'ãsi za'ra mono da. ³ Cristu hã bété, ti'ai ãma 're morĩ ré hã, e sima si ma tô tihãimanazéb da hã 're si'madâ'â. Mare di. 'Rãwi tihãimanazém na si, 're si'madâ'â

mono õ di. ãne na duréihã ma tô ni'wa hã ïwasu'u na ãma rob'ui'ééré siro:

“Ímama, ni'wam norĩ hã te te ai'ãma 're ïwasété za'ra mono norĩ hã ma tô ai'u'âbâ ï'ãma zama te te 're wasété za'ra. Tane nherẽ, aimawi 're ïhâimana mono zéb da hã, te ïsima pisutu õ di, ïsi'uuhã na hã.”

ãne na ma tô duréihã ïbaihã na ãma rob'ui'ééré, ïwasu'u na hã. ⁴ Uburé 'Re ïhâimana u'âsi mono nhimiroti 'rata na rob'ui'ééré hã, e taré ma tô tinhimiroti hã te te dama 're apisutu, da te ãma 're ïrob'ui'ééré za'ra mono zéb da hã. Mare di. Taré te te dama 're apisutu mono õ di. Ísimiroti hã wa te 're waihu'u pese za'ra mono da, ma tô ãne hã te te dama 're apisutu. 'Re ïhâimana u'âsi mono nhimiroti 'rata na rob'ui'ééré hã wa te 're sôré u'âsi za'ra mono wamhã, wanhiptete sina wa za ãma 're wahâimana u'âsi za'ra, marĩ na uburé wa te 're robzépata za'ra mono nherẽ. Wa te 're sôré u'âsi za'ra mono wamhã, te za wama 're rowẽ za'ra, wawi 're robzei'õ za'ra mono ãna, 're ïwahâimana za'ra mono zéb da hã. Ôhõ umnhasi sina, wa za tô ãhã zarina si 're wahâimana za'ra, 'Re ïhâimana u'âsi mono 'rata 're ïwahâimana u'âsi za'ra mono zéb zô, wasina 're wanhimipari za'ra mono sina.

⁵ 'Re ïhâimana u'âsi mono si dapisutu'wa hã, uburé marĩ na da te 're robzépata za'ra mono nherẽ, danhiptete sina ãma 're ïdahâimana u'âsi za'ra mono da hã. Taha si te te sina dama 're ï'arowẽ zani mono hã, dawí 're robzei'õ za'ra mono ãna, ãma 're ïdahâimana za'ra mono zéb da hã. Taha wa, wa tô te ïsima 're aiwẽ za'ra wa'wa, ta hã aihĩni te te 're aipawaptob za'ra wa'aba mono da, asiré ïsazei'wa norĩ hã simisutu asimirosa'rata na 're asisazei pese za'ra wa'aba mono da oto, Cristu

Zezusi 're ĩmorĩ wě zéb zarina. ⁶ Asimirosa'rata na 're asisazei u'âsi za'ra wa'aba mono wapsi, te za 'Re ĩhâimana u'âsi mono ãma Wanh'apito Zezu Cristuhu mama ãma simisutu u'âsi, ãma 're aiwata za'ra wa'aba mo.

Zudezu'õ norĩ hã, Cristuhu wasu'uwě te te oto ĩwaihu'u za'ra zé wasu'u

⁷ Cristu hã sitēme te te 're ĩ'aiwaibui wa'aba mono ne, te za aihâiba zô asisô 're atob'uzu za'ra wa'aba mo, 're asisawi pese za'ra wa'aba mono sina. Taha zarina, 'Re ĩhâimana u'âsi mono ãma 're dawata u'âsi za'ra mono da, te za ãne asima 're ĩ'manharĩ wě u'âsi za'ra wa'aba mo. ⁸ Cristu hã ma tô we ti'ai u datēme mo, zudezu norĩ hã te te 're apawapto mono da, duréihã zudezu norĩ hi'rata ma, dama ĩpire za'ra norĩ ma, 'Re ĩhâimana u'âsi mono te te tãma 're ĩropisutu za'ra mono zéb zarina, te te dama ãma 're a'uwaimrami mono da, duré uburé 'Re ĩhâimana u'âsi mono te te dama ãma 're ĩ'a'uwaimrami mono zēm na, tô sena na da te ãma 're waihu'u pese za'ra mono da. ⁹ Duré zudezu'õ norĩ hã 'Re ĩhâimana u'âsi mono, da'ãma 're ĩpě'ězé mono zé hã te te oto sina 're waihu'u za'ra mono wa, ãma 're wata za'ra mono da, ma tô we Cristu hã zudezu norĩ u satõ, 'Re ĩhâimana u'âsi mono hã. Duréihã ãne rob'ui'éré na ĩwasu'u hã:

“Wa hã zudezu'õ norĩ siré 're ĩhâimana mono ré, wa za ĩsiré za'ra, ai'ãma 're ĩwata u'âsi.

Īnho're na zama, wa za duré ai'ãma 're ĩwata u'âsi.”

¹⁰ Duré rob'ui'éré amo na ĩwasu'u hã, ãne:

“A norĩ wa'wa hã zudezu'õ na 're aihâimana za'ra wa'aba mono norĩ, ma'ãpé simisutu asiré atoi uptabi na, ãma 're aihâimana za'ra wa'aba mono, 'Re ĩhâimana u'âsi mono nhib'a'uwě norĩ me.”

¹¹ Duré rob'ui'ééré amo na ĩwasu'u hã, ãne:
 “Zudezu'õ na 're aihâimana za'ra wa'aba mono
 norĩ, ma'ãpé Wanhib'apito ãma si 're ai-
 wata u'âsi za'ra wa'aba mono, uburé aipoto
 mono bâ 're aihâimana za'ra wa'aba mono
 norĩ hã.”

¹² Iza'iza hã ma tô duré ãne na ãma rob'ui'ééré
 siro:

“Niwapasi te za Zéséhé nhihudu hã we datême wi,
 apito Dawihi mama nhihudu hã.

Wei wisi wapsi, te za 'Re ĩhâimana u'âsi mono hã
 tâma pisutu, zudezu'õ norĩ nhib'apito, 're
 hâimana mono da oto, daro mono bâ.

Tawamhã ta norĩ hã te za te te siwi 're umnhasi,
 marĩ ĩwê hã te te tâma 're ĩpisutu za'ra mono
 zéb zarina, za te te tâma ãma 're ĩ'uwaimrami
 za'ra mono zém na hã.”

Ãne duréihã Iza'iza hã te te ãma ĩrob'ui'éérézê hã, 'Re
 ĩhâimana u'âsi mono nhimiropisutuzém na. Ã hã,
 'Re ĩhâimana u'âsi mono te te dama ĩropisutuzém na,
 ma tô oto dama ãma uwaimra.

¹³ 'Re ĩhâimana u'âsi mono hã waihu'u pese wa,
 te za te te 're wa'apawaptob u'âsi, marĩ ĩwê hã
 te te wama 're ĩpisutu za'ra mono zéb zarina, za
 te te wama ãma 're ĩ'a'uwaimrami mono zéb zô,
 wa te wasiwi 're umnhasi za'ra mono sina, sô
 're wanhimipari u'âsi za'ra mono da. Taha wa,
 wa ai'ãma tâma 're ĩmreme u'âsi za'ra wa'wa, atoi
 uptabi na 're aihâimana u'âsi za'ra wa'aba mono
 da, duré rowê si te te aima 're pisutu za'ra wa'aba
 mono da, asina 're umnhasi za'ra wa'aba mono
 wa. ĩpě'êzani nhimipawaptobzéb zarina, marĩ ĩwê
 uptabi hã 'Re ĩhâimana u'âsi mono, za te te aima 're
 ĩsômri za'ra wa'aba mono zéb zô, asiwi 're umnhasi

za'ra wa'aba mono sina, sô 're asimipari za'ra wa'aba mono zém na, 'râwi asima âma 're sa'êtê za'ra wa'aba mono da, wa tô te ĩsima 're aiwê za'ra wa'wa.

Paru hã, 'Re ĩhâimana u'âsi mono nhimipawapto-bzém na te te 're ĩda'apawapto mono zé wasu'u

¹⁴ ĩsisânawã norĩ, wa hã wa tô ai'âma waihu'u pese za'ra wa'wa, asimizawi pese sina oto 're anomro wê wa'aba mono zém na hã. Duré aima waihu'u pese za'ra wa'aba di oto, 're aihâimana wê za'ra wa'aba mono zéb da hã. Āne hã wa tô duré ai'âma waihu'u pese za'ra wa'wa, Wanhíb'apito nhimiroti na oto asima 're ĩroti waihu'u pese za'ra wa'aba mono zém na zama. ¹⁵⁻¹⁶ Tane nherê, âhãna ĩnhimi'ui'éré na, wa tô sô'awi aima rowasu'u za'ra wa'wa, ĩsina ĩpahi âna, rowasu'u ahâ na te âma aipo're pu'u za'ra wa'aba da. Te aiwi udâ waihu'u za'ra wa'aba âna, wa tô ĩnhimi'ui'éré na hã aima rowasu'u pese za'ra wa'wa, 'Re ĩhâimana u'âsi mono hã sôprum na te te ĩpisutu wa, Cristu Zezusihi ma si te oto 're romhuri mono da, zudezu'õ norĩ hã te tãma 're apawapto mono da. Sasedoti norĩ hã 'Re ĩhâimana u'âsi mono ma, te te da'âma 're ĩromhuri za'ra mono ne, wa duré wa hã zudezu'õ norĩ âma te 're romhuri u'âsi, 'Re ĩhâimana u'âsi mono ma, Zezusihi wasu'uwê na te 're pawapto za'ra mono wa, te te 're ĩsaze za'ra mono zéb zarina, 'Re ĩhâimana u'âsi mono te te 're wêsãmri za'ra mono da. 'Re ĩhâimana u'âsi mono pê'êzani nhimipisutuzéb zarina, ta norĩ hã ĩsib'a'uwê oto 're nomro mono wa, 'Re ĩhâimana u'âsi mono te te 're ĩwêsãmri za'ra mono zéb da hã, wa âne na hã te tãma 're romhuri u'âsi. ¹⁷ Cristu Zezusihi âma si oto 're ĩhâimana mono wa, wa 're

ĩsi'uze, 'Re ãhâimana u'âsi mono ma si, te 're ãromhuri mono zém na hã oto. ¹⁸ Te 're ãrowasu'u wẽ mono zéb zarina, duré te 're ãromhuri wẽ mono zéb zarina ma tô zudezu'õ norĩ hã te te 're wapari pese za'ra, 'Re ãhâimana u'âsi mono hã. E tawamhã ãsi'uihã na ãwaihu'u pese na te 're ã'ab'manharĩ wẽ mono na, wa za dama ãsina 're ãwata. Mare di. ãne hã ã'uwaibaba õ di. Cristuhu nhimipawaptobzéb zarina si, wa tô te tãma 're romhuri u'âsi za'ra, ãwasu'uwẽ na hã. ¹⁹ 'Re ãhâimana u'âsi mono pẽ'ẽzani hã tiwaihu'u pese na te te 're ãpawapto mono zém na si, wa tô marĩ dama ã'manharĩ waihu'u'õ hã te dama 're ab'manharĩ, zudezu'õ norĩ hã tô sena te te 're saze za'ra mono da, ta norĩ hã. Zeruzarẽ hawi, Iririza u 're ãmorĩ ré, wa tô daza'rui mono bâ te dama 're rowasu'u, Cristuhu wasu'uwẽ na hã. ²⁰ Wa hã wa tô ãne hã te ãsima 're rosa'rata u'âsi, Cristuhu wasu'uwẽ hã zahadu dapo're na da te 're ãwapari za'ra mono õ norĩ u si, 're ãmorĩ da, daza'rui mono bâ ãwasu'uwẽ na te ãma 're da'apo're pu'u mono da. Wanhíb'apito wasu'uwẽ na danhimi'u'ẽi 'rata u 're ãzasi tõ mono da, wa tô ãne na te ãsima 're rosa'rata u'âsi. ²¹ Duréhã Iza'iza hã ma tô ãne na Cristuhu ãma rob'ui'éré:

“Ni'wam norĩ ma, ãwasu'uwẽ hã da te tãma 're ãwaihu'u za'ra mono õ norĩ hã te za oto ta norĩ hã 'rãwi ãma 're siwaihu'u za'ra, ãwasu'uwẽ hã da te oto tãma 're wasu'u za'ra mono wa.

Te te 're wapari za'ra mono ãna, aré 're ãhâimana za'ra mono norĩ hã te za oto 'rãwi si'ãma te te 're waihu'u pese za'ra, 're ãhâimana wẽ za'ra mono zém na hã.”

Paru hã, timreme te te sisõwa ãsõmrizé wasu'u,

Roma u morĩ da

22-24 Wa hã wahub ahâ na, wa tô te ĩsima 're rosa'rata u'âsi, te ĩsima 're ĩrowẽ mono zéb uwaibaba, atẽme ĩmorĩ za'ra wa'aba da, te asabu za'ra wa'aba da. Tane nherẽ, zahadu ãmemhã ĩma romhuri ahâ di. Taha wa, nimahã na hã ãma atẽme ĩwatobro waihu'u aba õ di. Tane nherẽ, ãhãna hã ĩnhimiromhuri hã ãmemhã te oto 'rãsutu wamhã, atẽme ãma ĩmorĩ aba da si, wa tô ĩsima waihu'u. Taha wa, wa tô ĩsima pisutu pese, Esipãna na romnhisi u ĩmorĩ ré, te asabu za'ra wa'aba da. ãne wa tô duré ĩsima rosa'rata, atẽme ãma ĩwisi za'ra wa'aba wamhã, niha bātã na a'â ai'rata ĩnhamra za'ra wa'aba da, ĩma ĩrowẽ zarina, duré marĩ na asiwi ĩpawaptob za'ra wa'aba da, Esipãna u ĩmorĩzéb da hã. Taha parip si, wa za oto aihawi ĩmorĩ 'wa. ²⁵ Tane nherẽ, wa za a'â Zeruzarẽ u si mo, ã awa'awi hã, tame 'Re ĩhãimana u'âsi mono nhĩb'a'uwẽ 're ĩsi'ubumroi mono norĩ hã te duré pawaptob za'ra da a'â. ²⁶ Masédoniza na danhipti'a nho'õmo nhisi ãma, duré Ataza na danhipti'a nho'õmo nhisi ãma, zudezu'õ na ĩsazei'wa na oto 're ĩhãimana za'ra mono norĩ hã ma tô sima wẽ za'ra, rob'uiprazé hã te te siwi ubumro da, Zeruzarẽ ãma ĩsazei'wa norĩ te te siwi ãma pawaptob za'ra da, simarĩ ãna 're ĩhãimana za'ra mono norĩ hã, zudezu norĩ hã. Ta norĩ nhoprub za'ra zé hã, ĩsi'uihã na te tãma âri za'ra da Zeruzarẽ u, taha da, wa za a'â tamomop si mo. ²⁷ Ta norĩ hã zudezu'õ na ĩsazei'wa norĩ hã si'uihã na ma tô sima pisutu za'ra, te te siwi ãma ĩpawaptob za'ra zéb da hã, zudezu norĩ hã. ãne hã tô ĩ'uwaibaba ma tô siwi ãma pawaptob za'ra. E marĩ wa. Duréihã zudezu norĩ ma, ma tô 'Re ĩhãimana u'âsi mono hã tiwasu'uwẽ na tãma

siwaihu'u na'rata za'ra, tipě'ě na robzei u'âsi âma 're nomro mono da. Taha na ma tô zudezu'ô norĩ hã te te siwi âma 're pawaptob za'ra ĩwasu'uwě na, aiwapsi oto ôhõ âma si 're hâimana za'ra mono da. Āne wa'rāmi, te za tô zudezu'ô norĩ hã tinhimarĩ na te te siwi 're pawaptob za'ra, zudezu norĩ hã, tô ĩsarina si. ²⁸ Tawamhã âme ĩnhimiromhuri te 'rāsutu parimhã, rob'uiprazé, da te dasiwi ĩ'ubumro hã ubuni na ĩsazei'wa norĩ ma, te āwisi wě parip si, wa za oto mo, Esipānha u ĩmorĩ da hã. Tawapsi, wa za aiwa'wai baba ĩmorĩ aba ré, asabu za'ra wa'wa oto. ²⁹ Tawamhã, atēme ĩwisi za'ra wa'aba wamhã, Cristuhu nhoprubzém na, sa'ētě uptabi na te za aihĩni wama âma tirowě za'ra.

³⁰ ĩsisānawã norĩ, wa za oto aiwi rowaptērě za'ra wa'wa ĩsi'âma, 'Re ĩhâimana u'âsi mono ma, asiptete sina ĩ'âma 're aimreme zusi aba mono zéb da hã. Wanhib'apito Zezu Cristuhu zazei'wa, wasiré oto 're wahâimana za'ra mono wa, duré 'Re ĩhâimana u'âsi mono pě'ězani nhimipawaptobzéb zarina, oto 're wasisawi pese uptabi za'ra mono wa, wa āne na aiwi rowaptērě za'ra wa'wa. ³¹ E marĩ da. Zudeza na danhipti'a nho'ômo nhisi âma ĩsazei'ô'wa norĩ 're ĩhâimana za'ra mono norĩ hã, niha te te ĩma rob'manharĩ za'ra tō da, te za ĩ'âma tiwi ĩrowaptērě u'âsi za'ra wa'aba mo. Duré Zeruzarě âma 'Re ĩhâimana u'âsi mono nhib'a'uwě 're ĩhâimana za'ra mono norĩ hã, ta norĩ hã zudezu na ĩwamri za'ra wě te, zudezu'ô norĩ nhoprubzė hã za te âma ĩ'âri hã te te siwi wě'ô za'ra tō da, te za duré ta norĩ âma zama âma aimreme zusi u'âsi 'wa. ³² ĩtoi uptabi na âma atēme ĩwisi za'ra wa'aba da, te za ĩ'âma aimreme zusi u'âsi 'wa. 'Re ĩhâimana u'âsi mono, ĩmorĩzé hã te te ĩma pisutu wapsi, wa za tô âma

atême ĩwisi 'wa. Tawapsi ĩma rowě uptabi di za, wasiré ĩsazei'wa norĩ hã 'rãwi wasisabu za'ra wě te. Te ãma wazere wamhã, wa za a'â ai'rata ĩwa'utu za'ra wa'wa. ³³ 'Re ĩhâimana u'âsi mono hã wama rowě nhomri'wa hã 'rãwi asiré 're hâimana u'âsi za'ra wa'aba mono da, wa tô te ĩsima 're aiwě u'âsi za'ra wa'wa. Tane tô.

16

Paru, tisiwadi norĩ te te ĩ'azawizé wasu'u

¹ Āne, wa za aima wasu'u za'ra wa'wa, wahidiba Pebi na ĩsisi hã. Ta hã simizawi pese di. Sětireza na 'ri nho'õmo nhisi ãma, te ĩsazei'wa norĩ hã te te 're apawaptob u'âsi. ² Da'ahã na ma tô te te 're da'apawapto pese. ĩzama te duré te te 're ĩpawapto. Taha wa, ma'ãpé asiwi âri wě wa'aba za, wasiré Wanhib'apito zazei'wai wa, 'Re ĩhâimana u'âsi mono nhib'a'uwě, 're ĩsiwaibui wě mono zém na. Marĩ zô tiwi rowaptã'ã wamhã, te za duré marĩ na asiwi ĩpawaptob za'ra wa'wa.

³ Ma'ãpé, duré ĩma sawi za'ra wa'aba, Prisira norĩ hã Atiraha me, te ãma ĩsawi zahuré zéb zarina, rob'ui'ére na. ⁴ Ta norĩ hã ĩsiré te te 're ĩromhuri zahuré mono, Cristu Zezusihi wasu'u na. Ta norĩ hã da te pãrĩ da nherě, ma tô sisawi ãna te te 're ĩpawaptob u'âsi zahuré, pahi ãna. Taha wa, te te 're ĩpawaptob zahuré mono zém na, wa tô te 're uzei u'âsi zahuré. Tane nherě, ĩwétési te ãma 're uze zahuré mono õ di. Uburé zudezu'õ norĩ hã ĩsazei'wa norĩ hã te duré te te ãma 're uzei u'âsi za'ra, daro mono bâ siré 're ĩsi'rã'õtõ mono norĩ hã. ⁵ Ma'ãpé, duré uburé ĩma sawi za'ra wa'aba, Prisira norĩ nhorõwa u ĩsazei'wa norĩ, siré 're ĩsi'rã'õtõ mono norĩ hã, rowahutu u.

Duré asiwi ĩma sawi za'ra wa'aba, ĩsiwadi ĩma ĩsawi pe hã, Epenetu na ĩsisi hã. Ta hã ma tô saze na'rata Cristu hã, Azi'a na danhipti'a nho'omo nhisi ãma. ⁶ Duré Mariza hã asiwi ĩma sawi wa'aba. Ta hã te te aima 're romhuri pese za'ra wa'wa, simi'ei uptabi na. ⁷ Duré asiwi ĩma sawi zahuré wa'aba, Adoronitu norĩ hã, Zuni'asihi me. Ta norĩ hã ĩsiré zudezu norĩ, ma tô ĩsiré tihâimana zahuré, dazazéb 'remhã. Cristuhu zadawa wasu'u'wa norĩ siré te te 're romhuri zahuré mono wa, tãma waihu'u pese za'ra di, ĩsiré romhuri'wa norĩ ma hã. Ta norĩ hã ma tô ĩwana saze na'rata zahuré, Cristu hã.

⁸ Ma'ãpé duré asiwi ĩma sawi wa'aba, ĩsiwadi uptabi hã, ãprizatu na ĩsisi hã. Ta hã te Cristu ãma si 're hâimana. ⁹ Duré Ubanuhu zama asiwi ĩma sawi wa'aba, wasiré romhuri'wa hã Cristuhu ma. Esitati hã ĩsiwadi zama te za duré asiwi ĩma ĩsawi wa'wa, ĩma ĩsawi pe hã. ¹⁰ Ma'ãpé duré asiwi ĩma sawi wa'aba, Aperi hã. Ta hã marĩ na da te 're pibui ahâ mono nherẽ, niwa Cristuhu wi sipi'rai waihu'u õ di. Duré asiwi ĩma sawi za'ra wa'aba, Arisitoburuhu nhorõwa 're, 're ĩhâimana za'ra mono norĩ hã. ¹¹ Duré, Erodi'ã hã asiwi ĩma sawi wa'aba, ĩsiré zudezu hã. Duré wasiré ĩsazei'wa norĩ hã Nasizuhu nhorõwa 're, 're ĩhâimana za'ra mono norĩ hã asiwi ĩma sawi za'ra wa'aba duré.

¹² Tiripena norĩ hã te za duré asiwi ĩma ĩsawi zahuré wa'wa, Tiripozaha me. Ta norĩ hã te Wanhib'apito ma, te te 're romhuri zahuré. Duré wahidiba hã ĩma ĩsawi pe hã asiwi ĩma sawi wa'aba, Pezidi na ĩsisi hã. Ta hã simi'ẽ na te duré Wanhib'apito ma, te te 're romhuri pese,

wa'a ãna. ¹³ Ma'ãpé duré asiwi ïma sawi wa'aba, Rupu hã. Ta hã te duré te te 're romhuri pese, Wanhib'apito ma. Ñna zama te za duré asiwi ïma ïsawi wa'wa. Ta hã ïna õ nherẽ, ma tô te te 're ïpawapto pese, dana hã ti'ra te te 're ïpawapto pese za'ra mono ne. ¹⁴ Asĩtitu norĩ hã te za duré asiwi ïma ïsawi za'ra wa'wa, Predotihi me, duré Emesi, duré Patorobasi, duré Emasi hã. Duré uburé ïtẽme 're ïsi'rã'õtõ mono norĩ hã asiwi ïma sawi za'ra wa'aba, ïsazei'wa norĩ hã. ¹⁵ Ma'ãpé duré asiwi ïma sawi za'ra wa'aba, Pirorodu norĩ hã, Zurizaha me, duré Nere'u norĩ hã ïhidiba me, duré Orĩpasihĩ zama. Duré ta norĩ siré 're ïsi'rã'õtõ mono norĩ hã te za asiwi ïma ïsawi za'ra wa'wa, 'Re ïhãimana u'ãsi mono nhib'a'uwẽ norĩ hã.

¹⁶ Uburé asiré ïsazei'wa 're aihãimana za'ra wa'aba mono wa, te za asõ'utu na asisawi sina 're asitob'rata hãrã za'ra wa'aba mo.

Ãmemhã uburé Cristuhu zazei'wa norĩ hã, ï'upsãtã mono bã sitẽme 're ïsi'rã'õtõ mono norĩ hã te duré ãma asawi za'ra wa'wa.

Paru hã, roti na za oto te te ïrãsutuzém na rowasu'u

¹⁷ ïsisãnawã norĩ, wa za oto ïnhimiroti na aima 'rãsutu za'ra wa'wa. Ni'wam norĩ hã te aimawi tinhimirosa'rata na te te ãma 're 'wa'rutu za'ra, ïsazei'wa norĩ wi. Te te tiwi ãma 're 'wa'rutu za'ra mono wa, te ïsazei'wa norĩ hã ïmreme hã te te 're wapari za'ra. Taha zarina, te duré sima ãma 're siwanhizari. Ta norĩ nhimirob'manharĩ wasété zéb zarina, te ïsazei'wa norĩ hã 're si'marõpãrĩ za'ra, tiwasété na. Zesusihĩ nhimiroti na, da te aima 're ïroti za'ra wa'aba mono zéb upana, te ta norĩ hã te te dama 're roti za'ra, aimawi na si. Taha wa, te za tiwi 're asisawi pese za'ra wa'aba mo, ta norĩ siré

're aihâimana za'ra wa'aba mono tō da. ¹⁸ Ta norĩ hã Wanhib'apito Cristuhu ma, te te 're romhuri za'ra mono õ di. Te te sima 're ãwẽ za'ra mono zéb zarina si, te marĩ ãwasété zô si 're sôpré. Ta norĩ hã sadawa nhipese nherẽ, te ãsimiroti hã sena newa da te 're wapari ze za'ra, danhimirosa'rata nhib'aware na 're ãdahâimana za'ra mono norĩ hã. Mreme wapari ze wa, duré asa ãmreme hã da te dasima 're wẽ za'ra mono da, te taré timreme amo na te te dama 're rowasu'u za'ra, da'ãma 're wata za'ra mono sina. Tawamhã taha zarina, te za awa'awi ãmreme na da te 're saze za'ra. ¹⁹ Tanei õ di, a norĩ wa'wa hã. Zesusihi wasu'uwẽ 're ãwapari pese za'ra wa'aba mono zém na, ma tō daro mono bã ãsazei'wa norĩ hã aiwasu'u za'ra wa'wa hã te te 're wapari ze za'ra. Taha wa, ma tō ãma asina ãma 're ãrowẽ zani za'ra wa'aba mo.

Ãne wa, wa za duré aima roti za'ra wa'wa. Asimiza'rese sina, te za marĩ ãwẽ hã 're ã'manharĩ za'ra wa'aba mono zéb da si, asina 're asôpré wa'aba mo. Marĩ ãwasédé hã 're 'manharĩ za'ra wa'aba mono da, asima 're 'madâ'â za'ra wa'aba mono õ di za. Te za tiwi 're asiptete za'ra wa'aba mo, aiwasété wi hã. ²⁰ Rowẽ na 're ãdanomro mono zé hã, 'Re ãhâimana u'âsi mono hawimhã. Ta hã te za rowẽzé hã te te aima 're anhomri 'wa. Wahi hã dapara na da te 're ãwati'i za'ra mono ne, te za Satanasihi nhiptetezé hã romhutu na te te tiwi 're a'uprosi 'Re ãhâimana u'âsi mono hã, tō õ hã Satanasi hã asahâpâ 're hâimana za'ra wa'aba mono da oto.

Wanhib'apito Zesusihi wi, wa wa te tiwi 're rowaptẽrẽ u'âsi, tinhimipawaptobzé hã te te aima 're sômri za'ra wa'aba mono da, ai'rata 're hâimana u'âsi za'ra wa'aba mono da.

21 Timotiu hã, ãme ĩsiré romhuri'wa hã te duré ãma asawi za'ra wa'wa. Duré ĩsiré zudezu norĩ te duré ãma asawi za'ra wa'wa, Rusizu norĩ hã, Zasãhã me, duré Sosipaturu hã.

22 Wa hã, Tési'u hã wa duré ãma asawi za'ra wa'wa, Wanhíb'apito ãma wasiré 're wahâimana za'ra mono wa. Wa hã Paru te te ĩma ĩ'awaihu'u mono zéb zarina, wa tô rob'ui'ééré, ã ĩbaihã na hã.

23-24 Wa hã Paru, ãne wa za duré ãma aima waihu'u za'ra wa'wa. Da'izu hã tinhorõwa u te te ĩmazébré hã, te duré ãma asawi za'ra wa'wa. Taha nhorõwa ãma, te wasiré ĩsazei'wa norĩ hã 're si'rã'õtõ u'âsi. Duré Erasitu hã ãme 'ri nho'õmo ãma danhib'apito ma, rob'ui'prazé za'rata na romhuri'wa hã, te ãma asawi za'ra wa'wa. Wasisãnawã Tu'atu na ĩsisi zama, te duré ãma asawi za'ra wa'wa.

Paru hã, 'Re ĩhâimana u'âsi mono ãma ĩwatazé wasu'u

25-26 'Re ĩhâimana u'âsi mono ãma si, wa za 're wawata u'âsi za'ra. Taha ma si, tãma waihu'u pese di, te te 're ĩwa'apawapto mono zéb da hã, Zezu Cristuhu wasu'uwẽ hã wa te 're ĩsaze za'ra mono zé hã wa te 're rême za'ra mono ãna, wanhiptete u'âsi ãma 're ĩwanomro mono zéb da hã. Taha wasu'uwẽ hã wa tô te dama 're wasu'u u'âsi. Duréihã ĩwasu'uwẽ hã, 'Re ĩhâimana u'âsi mono te te dama 're awaihu'u mono õ di. ĩwasu'uwẽ hã dama sa'rese ãna, ma tô aré 're danomro. Tane nherẽ, ma tô 'Re ĩhâimana u'âsi mono hã ĩwasu'uwẽ hã dama waihu'u oto, ĩsadowa wasu'u 'rata 'wa norĩ nhimi'ui'ééré hawimhã. Taha wa, te oto ĩsimiwada'urizéb zarina si, da te 're waihu'u za'ra daro mono bâ, da te ãma 're ĩsazei pese za'ra mono zéb da hã, duré da te 're ĩwapari pese za'ra mono zéb da hã oto.

27 'Re ãhâimana u'âsi mono hã misire te 're hâimana. Ôhõ si siwaprosi uburé marĩ hã tãma waihu'u pese di, taha ma si. Taha wa, taha ãma si, wa za 're wawata u'âsi za'ra, Zezu Cristu te te wama 're ã'ab'manharĩ wẽ mono zéb zarina si. Tane tã.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

744f0b3a-210f-53c7-b3a1-39b62617ba0c